

O LE EKALESIA A IESU KERISO O LE AU PAIA O ASO E GATA AI • APERILA 2015

# OLE Liahona



**Malamalama i le  
Taulaga Paia a le  
Faaola, i. 34**

**Aisea e le o se Agasala  
ai le Augavaivai, i. 20**

**Pe Faapefea ona Faamanuiaina  
i le Afiafi Faaleaiga, i. 10, 80**



"O ai ea so outou e ana mamoe e selau, afai e leiloa le tasi, e le tuua e ia le ivagafulu ma le iva i le vao,  
ae alu ma saili i le na leiloa, seia maua?  
"A maua, ua faafuata ma le olioli."

Luka 15:4–5

# O Le Liahona, Aperila 2015



7

## O SAVALI

- 4 **Savali a le Au Peresitene Sili: Ua Valaau Mai Peresitene Monson mo le Lototele**  
Saunia e Peresitene Thomas S. Monson
- 7 **Savali a Faiaoga Asiasi: O Uiga o Iesu Keriso—E Aunoa ma le Pepelo po o le Faagutugutulua**

## TALA FAAALIA

- 14 **O Le Faatosinaga Faaleagaga a Tamaitai**  
Saunia e Starla Awerkamp Butler  
*O lau faatosinaga o se tamaitai e oo atu i talaatu o mea e mafai ona vaaia.*
- 20 **E Le o se Agasala le Augavaivai**  
Saunia e Wendy Ulrich  
*Aoao pe faapeflea ona iloa le eseesega o agasala mai vaivaiga ma pe faapeflea ona avea vaivaiga ma malosiaga.*

## 26 Talitonuga Faalelotu Mama

Saunia e Elder W. Christopher Waddell  
*Faitau laasaga nei e tolu i le tautua le faatuaioia.*

## 30 "Ua Naunau la Te Oe"

Saunia e Jonathan H. Westover  
*O le usuina o se viiga na faia ai se eseesega tele mo lenei aiga Korea sa sailili i le talalelei.*

## 34 O Le Taulaga Le Faatuaioia ma le Paia a le Faaola

Saunia e Peresitene Boyd K. Packer  
*E ala i le Togiola a le Faaola e mafai ai ona tatou totogia uma a tatou aitalafu faaleagaga o le agasala ma le tausalaga.*

## 80 O Le 100 Tausaga o Afiafi Faaleaiga


*O le 1915 na valaaulia ai e Peresitene Josefa F. Samita ma ona fesoasoani ia tagata o le au paia e amata ona faia afiafi faaleaiga, ma faamalamalama ai lona faiga, sini, ma faamanuiaga.*

## MATAGALUEGA

- 8 **Tatou te Talanoa ia Keriso: O Le Mana o le Faatuatua**  
Saunia e Amber Barlow Dahl
- 10 **O Tatou Aiga, O Tatou Auaiga: Afiafi Faaleaiga—E Mafai ona E Faia!**
- 12 **Tala Faamamai o le Talalelei: Ua Toetu o la**  
Saunia e Peresitene Tavita O. MaKei
- 40 **O Leo o le Au Paia o Aso E Gata Ai**

## I LE FAAVAA

I Luma: *O Le Ala i Emau*, saunia e Liz Lemmon Swindle. I totolu o le faavaa pito i luma: Ata na pueina e Jim Jeffery. I totolu o le faavaa pito i tua: Ata na pueina e Cody Bell.



44

**44 Agai i Luma i le Faatuatua**

Saunia e Elder Anthony D. Perkins  
*Aoao mai ia Nifae le mea e te faia  
 pe a e feagai ma ni faaiuga taua.*



54

**49 Pepa Lautele o I Ai se Savali:  
 Saili o Ia****50 Ona o Iosefa**

Saunia e Ted Barnes  
*E le itiiti ifo ma le ono itu ua ese  
 ai lou olaga ona o le Perofeta o  
 Iosefa Samita.*

**53 O Le Perofeta Soifua**

Saunia e Peresitene Ezra Taft Benson  
*Atamu? Nifae? Mose? E te ono  
 maofa i lou aoao pe o ai le  
 perofeta e sili ona taua.*

**54 O Le Faataitaiga a le Faaola  
 o le Usiusitai**

*O ala e iva na faatuina e Iesu  
 Keriso mo i tatou e mulimuli ai.*

**58 O La Tatou Avanoa****60 Auala e Poto Ai**


Saunia e Elder Neil L. Andersen  
*O le a le eseesege o le poto o le  
 lalolagi ma le poto o le Atua?*

**61 Tuusao i le Mataupu****62 Tasi le Lafu ma le Leoleo  
 Mamoe e Toatasí**

*O le malamalamā i auiliiliga  
 o se galuega a le leoleo mamoe,  
 e mafai ai ona tatou latalata  
 atili i le Faaola.*

**64 Fesili ma Tali**

*E mafai faapefea ona ou lagona  
 le mafanafana e talanoa atu ai  
 i lo'u epikopo e uiga i faafitaui  
 po o ni atugaluga?*



75

**66 O Ai Lau Toa?**

Saunia e Charlotte Mae Sheppard  
*Sa fefe Ellie e ta'u i lana vasega  
 lana toa moni lava.*

**68 O Tatalo ma Falelotu**

Saunia e McKelle George  
*Ina ua asiiasi atu Dani i se falelotu  
 i Egelani, sa ia aoaoina se lesona  
 taua e uiga i le tatalo.*

**70 Molimau Faapitoa:**

**Aisea e taua tele ai le usiusitai?**  
 Saunia e Elder Russell M. Nelson

**71 Manatu Lelei****72 Taimi o Tusitusiga Paia:**  
**Ua Faamalolo e lesu se Lepela**

Saunia e Erin Sanderson

**74 Ata o Mau: Ua Faamalolo  
 e lesu e Mamai****75 O Le Ala Sa'o**

Saunia e Elder Claudio D. Zivic  
*O le mulimuli i le ala sa'o e  
 faia ai le eseesege uma.*

**76 Mo Tamaiti Laiti: Ou Te  
 Illoa E Alofa Iesu la Te A'u**

Saunia e Jane McBride Choate

O Le Lomiga Faamaonia Faa-Samoa a le Ekalesia  
a Iesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson,  
Henry B. Eyring, Dieter F. Uchtdorf

**O Le Korama a Apostolo e Toasefululuua:**

Boyd K. Packer, L. Tom Perry, Russell M. Nelson,  
Dallin H. Oaks, M. Russell Ballard, Richard G. Scott,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen

**Faatonu:** Craig A. Cardon

**Fautua:** Mervyn B. Arnold, Christoffel Golden,  
Larry R. Lawrence, James B. Martino, Joseph W. Sitati

**Pule Faatonusili:** David T. Warner

**Faatonusili o le Lagolago mo Aiga ma**

**Tagata o le Ekalesia:** Vincent A. Vaughn

**Faatonusili o Mekasini a le Ekalesia:** Allan R. Loyborg

**Pule o Mea Tau Pisini:** Garff Cannon

**Pule Faatonutonu:** R. Val Johnson

**Pule Faatonutonu Lagolago:** Ryan Carr

**Lagolago o Lomiga:** Lisa Carolina López

**Au Tusitusi ma Faatonutonu:** Brittany Beattie,  
David Dickson, David A. Edwards, Matthew D. Flitton,  
Lori Fuller, Garrett H. Garff, LaRene Porter Gaunt, Mindy  
Anne Leavitt, Michael R. Morris, Sally Johnson Odekirk,  
Joshua J. Perkey, Jan Pinborough, Richard M. Romney,  
Paul VanDenBergh, Marissa Widdison

**Pule Faatonusili Tusiata:** J. Scott Knudsen

**Faatonusili Tusiata:** Tadd R. Peterson

**Au Mamanu:** Jeanette Andrews, Fay P. Andrus,  
Mandie M. Bentley, C. Kimball Bott, Tom Child, Nate  
Gines, Colleen Hinckley, Eric P. Johnsen, Susan Lofgren,  
Scott M. Mooy, Mark W. Robison, Brad Teare, K. Nicole  
Walkenhorst

**Faatonu o le Puletaofia ma Fatufatuga:**

Collette Nebeker Aune

**Pule i le Gaosiga:** Jane Ann Peters

**Au Gaosi:** Connie Bowthorpe Bridge, Julie Burdett,  
Katie Duncan, Bryan W. Gygi, Denise Kirby, Ginny J.  
Nilson, Gayle Tate Rafferty

**Tailolomi:** Jeff L. Martin

**Faatonusili Lolumiga:** Craig K. Sedgwick

**Faatonusili o le Tufatufaga:** Stephen R. Christiansen

Mo le okaina o mekasini, alu i le store.lds.org po o le  
Faletusi Tutotonu i Pesega. Telefoni 64127. Totogi o le  
Mekasini: \$0.55 (Samoa) i le kopu. Totogi mo le Tausaga  
Atoa \$6.60 (Samoa).

**Auina atu tusitusiga ma faafesili i luga o le**

**initoneti i le liahona.lds.org:** pe meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli: [liahona@ldschurch.org](mailto:liahona@ldschurch.org).

*O Le Liahona* (o lona uiuga i le Tusi a Mamona o le  
"tapasa" po o se "faatonuala") e lomia i le faa-Alepania,  
Aminia (Sasae), Pisilama, Palekeria, Kemupotia, Sepuano,  
Saina, Kalaoitia, Siekisolvakia, Tenimaka, Take, Igilisi,  
Estonia, Fiti, Finelani, Farani, Sihamani, Eleni, Hanikeri,  
Initu, Iselani, Initoniesia, Italia, Iapani, Kiripati, Korea,  
Latvia, Litunia, Malakasa, Maselai, Monokolia, Nouei,  
Polani, Potukale, Romania, Rusia, Samoa, Saina  
(ua faafagofieina), Silovenia, Sipanirolo, Suetena,  
Swahili Tagaloka, Tahiti, Tai, Toga, Iukureini, Urutu,  
ma Viatenam. (E eseese lava gagana.)

© 2015 Puletaofia e le Intellectual Reserve, Inc. Ua taofia  
aia tatau uma. Lomia i le lunaite Setete o Amara.

E mafai ona kopu tala ma ata o le *Liahona* mo le toe  
faaoagaina i lotu po o le aiga aei ia le faia ai ni pisinisi. E  
le tatau ona kopu ni tala po o ni ata pe afai o faasa mai i  
le laina o loo tatau ia le e ona lea faatufugaga. Auina atu  
fesili e uiuga i le puletaofia i le Intellectual Property Office,  
50 East North Temple Street, Salt Lake City, UT 84150,  
USA; i-meli: [cor-intellectualproperty@ldschurch.org](mailto:cor-intellectualproperty@ldschurch.org).

**For Readers in the United States and Canada:**

April 2015 Vol. 39 No. 4. O LE LIAHONA (USPS 311)  
Samoan (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address  
label from a recent issue; old and new address must be  
included. Send USA and Canadian subscriptions to Salt  
Lake Distribution Center at address below. Subscription  
help line: 1-800-537-5971. Credit card orders (Visa,  
MasterCard, American Express) may be taken by phone.  
(Canada Poste Information: Publication Agreement  
#40017431)

POSTMASTER: Send all UAA to CFS (see DMM 707.4.12.5).  
NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.

# Manatu Mo Afiafi Faaleaiga

*O lenei lomiga o loo aofia ai tusiga ma gaoioiga e mafai ona faaaoga mo afiafi  
faaleaiga. O ni manatu nei se lua.*



**"Ua Naunau ia Te Oe,"** itulau 57: E pei  
lava o upu o le viiga "Ua Naunau ia te Oe"  
lea na fesoasoani ia Pak Mi-Jung e filifili  
e papatiso, e mafai foi e viiga ona i ai se  
aaifiaga mamana i o tatou olaga. Manatu  
i se taimi sa faamanuiaina ai lou olaga i  
upu o se viiga, ma mafaufau e faasoa i lou  
aiga lea aaifiaga. Valaaulia tagata taitoatasi  
o le aiga e filifili se viiga e sili ona fiafia i ai,  
ma faamatala pe na faapefea ona faama-  
nuiaina ai lona olaga. Ona usuusu faatasi  
lea ma lou aiga ia viiga taitasi. (E mafai ona  
fai le mea lea mo ni nai vaiaso.)

**"Tatalo ma Falelotu,"** itulau 68: A uma  
ona e fatauina le tala lea, faaali ni ata pe  
ta'ua foi ni falesa eseese o le tou nuu, ma  
talanoa e uiga i fesili nei ma lou aiga: O a  
ni mea e tutusa ai i tatou ma isi lotu? O  
le a se lagona o le Tama Faalelagi mo Ana  
fanau uma? E faapefea ona tatou tauli-  
maina tagata o isi talitonuga? Mafaufau e  
faaaoga le tala "Faapaleniiia o le Upumoni  
ma le Faapalepale" saunia e Elder Dallin H.  
Oaks o le Korama a Apostolo e Toase-  
fululuua (*Liahona*, Feb. 2013, 28–35) e  
fesoasoani ai e tali fesili nei.

## I LAU GAGANA

O loo maua le *Liahona* ma isi mea e faaaoga a le Ekalesia i le tele o gagana i le  
[languages.lds.org](http://languages.lds.org).

## AUTU I LENEI LOMIGA

*E ta'u mai e numera le itulau muamua o le tusiga.*

**Afiafi faaleaiga,** 10, 80

**Feagaiga Fou,** 54, 62,

72, 74

**Perisitua,** 50

**Agaga Paia,** 30, 41, 42,

**Perofteta,** 53

43, 44, 50, 58

**Poloaiga,** 70, 75

**Agasala,** 20, 34

**Ponokalafi,** 34

**Aiga,** 10, 50

**Salamo,** 34, 64

**Alofa,** 76

**Satani,** 34, 69

**Anapogi,** 30

**Taitai o le Ekalesia,** 53, 64

**Auauna atu,** 26, 42

**Tamaitai,** 14

**Faaiuga,** 44, 60, 75

**Tatalo,** 68

**Faamagaloga,** 20, 34

**Ta'usalaina,** 20, 34

**Faamalologa,** 8, 72, 74

**Toefuataiga,** 50

**Faanoanoa,** 30, 41

**Toetu,** 12, 49

**Faataitaiga,** 14, 66

**Togiola,** 20, 34, 49

**Faatuatua,** 8, 20, 44

**Usiusitai,** 44, 54, 58

**Faitalia,** 4, 20, 44



Saunia e Peresitene  
Thomas S. Monson


Ua Valaau Mai Peresitene Monson mo le  
**LOTOTELE**

*Sa mataituina e Peresitene Thomas S. Monson e toetoe lava o loo faaaauau pea ona valaau mai ia faia lea filifiliga ma lea filifiliga.*

*Ina ia faia o filifiliga poto, na ia fautua mai ai, e manaomia lo tatou lototetele—“le lototele e fai atu ai e leai, le lototele e fai atu ai ioe. Faaiuga e fuafua ai le taunuuga.”<sup>1</sup>*

*I le saunoaga lea, ua faamanatu mai ai e Peresitene Monson i le Au Paia o Aso e Gata Ai, e manaomia lo latou lototetele e tutu atu ai mo le upumoni ma le amiontonu, e puipui mea ua latou talitonu i ai, ma faafetaia’ia se lalolagi ua teena mea taua ma mataupu faavae o le faavavau.*

*“O le valaau mo le lototele e oo mai pea lava pea ia i tatou taitoatasi,” na ia saunoa ai. “Na moni lava lenei mea, ma o le a tumau pea lona moni.”<sup>2</sup>*



## O Le Lototele e Aumaia ai le Faamaoniga a le Atua

“O le a tatou fetaiai uma ma le fefe, lagonaina o le tauemuna, ma taia foi i e faasagatau mai. E tatau ia i tatou—ia i tatou uma—ona tatou maua le lototele e faafetaiaia ai manatu lautele, le lototele e tu atu ai mo mataupu faavae. O le lototele, ae le o le palai, e aumai ai le fafia i le faamaoniga a le Atua. E avea le lototele ma se amio mama e ola ma faatosina pe a manatu i ai ua le na o se naunautaiga e oti ma le mamalu ae o se naunautaiga foi ia ola mama. A o tatou agai pea i luma, ma tatou taumafai e ola e pei ona tatau ai, o le a mautinoa lava tatou te mauaina le fesoasoani mai le Alii ma mafai ona maua ai le mafanafana i Ana afioga.”<sup>3</sup>

## Tatalia ma le Lototele

“O le a le uiga o le tumau? Ou te fafia lava i le faauigaga lea: *ia tatalia ma le lototele*. Atonu e tatau ai le lototele mo oe e te talitonu ai; o le a i ai taimi e tatau ai pe a e usitai. E mautinoa lava e manaomia pe a e tumau seia oo i lena aso o le a e tuua ai le olaga nei.”<sup>4</sup>

## Ia I Ai le Lototele e Tu Atu ai mo le Upumoni

“[Ia] e maua le lototele e tu mausali ai mo le upumoni ma le amiontu. Ona o tulaga ua aga i ai malo i nei onapo ua see ese ai mai tulaga faatauaina ma mataupu faavae ua tuuina mai e le Alii ia i tatou, o le a mautinoa lava le valauina o i tatou e puipui mea ua tatou talitonu i ai. Vagana ua maua'a lau molimau, o le a faigata ia te oe ona e tatalia le taufafai a i latou o loo luitauina lou faatuatua. A maua'a, o le a tosina e lau molimau i le talalelei, le Faaola, ma lo tatou Tama Faalelagi mea uma e te faia i lou olaga atoa.”<sup>5</sup>

## Tatou te Manaomia le Lototele Faaleagaga ma le Mama

“O feau o loo aumaia i televisé, o atatifaga, ma isi ala o faasalalauga [i onaponei] e tele lava ina tetee sa'o lava i mea tatou te mananao ia tatou fanau e talia ma opomau i ai. O lo tatou tiute e le gata ina aoaoina i latou ina ia malamalamalelei i le agaga ma aoaoga faavae, ae ia fesoasoani foi ia i latou e aloese mai ai, tusa lava po o a malosiaga mai fafo latou te fetaiai. O le a manaomia ai le tele o taimi ma taumafaigna i la tatou vaega—ma ina ia mafai ona fesoasoani i isi, e manaomia e i tatou lava le lototele faaleagaga ma le mama e tatalia ai mea leaga tatou te vaai i ai i soo se itu.”<sup>6</sup>

## Ina Tatou Lototetele ia

“A o tatou ola ai mai lea aso i lea aso, e toetoe lava a muai iloaina o le a luitauina lo tatou faatuatua. Atonu o nisi taimi tatou te iloa ai le siosiomia o i tatou lava e isi ae o loo tutu pea o ni vaega toalaiti pe oo foi lava i le tutu na o i tatou e tusa ma mea ua taliaina ma mea e le taliaina. . . .

... “Tau ina ia tatou lototetele pea ma saunia e tutu mo mea ua tatou talitonu i ai, ma afai e tatau ona tatou tutu na o i tatou i le faagasologa, tau ina ia tatou faia ma le lototele, ua faamalosia e lo tatou iloa, e moni lava e le o tuua na o i tatou pe a tatou tutu faatasi ma lo tatou Tama o i le Lagi.”<sup>7</sup> ■

## AOAO ATU MAI LENEI SAVALI

**E mafai ona e fesili atu ia i latou o loo e aoaoina, e uiga i se tulaga i le vaiaso a sau—i le fale, i le galuega, po o le lotu foi—o le a manaomia ai ona latou faatinoina ma le lototele. Atonu e feagai i latou ma le fefe, onosaia o se mea fagata, tutu atu mo o latou talitonuga, pe filifili foi e usitai atili i se mataupu faavae o le talalelei. Valaaulia i latou e faasoa o latou manatu pe tusi foi i lalo.**

## FAAMATALAGA

1. Thomas S. Monson, “O R e Tolu o Filifiliga,” *Liahona*, Nov. 2010, 67, 68.
2. Thomas S. Monson, “O Le Valaau mo le Lototele,” *Liahona*, May 2004, 55.
3. Thomas S. Monson, “Ia Faamalosi ma Loto Tele,” *Liahona*, Me 2014, 69.
4. Thomas S. Monson, “Talitonu, Usitai, Tumau,” *Liahona*, Me 2012, 129.
5. Thomas S. Monson, “Ia Outou Lototetele,” *Liahona*, Me 2009, 126.
6. Thomas S. Monson, “O Sini e Tolu e Taialaina ai Oe,” *Liahona*, Nov. 2007, 118-19.
7. Thomas S. Monson, “Ia Lototele e Tu Na o Oe,” *Liahona*, Nov. 2011, 60, 67.

## Se Sara mo Se Isi

Saunia e McKenzie Miller

**E**masani ona faigata ia te au ona faaaoga o'u talitonuga e tali atu ai i se fesili faigofie e pei o le "Aisea e te le inu kofe ai?" I taimi ua fano, ou te faia ai ni 'alofaga e pei o le "E oona tele" po o le "ou te le manao i lona tofo."

Aisea sa ou maasiasi ai? Aisea sa ou matua fefe ai e tu atu mo mea ua ou talitonu i ai? Pe a ou tou tepa nei i tua, ou te le malamalama lelei po o le a le mea sa ou fefe i ai. Ae ou te manatua lelei le taimi na ou le toe lafi ai i a'u 'alofaga.

I se tasi aso i le vasega o le Igilisi i le aoga mauluga, sa faasilasila mai ai e le faiaoga o le a matou matamata i se ata i le TV sa ou iloa e le tatau ona ou matamata ai. A o pati fiafia tamaiti, sa sii le lima o Sara ma faanoi pe mafai ona alu i fafo.

Ina ua fesili le faiaoga pe aisea, sa na ona tali faigofie atu

o Sara, "Ona o a'u o se Mamona ma ou te le matamata i ni ata e masoa le gagana."

Sa maoae lona lototele e tu atu i luma o le vasega. Faafetai lava ia Sara, sa ou tu foi i luga ma faatalitali i fafo ma se lagona fuatiaifo mama seia uma le ata.

Sa ou suia e faavavau. Sa amata ona ou faamatalaina o'u talitonuga nai lo le 'aloese mai le mataupu. O le mea na oo i ai, sa ou maua le talitonuga mautinoa mo a'u lava ia, ma ua faatele ona ou auai i gaoioiga a le Lotu faapea le aoga.

Ou te le'i ta'uina lava ia Sara le aoga tele o lana faataitaiga mo au, ae ua ou taumafai e mulimuli i lana faataitaiga o le talitonuga mautinoa. Ua ou iloa nei o le avea ai o se tagata o le Ekalesia matagofie, paia a le Atua, e matuai leai lava se mea e maasiasi ai. Ou te faamoemoe, o le a mafai, e ala i a'u faataitaiga ona avea ma se Sara mo se isi.

*E alaala le tusitala i Iuta, ISA.*

## TAMAITI

### Lototele i Tusitusiga Paia


**U**a aoao mai i tatou e Peresitene Monson ia lototetele ma tutu atu mo mea ua tatou talitonu i ai. E tele faataitaiga i tusitusiga paia o tagata sa faaalia le lototetele. Faitau le mau o i tafatafa o igoa taitasi. Na faapefea ona faaalia e nei tagata le lototele ma tutu atu mo le mea sa latou iloa e sa'o? Faaaoga avanoa e tusi ai pe tusi ai se ata o au tali.

Iosefa Samita  
(Iosefa Samita—Talafaasolopito 1:11–17)

Tanielu (Tanielu 6:7, 10–23)

Samuel le Sa Lamana (Helamana 13:2–4; 16:1–7)

Eseta (Eseta 4:5–14; 5:1–8; 7:1–6)



Ia suesue ma le agaga tatalo lenei savali ma saili ia iloa mea e faasoa atu. O le a mafai faapefesa e le malamalama i le sofiuaga ma matafaioi a le Faaola ona faateleina lou faatuatua ia te Ia ma faamanuiaina ai i latou o loo e tausia e ala i le faiaoga asiasi? Mo nisi faamatatalaga, alu i le reliefsoociety.lds.org.

## O Uiga o Iesu Keriso: E Aunoa ma le Pepelo po o le Faagutugutulua

O se vaega lenei o se faasologa o Savali a Faiaoga Asiasi e faauatu i uiga o le Faaola.

**O**le malamalama e aunoa Iesu Keriso ma le alualua pe faagutugutulua, o le a fesoasoani tatou te taumafai faamaoni ai e mulimuli i Ana faataitaiga. Na faamalamalama e Elder Joseph B. Wirthlin (1917–2008) o le Korama a Apostolo e Toasefululu: “O le pepelo o le faaseseina po o le taitaieseina lea. . . . O se tagata e aunoa ma le pepelo, o se tagata mama lea, faamaoni i ona manatu, mama i ona faamoemoega ma ua faaalia i lona olaga i aso taitasi lona usiusitai i mataupu faavae o le amiontonu. . . . Ou te talitonu i le tatau i tagata o le Ekalesia ona aunoa ma le pepelo ua sili atu ona manaomia i le taimi nei nai lo aso ua mavae, ona o le toatele o tagata i le lalolagi e foliga mai e le malamalama i le taua tele o lenei uiga o le faamaoni.”<sup>1</sup>

E faatatau i le faagutugutulua, na saunoa Peresitene Dieter F. Uchtdorf, Fesoasoani Lua i le Au Peresitene Sili:

### Mafaufau i le Mea Lenei

O le a se mea e mafai ona tatou aoaoina e uiga i le le pepelo o tamaiti laiti? (Tagai Taiala i Tusitusiga Paia, “Pepelo.”)



“E leai ma se tasi o i tatou ua matuai pei o Keriso e pei ona tatou iloa e tatau ona avea ai i tatou. Ae tatou te mananao ma le naunautai ia faatoilalo o tatou sese ma le tuinanau e fai le agasala. Faatasi ai ma o tatou loto ma agaga tatou te naunau ai ia lelei atili i le fesoasoani a le Togiola a Iesu Keriso.”<sup>2</sup>

Ua tatou iloa “o le a faamasinoina i tatou e tusa ai ma mea tatou te fai, o manaoga o o tatou loto, ma ituaiga o tagata ua avea ai i tatou.”<sup>3</sup> Peitai, a tatou taumafai e salamo, o le a avea sili atu lo tatou mama—ma “amuia i latou o e loto mama: aua latou te iloa atu le Atua” (Mataio 5:8).

### Mau Faaopoopo

Salamo 32:2; Iakopo 3:17;  
1 Peteru 2:1-2, 22

#### FAAMATALAGA

- Joseph B. Wirthlin, “Aunoa ma le Pepelo,” *Liahona*, Iulai 1988, 80, 81.
- Dieter F. Uchtdorf, “Sau, Auai Faatasi ma i Matou,” *Liahona*, Nov. 2013, 23.
- Tusitalima 2: Taitatiina o le Ekalesia* (2010), 1.2.1.

Faatuatua, Aiga,  
Toomaga



### Mai Tusitusiga Paia

E le pepelo tamaiti laiti. Na fetalai lesu: “Ina tuu mai ia o tama iti e o mai ia te au; aua le vavao ia te i latou; aua e faapei o i latou nei o e o i le malo o le Atua. . . . Ona siitia lea e ia o [tamaiti] i ona lima, ua faaee foi ona aao i luga ia te i latou, ma faamanuia ia te i latou” (Mareko 10:14,16).

Sa auauna atu foi Keriso i tamaiti i Amerika ina ua mavae Lona Faasatauroga. Sa la poloaina tagata ina ia latou aumai a latou fanau laiti ma “Ua faanonofo i latou i lalo i luga o le eleele faataamilo ia te ia, ma sa tu lesu i le totonugalemu; . . .

“. . . [Ma] sa tutulu o ia, ma sa molimauina e le motu o tagata lenei mea, ma sa ia ave a latou fanau laiti, taitoatas, ma faamanuia i latou, ma tatalo atu i le Tamā mo i latou. . . .

“Ma a o latou vaai atu sa tetepa ae o latou mata e faasaga i le lagi, ma sa latou vaai i agelu ua afifio ifo mai le lagi e peiseai ua i ai i le totonugalemu o se afi; ma sa latou afifio ifo i lalo ma lio faataamilo ia tamaiti laiti, . . . ma sa auauna atu agelu ia te i latou” (3 Nifae 17:12, 21, 24).

# O LE MANA O LE FAATUATUA

Saunia e Amber Barlow Dahl

*Afai e faasaoloto i tatou e le Tama Faalelagi mai o tatou luitau ona sa na ona tatou ole atu i ai, o le a la le tuu maia ia i tatou aafiaga tonu e tatau ai mo lo tatou faaolataga.*

**E**tasi le tausaga i le kolisi, ae ou sueina se suega ma sa amata ona tiga lo'u ua. E lei alu ese le tiga ina ua mavae le luluti o le suega. Sa ou talanoa i fomai ma taulasea ma taumafai ni togafitiga eseese, ae sa faaauau pea le tiga. I le tausaga na sosoo ai, sa ou taumafai ai pea e tauivi ma lenei tiga, sa ou tauivi foi ina ia faateleina lo'u faatuatua. Sa tele lo'u taimi i le tatalo, sa ou suesue i tusitusiga paia, ma sa ou talosagaina ni faamanuiaga faaleperisitua. Sa ou lagonaina, afai e lava lo'u faatuatua, o le a ou manuia.

Sa faamalolo e Iesu Keriso e mamai, o tauaso, o pipili, ma lepela—“e tusa ai ma lo [latou] faatuatua” (Mataio 9:29). Sa ou iloaina na ia te Ia le mana e faamalolo ai a'u e faapei ona sa Ia faia i le anoanoai o isi i le taimi o Lona soifua i le tino. O lea sa tonu ai ia te au, e na o le itiiti lava o lo'u faatuatua o le a ou le manuia ai, o lea sa ou faaluaina ai a'u taumafaiga. A o faaauau a'u fofo, sa ou tatalo ma anapogi ma suesue ma talitonu. Ae sa faaauau pea o'u tiga.

Ua aoao mai i tatou e tusitusiga paia, a i ai le faatuatua e mafai ona tatou faia vavega (tagai Mataio 17:20), ae o lea lava e le o mafai ona ou mapu mai si nei mafatiaga laitiiti. O fea sa i ai le mana o lo'u faatuatua? Mulimuli ane, sa ou talia filemu lo'u tulaga, ma maua auala e onosaia ai lo'u faaletonu, ma

oo ai ina ou malie e faataatia le mala-malama atoatoa i le faatuatua ma le faamalologa mo se taimi oi luma.

I ni tausaga mulimuli ane, sa ma savavali ai ma sa'u uo sa tauivi ma le faafaufau na afua ai ona alu soo i le falemai i le taimi o le afuafua o lona maitaga muamua. Sa manao Erina i se isi pepe, ae sa fefe o ia e toe oo i mafatiaga lava nei sa feagai ma ia i lona maitaga muamua. Fai mai o ia, sa anapogi o ia ma tatalo ina ia matuai talitonu o le a le toe aumaia faalua lena mea ia te ia e le Tama Faalelagi.

A o ma talanoa, sa ou manatua le

mau, “Ia soia, ma ia outou iloa o a'u lava o le Atua” (Salamo 46:10). Sa ou mafauau i lo'u aafiaga i le aoao ai ina ia filemu i le taimi o mafatiaga ma sa ou uunaia Erina ina ia faaaauau ona faatuatua ae aua nei avea lena faatuatua ma mea e faalagolago ai pe faafaufau pe leai i le isi maitaga.

A o faaaauau pea ona ou suesue i le mataupu faavae o le faatuatua, sa ou liliu atu i le aoaoga a Alema e uiga i le faatuatua lea o loo ia aoao mai ai e faapea “afai ua ia te outou le faatuatua ua ia te outou faamoemoe mo mea e le vaaia, a e moni” (Alema 32:21).



## TULAI A'E I LUGA ATU O TOFOTOFOGA

“Pe le o i ai ea se poto i le [Tama Faalelagi] ua tuuina mai ai tofotofoga ia i tatou ina ia mafai ai ona tatou tulai a'e i luga atu, o tiutetauave e mafai ona tatou ausia, o galu-ega e faamalolosi ai o tatou musele, o faanoanoaga foi e tofotofo ai o tatou agaga? Pe tatou te le oo ea i faaososoga e tofotofo ai lo tatou malosi, o ma'i ina ia tatou aoao ai le onosai, o le oti foi ina ia mafai ai ona maua le tino ola pea ma le faamamaluina?

“Afai e faamaloloina ma'i uma o e tatou te talosia, afai e puipuia tagata amiontonu uma ma faaumatia tagata leaga, o le a leai se aoga o le polokalama atoa a le Tama ma o le a faamuta ai foi ma le mataupu faavae o le talalelei, o le filifiliga saoloto. Semanu o le a leai se tagata e ola i le faatuatua.”

Peresitene Spencer W. Kimball (1895–1985), *Aoaoga a Peresitene o le Ekalesia: Spencer W. Kimball* (2006), 16.



I le manatunatu loloto ai i lenei mau, sa ou iloa ai o le faatuatua, e le o le mea lea sa ou manatu ai. O le faatuatua, o loo aoao mai e Alema i tatou, o le faamoemoe lea i mataupu faavae moni. O le i ai o le faatuatua e le faapea tatou te talitonu o le a aumai e lo tatou Tama Faalelagi i taimi uma mea tatou te ole atu ai. O le faatuatua o le a faamalolo e Keriso lo'u ua, po o le avatu ia Erina o se maitaga e le faafaufau ai, e le o se faatuatua lea i mataupu faavae moni. Peitai, e mafai ona tatou faatuatua ia Keriso o loo i ai le mana e faamalolo ai, o loo Ia silafia i tatou, o le a Ia faamalolosia i tatou, ma afai tatou te onosaia lelei, e mafai ona tatou agavaa mo le ola e faavavau.

Na folofola mai e le Alii, "Soo se mea e te ole mai ai i le faatuatua, ma

talitonu o le a e maua e ala i le suafa o Keriso, o le a e mauaina" (Enosa 1:15). Ou te talitonu i le mana o i ai i lenei folafolaga, o loo i ai lea i le fautuaga ia talitonu "i le suafa o Keriso." O le faaupuga o i ai i le Lomifefilo i le Tusi Paia o loo aoao mai ai i tatou: "Tatou tatalo atu i le suafa o Keriso pe afai o o tatou mafaufau o le mafaufau o Keriso, ma o o tatou manaoga o manaoga ia o Keriso,—pe a tumau foi Ana upu ia i tatou (Ioane 15:7). Ona tatou ole atu ai lea mo mea ua sa'o ma o le a mafai e le Atua ona tuuina mai. O ni isi tatalo e lē mafai ona maua mai ni tali ona ua le faia i le suafa o Keriso: ua lē tusa ai ma Lona finagalo ae ua faia ia tatalo i le manatu faapito o le tagata."

A tatou ole atu i se mea ma le faatuatua ma e tusa ai ma le finagalo o le Atua, o le a Ia to mai ia i tatou e tusa

ai ma o tatou manao. E silafia i tatou e le Tama Faalelagi, e alofa ia i tatou, ma e finagalo ia faia mea uma e tatau ai ina ia tatou toe foi atu i Lona afioaga. O nisi foi taimi e aofia ai iina ia tofotofoga, o faafitauli, ma luitau (tagai 1 Peteru 1:7). Afaia e faasaoloto i tatou e le Tama Faalelagi mai o tatou luitau ona sa na ona tatou ole atu i ai, o le a Ia le tuu maia ia i tatou aafiaga tonu e tatau ai mo lo tatou faaolataga. E tatau ona tatou aoao ia faatuatua le fuafuaga a le Atua mo i tatou ma gauai atu o tatou loto i Lona finagalo. A tatou faaogatasia o tatou manaoga ma Lona finagalo, ma faaalia lo tatou faalagolago atoatoa ia te Ia, e mafai ona tatou agavaa mo le mauaina o "le iuga o [lo tatou] faatuatua, o le faaolaina lea o [o tatou] agaga" (1 Peteru 1:9). ■  
*E alaala le tusitala i Oregon, ISA.*

## AFIAFI FAALEAIGA— E MAFAI ONA E FAIA!

*Po o a lava foliga o lou aiga, e mafai e afiafi faaleaiga ona faamanuia ma faamalosia ai oe.*

**E**oo atu se tama i le fale ua vaivai mai se aso umi sa faigaluega ai, ma maua atu le isi vaega o le aiga o tauivi mai foi ma lagona le lelei faapena. O le po o le Aso Gafua, ma ua foliga mai ai ua le mafai ona fai se afiafi faaleaiga. A uma ona faia se tatalo mo se fesoasoani, ona tonu ai lea i le tama ma le tina e faafraigofie. La te faapoto-poto faatasi lo latou aiga, usu se pese, ma tatalo faatasi. La te tuuina atu se moligao i tagata taitasi e tutu a o latou faamatalaina se mea na musuia ai i latou talu ai nei. I se potu pogisa, e suitulaga ai e moligao le musumusuga ma taulai mai ai le fanau. A o faasoa ia molimau, ua ulufale mai se lagona manaia o le filemu ma le alofa. E faai le po o le aiga ma le lotofaafetai ona sa fai le latou afiafi faaleaiga.

Pe na e iloaina ua 100 tausaga o le poloklama o afiafi faaleaiga a le Ekalesia? Ia Aperila 1915, na faatunuina ai e le Au Peresitene Sili ia le au paia e faataatia ese se po se tasi i vайасо taitasi mo tatalo faaleaiga, musika, aoaoga o le talalelei, tala, ma gaoioiga. (Tagai i le itulau e 80 mo se vaega mai le tusi a le Au Peresitene Sili.) O loo faaaauau pea ona faamanatu mai ia i tatou e perofeta le taua o afiafi faaleaiga. “E le mafai ona tatou

lafoaia lenei poloklama musuia-mai le lagi,” na saunoa ai Peresitene Thomas S. Monson. “E aumaia ai le tuputupu ae faaleagaga i tagata tai-toatasi o le aiga, e fesoasoani ai ia te ia e faafetaiaia faaosoosoga ia ua soo se vaipanoa o i ai.”<sup>1</sup>

O ni uiga faaalia nei e teuloto a o e faia le afiafi faaleaiga o se vaega o lou vайасо.

*E faatatau ia te au.* “O afiafi faaleaiga e mo tagata uma.” o le saunoaga lea a Elder L. Tom Perry o le Korama a Aposetolo e Toasefululu.<sup>2</sup> O i tatou uma—faaipoipo pe nofofua, pe i ai se fanau pe leai—e mafai ona tuuto se taimi e faamalolosia ai aiga ma aoao le talalelei.

*E mafai ona ou maua se taimi.* Ua faatulaga e le Ekalesia le faataitaiga e ala i le faaavanoaina o po o Aso Gafua mai gaoioiga faale-Ekalesia. E mafai ona e faaali atu i le Alii ma lou aiga, e te naunau e tuu se taimi mo mea e sili ona taua.

*E mafai ona ou iloa mea e fetaui mo lo'u aiga.* Afai e nonofo valavalou aiga, taumafai e fai se “afiafi faaleaiga i le initonet” e talanoa ai ma tagata o le aiga pe talanoa foi i luga o le telefoni. Pe i ai se tasi e tuai ona manava mai? Fai se “afiafi faaleaiga”

i tafatatafa o le falefaigaluega i le taimi o se malologa. Sa faia e se tama ua tetea ma lona toalua se “afiafi faaleaiga” i afiafi o Aso Gafua taitasi, e tusi ai tusi i lana fanau sa mamao le mea e nonofo ai.<sup>3</sup> Ia avea faalavefau ma sosia o fatufatuga sili atu.

*E mafai ona ou amata i le vайасо nei.* E mafai ona faatulaga afiafi faaleaiga e tusa ai ma manaoga ma tulaga o lou aiga. O ni nai fautuaga masani nei:

- Amata ma faai i se tatalo.
- Faaaoga musika, e aofia viiga ma pese Peraimeri.
- Aoao mai tusitusiga paia ma perofeta o onaponei.
- Faaaofia ai ni gaoioiga faaletino eseese, galuega fesoasoani, ma gaoioiga e taulai i le talalelei mai lea vайасо i lea vайасо.
- Ia fai ma mea fiafia! Fai se taalogia pe fai nai meaai mama.
- Ia faifai pea. Afai e le mafai ona e faia i le Aso Gafua, vaai se isi aso e fetaui lelei.

*Ou te manao i faamanuia.* Ua folafola mai e perofeta afai tatou te auai i le faatinoina o afiafi faaleaiga, o le a tulai mai faamanuia sili:



O le a faateleina le alofa ma le usiusitai i le aiga. O le a atiina ae le faatuatua i loto o le autalavou. “O le a maua e [aiga] le mana e tetee atu ai i faatosinaga leaga ma faaososoga” o loo siomia ai i latou.<sup>4</sup>

E ui o le a le atoatoa ni aafifaga o au afiafi faaleaiga i taimi uma, ae o le a faamalolosia lou aiga ma faamanuiaina i au taumafaiga. “O afiafi faaleaiga taitasi, e i ai lava sana faatosinaga i o tatou agaga e pei o se tosi a le pulumu i se atatusi,” na aoao mai ai Elder David A. Bednar, o le Korama a Apostolo e Toasefululua. “E leai se isi mea e mafai ona tulai mai e

sili ona mata’ina pe manatua pea. Ae pei ona . . . galalue faatasi tosi o le vali ma maua mai ai se galuega taulima mata’ina, e faapena foi i lo tatou faia pea lava pea o mea iti, e mafai ai ona tau atu i taunuuga maoae faaleagaga.”<sup>5</sup> ■

#### FAAMATALAGA

1. Thomas S. Monson, “Upumoni Tumau mo Taimi Fesuisuiuai,” *Liahona*, Me 2005, 19.
2. L. Tom Perry, “O Le Mea Lea Sa Aoaoina ai Au,” *Ensign*, May 1994, 38.
3. “Afiafi Faaleaiga: Soo se Tele, Soo se Tulaga,” *Ensign*, Dec. 2001, 42.
4. I le James R. Clark, comp., *Messages of the First Presidency of The Church of Jesus Christ of Latter-day Saints*, 6 vols., (1965–75) 4:339.
5. David A. Bednar, “Ia Matua Maelega ma Popole i le Aiga,” *Liahona*, Nov. 2009, 20.

#### AVE I AI LE FAAMUAMUA

“Matou te fautua atu i matua ma fanau ina ia tuu atu le faamuamua aupito maualuga i tatalo faaleaiga, afiafi faaleaiga, suesuega ma aoaoga i le talalelei, ma gaoioiga lelei faaleaiga. “Po o le a lava le taua ma le talafeagai o isi mea po o gaoioiga, e le tatau ona faatagaina e suitulaga i tiute ua faatonuina mai e le Atua, ia e na o matua ma aiga e mafai ona faialelei ai.”

**Tusi a le Au Peresitene Sili, 11 Feb. 1999.**

# UA TOETU O IA

O se faatuatua e le maluelue ia Keriso o le manaoga aupito taua lea o le lalolagi i le taimi nei.



**Saunia e Peresitene  
Tavita O. MaKei  
(1873–1970)**

Peresitene Lona Iva o le Ekalesia

*Na soifua mai Tavita O. MaKei i le aso 8 Setema, 1873. Sa faauuina o ia o se Aposetolo i le aso 9 Aperila, 1906 i le 32 o ona tausaga, ma o le aso 9 Aperila, 1951, sa lagolagoina ai o ia e avea ma Peresitene lona iva o le Ekalesia. O se vaega lea o sana saunoaga na i le konafesi aoao ia Aperila 1966. Mo le saunoaga atoa, tagai i le Lipoti o le Konafesi, Ape. 1966, 55–59.*

A fai o se vavega o se mea e le afea i tulafono o le natura, ma e le oo i ai se silafia o le tagata, o lona uiga la o le Toetu o Iesu Keriso o se vavega aupito maoae lea ua tulai mai. Ua faaalia ai le silisilise o le Atua ma le tino ola peoa o le tagata.

Peitai, o le toetu o se vavega i le na ona faapea e le oo i ai le silafia ma le malamalamo o le tagata. Ia i latou o e taliaina o se mea moni, ua na o se faaaliga o se tulafono masani o le olaga. . . .

## O LE KERISO SOIFUA

Faitau le molimau ia Iesu Keriso na tuuina mai e aposetolo ma perofeta o ona po nei o i le *Liahona*, Ape. 2000, 2–3.

Ua faatuina o se mea moni faapea na avea'e e le Keriso lona tino ma ua faamamaluina, o se tagata toetu ma ua tali ai le fesili ua autausaga: "Pe afai e oti le tagata, pe toe ola mai ea o ia?" Iopu 14:14).

## O Molimau o le Toetu

O le Toetu moni mai o Keriso mai le tuugamau o se mea moni lea i soosaa iloaina moni o ia. Sa matua leai se masalosalo i o latou mafaufau. O i latou o molimau o le mea moni; sa latou iloa aua sa vaai i ai o latou mata, sa faalogo i ai o latou taliga, sa tagotago i ai o latou lima i lona tino mai, o le Togiola ua toetu.

Fai mai Peteru, le Aposetolo sinia, i le taimi na fono ai le toasifulutasi e filifili se tasi e suitulaga ia Iuta le Sekara, "O lea e tatau ona fai ma molimau faatasi ma i matou nei, i lona toetu . . . se tasi o ia tagata" (Galuega 1:21–22). . . .

I se tasi taimi na tautino atu ai e Peteru i luma o o latou fili, o tagata lava na faasatauroina Iesu i luga o le satauro: "Sema e, o outou Israaelu e; . . . o Iesu lava lena ua tofaatuina a le Atua; o molimau matou uma i lena mea" (Galuega 2:22, 32). . . .

## O Molimau Faaopoopo

O le Ekalesia a Iesu Keriso o le Au Paia o Aso e Gata Ai, faatasi ai ma Peteru, ma Paulo, ma Iakopo, ma

isi uluai Aposetolo uma sa taliaina le Toetu, e le gata ina moni a'ia'i, ae o le tauauluga foi o le misiona paia a Keriso i le fogaeleele.

E afe valuselau tausaga ina ua mavae le maliu o Iesu i luga o le satauro, sa tautino mai ai e le Perofeta o Iosefa Samita na afio atu ia te ia le Alii toetu ma faapea mai, "Sa ou vaaia ni Tagata e toalua, o lo laua pupula ma le mamalu e le mafaamatatalaina, o tutu mai i o'u luga ae i le ea. Sa fetalai mai le tasi o i laua ia te au, ma fofoga mai ia te au i lou igoa ma fetalai mai, ao tusi ane i le tasi—*O Lou Atalii Pele lenei. Faalogo ia te Ia!*" (Iosefa Samita—Talafaasolopito 1:17). . . .

Pe ana fai e na o le molimau a Iosefa Samita, o le a pei lava, ona fetalai Keriso e uiga i Lana molimau ina ua ia fetalai e uiga ia te Ia lava, e le aoga; peitai na i ai ia Iesu le molimau a le Atua ma le Au Aposetolo. Ma sa i ai isi molimau a Iosefa Samita [o e] na faamaonia [lana] molimau, lea mea moni lea na faalauiloa e ala i le afio ane i ai o le agelu o Moronae. . . .

. . . O loo folafola foi e le Ekalesia a Iesu Keriso o le Au Paia o Aso e Gata Ai le faaaliga mamalu na vaaia e le Perofeta o Iosefa Samita:

"O lenei, ina ua uma ona faia molimau e tele e uiga ia te ia, o le molimau tupito mulimuli lenei o mau uma lava, ma te faia ia te ia: O loo soifua o ia!" (MF&F 76:22). . . .



Manatu i molimau e le fesiligia na tuuina mai e Aposetolo anamua—o molimau na faamaumauina i ni nai tausaga ina ua mavae le toetu—manatu i le faaaliga vaiai maoae o le Keriso Soifua i lenei vaitau, e foliga mai e faigata ona malamalama pe mafai faapefea e tagata ona saga teena o Ia ma mafai ona masalosalo e uiga i le tino ola pea o le tagata.

### O Mea Tatou Te Manaomia Nei

O se faatuatua e le maluelue ia Keriso o le manaoga aupito taua

lea o i le lalolagi i le taimi nei. Ua le na o se lagona. O le mana lea e agai atu ai ina faatino, ma e tatau ona i ai o se faavae aupito sili o malosiaga faaosofia uma. . . .

Afai tau lava ina “faia o Lona finagalo” e tagata, nai lo le taulai atu ma le leai o se faamoemoe i le oti, o le a liliu atu o latou mata i le lagi ma iloa ai ua toetu Keriso! . . .

Ua folafola atu e le Ekalesia a Iesu Keriso o le Au Paia o Aso e Gata Ai i le lalolagi uma, o Keriso o le Alo o le Atua, le Togiola a le lalolagi! E leai

se soo moni e faamalieina i le na o le taliaina o Ia o se sa toefaatulagaina, o le faiaoga lelei, po o le tagata atoatoa e toatas. O Le Tagata o Kalilaia e—le o se faatusa, ae *moni*—o le Alo o le Atua soifua. . . .

### Ua Toefanaufouina Moni

E leai se tasi e mafai ona faia ma le loto se faaiuga e faaaoga i lona olaga i aso taitasi ia aoaoga a Iesu o Nasareta e aunoa ma lona lagolina o se suiga i lona tagata atoa. O le fuaitau “toefanaufouina” e loloto atu lona taua nai lo mea o loo faapipii i ai e le toatele. . . . E fafia le tagata na te lagonaina moni le mana siitia, o le toefaafo lea e maua mai i lona latalata i le Faaola, i le sootaga vavalalata ma le Keriso soifua. Ou te faafetai ua ou iloa o Keriso o lo’u Togiola. . . .

O le savali o le Toetu . . . o le feau aupito faamafanafana, ma mamalu ua tuuina mai i le tagata, aua afai e aveese e le oti se e pele ia i tatou, e faamafanafanaina o tatou loto mafatia i le faamoemoe ma le faamautinoaga faaleatua i upu: “*E le o iinei o Ia; ua toetu!*” [tagai Mataio 28:6; Mareko 16:6].

Ou te iloa ma lo’u agaga atoa ua faatoilaloina le oti e Iesu Keriso, ma talu ai o loo soifua lo tatou Togiola, o le a faapea foi ona tatou ola. ■

*Ua fesuiai soaautu: ua faaonaponei ia mataitusi tetele ma faailoga.*

# O LE FAATOSINAGA FAALEAGAGA A

*“Matou te valaaau atu i tamaitai o le Ekalesia ina ia tutu faatasi mo le amiotonu. Ua ou vaiaia lenei mea o se tasi o faamoemoe susulu i [le] lalolagi.”*—Peresitene Gordon B. Hinckley (1910–2008)



# TAMAITAI



*Pe o tatou iloaina le mamana o o tatou malosi faaleagaga?*

**Saunia e Starla Awerkamp Butler**

toatele tamaitai lelei, lotomaualalo i le Ekalesia ua tuuina atu se auaunaga tuuto e aunoa ma le iloaina le aafiaga o'oo'o o o latou olaga—o ni faataitaiga o le auaunaga i la le tino, ae faapena foi ona avea o ni measina o le malosi faaleagaga. O se tasi o tamaitai faapena o lo'u tinamatua o Cherie Petersen. Sa tautua faamaoni o ia i valaauga le leoa i lona olaga atoa. A e fesili atu ia te ia, o lana lava tali e le ni ana taleni e ofo atu i le lalolagi. Peitai, ina ua amata ona ou aoao e uiga i lona soifua, sa ou iloa ai le tele o lona malosi faaleagaga na aafia ai lo'u olaga.

Na le toe o matua o Cherie i le lotu ma sa tete'a i la'ua a o itiiti lava o ia, o lea na ola a'e ai o ia i se tina, o Felolina, o le sa faigaluega i taimi uma. O Felolina foi ia sa sili atu ona tuulafoaina a o teineitiiti, a o ola a'e i se aoga nofotumau, i le taimi lea sa ola ai lona tina, o Siota i se olaga faasalemausau. Ae ui i luitau i lona tuputupu ae, sa tumau pea ona toaga Cherie i le talalelei, ma auai atu i le lotu ma le aiga o le tina o lona tinamatua, po o ni uo. Sa ia vaiaia i o latou aiga le mea sa ia manao ai mo sona lava aiga. Na te lei iloaina pe o le a le mea e tatau ona i ai, ma sa naunau o ia ina ia ese lona aiga i le lumanaia.

Na ta'u mai i se taimi ia te au e le toalua o Cherie—lo'u tamamatua o Dell—“Ina ia i ai se molimau, e tatau lava ona e manao i ai. Sa manao lava Cherie i taimi uma i se molimau.” E ui ina sa faatumulua uluai tausaga o la la'ua faaipoipoga i tauiviga, ae sa la naunau lava ina ia tumau malolosi o se aiga. Sa lei malolosi i laua i le tausaga muamua o la la'ua faaipoipoga ona o le galuega a Dell, peitai o se valaauga e galue i le Peraimeri na uunaia ai Cherie e amata ona alu, ma e lei pine ae la o faatasi ma Dell i le lotu, o se faufautua o le korama a tiakono. Na amata mai lena taimi ona la toaaga ma malolosi i le Ekalesia. O le naunautaiga o Cherie e auauna atu ma le pulunaunau e atiae se aiga malosi, na fesoasoani lea i lo'u tina

ia avea ma se tamaitai malosi ua i ai nei, ma ua fesoasoani le faataitaiga a lo'u tina e faamatala ai lo'u olaga aemaise ai o lea ua amata nei lo'u lava aiga.

O le avea ai ma tamaitai, e mafai ona i ai la tatou faatosinaga maoae faaleagaga i olaga o i latou o loo siomia ai i tatou. Ioe, sa aoao mai Iosefa Samita e faapea o la tatou matafaioi e “le gata ina laveaiina e matitiva, ae faaolaina foi o latou agaga.”<sup>1</sup> Ua valaauiina e Iesu Keriso ia tamaitai o Lana Ekalesia ia avea ma Ona soo ma ia malolosi faaleagaga. E taua tele lo tatou malosi ma faatosinaga faaleagaga i le alualu i luma o le galuega o le faaolataga, ma e tatau ona tatou sailia avanoa e faamalolosia ai faaleagaga i latou o loo siomia ai i tatou. A tatou faia lena mea, o le a tumau le faatosinaga o lo tatou faatuatua ma le amiontonu i luga atu o mea e mafai ona tatou vaaia.

### Valaauiina e Avea ma Soo

Na tusia e Elder James E. Talmage (1862–1933) o le Korama a Apostolo e Toasefululu, “O le lagolago silisili i le lalolagi o tamaitai ma le tulaga faatamaitai o Iesu le Keriso.”<sup>2</sup> Mafaufau, mo se faataitaiga i le mea sa Ia aoao mai e uiga i soo tamaitai e toalua i le Feagaiga Fou, le auuso o Maria ma Maretia. I le tusi *O Afafine i Lo'u Malo* o loo faamatala mai ai: “Luka 10 o loo i ai se tala ia Maretia na tatalaina atu lona fale ia Iesu. Sa ia tautuaina le Alii e ala i le saunia o mea sa manaomia i la le tino, ae sa nofo ifo Maria i aao o le Matai ma gauai atu ma le toto'a i Ana aoaoga.

“I se vaitau sa masani lava o fafine e na o le tautua faaletino latou te tuuina atu, na aoao ai e le Faaola ia Maretia ma Maria e mafai foi e fafine ona auai faaleagaga i Lana galuega. Sa Ia valaaulia i laua e avea ma Ona soo ma tau-mamafa ai i le faaolataga, ‘lea mea lelei’ [Luka 10:42] e le aveeseina mai ia te i laua.”<sup>3</sup>

E faapei foi o Maretia, o nisi taimi tatou te faia ai le mea sese o le mafaufau faapea o le uluai matafaioi lava a tamaitai o le tautua faaletino, e pei o le saunia o meaai, suisui, ma faamama mo isi. O lea tautua o se osigataulaga e pele ma taua; peitai, e sili atu nai Lona manaomia o tuafafine



Augatupulaga lona fa: Elisapeta (tauagavale), o loo taulima le tamateine a lana tama, o Felolina. Annie (ogatotonu) na o mai i luta ma ona matua, ma o ia o le tina o Elisapeta. Siota (taumatau) o le tamateine a Elisapeta, ae na tuua e Siota ma lana tamateine o Felolina le Ekalesia. O Elisapeta faatuatua lea na fesoasoani i le tama a le tama a lana tamateine o Cherie ma na toe foi mai le fanau a Cherie i le talalelei.

e mafai ona suisui ma kuka, e manaomia foi e le Alii ia tamaitai o i ai le mana faaleagaga, o e susulu atu i o latou olaga le faatuatua, amiontonu, ma le alofa mama. Ua Ia silafia e tofu i tatou ma le mau mea e ofoina atu. Ua valaauiina e Iesu Keriso i tatou *uma* e atinaae lo tatou malosi faaleagaga ma tomai e talia ai ma faatino ia faaaliga e fesoasoani ai e tulei i luma Lana galuega. Na saunoa Linda K. Burton, le pereseteaoao o le Aualofa i tamaitai, “Ua auina mai outou i le lalolagi i lenei tisipenisione o taimi ona o tagata ua avea ai outou ma mea ua e saunia e fai! E tusa lava po o a mea o le a taumafai Satani e faatauanau ai i tatou e mafaufau i ai po o ai i tatou, o lo tatou faasnomaga moni lava o i tatou o soo o Iesu Keriso!”<sup>4</sup>


Ua silafia e le Alii i tatou ma o tatou tulaga, ma e i ai Sana galuega mo i tatou taitoatasi e faia i lenei

lalolagi. E leai se uso e papa'u sona iloa pe itiiti foi ni taleni e avea ai o se malosiaga faaleagaga mo le lelei ma aumaia ai isi ia Keriso. O le i ai o lea gafatia paia, ua i ai ia i tatou le tiutetauave e avea ai ma taitai faaleagaga i o tatou aiga ma nuu. Na fofogaina mai e Elder M. Russell Ballard o le Korama a Apostolo e Toasefululu, “o tuafafine uma i lenei Ekalesia, o e ua osi feagaiga ma le Alii, ua ia te i latou se faatagaga paia e fesoasoani ai i le laveaiina o agaga, e taitai tamaitai o le lalolagi, e faamalolosia aiga o Siona, ma fausia le malo o le Atua.”<sup>5</sup>

Tatou te le tau i ai i ni tofiga maualuluga pe faia foi ni mea uiga ese e fesoasoani ai ia i latou o siomia ai i tatou ia faia filifiliga e faalatalata atu ai i latou ia Iesu Keriso—o lo tatou tiute aupito sili ona taua. O mea aupito tetele ma aupito itiiti tatou te faia i olaga o le tagata e toatasi pe toalua foi, e tusa lava foi pe o totolu lava o o tatou aiga, e mafai ona i ai se aafiaga maoae.

### O Tamaitai i le Galuega o le Faaolataga

O loo ta'ua i se viiga lauiloa, “O le galuega a agelu lava; Ua tuuina mai ia i tatou nei.”<sup>6</sup> E tele naua mea e mafai ona tatou ofo atu i olaga o i latou tatou te alolofa i ai. Na




faamatala mai e Elder Richard G. Scott o le Korama a Aposetolo e Toasefululua ni tala i ni tamaitai se toalua na aafia ai lona olaga ona o lo la'ua malosi faaleagaga:

"A o o'u laitiiti, sa le i avea lou tama ma se tagata o le Ekalesia ma sa oo ai ina le toaga lo'u tina. . . . I nai masina ina ua mavae le atoaga o lou valu tausaga, sa sau ai Tinamatua Whittle mai le isi itu o le atunuu e asi i matou. Sa popole Tinamatua i le le papatisoina o au faapea foi ma lou uso matua. Ou te le iloa le mea na ia tau atu i ou matua e uiga i lenei mea, ae ou te iloa i se tasi taeao sa ia ave ai i ma'ua ma lo'u uso i le paka ma faasoaa mai ai ona lagona e uiga i le taua o le papatisoina ma le auai soo i sauniga a le Ekalesia. Ou te lē manatua auiililiga o mea sa ia tau mai, ae o ana upu sa gaepuina ai se mea i lou loto, ma e le i umi ae papatisoina i ma'ua ma lo'u uso. . . .

*"Na aoao e le  
Faaola ia Maretia  
ma Maria e mafai  
e tamaitai ona  
auai i le faatinoga  
faaleagaga o Lana  
galuega. Na Ia vala-  
aulia i la'ua e avea  
ma Ona soo ma tofo  
i le faaolataga."*

"Sa faaaoga e Tinamatua le aofaiga talafeagai o le lototele ma le faaaloalo e fesoasoani ai i lo ma tama ina ia iloa le taua o lona aveina o i maua i le lotu mo a ma sauniga. I soo se auala talafeagai, sa ia fesoasoani ai ia i maua ia lagona se manaomia mo le talalelei i o maua olaga."<sup>7</sup>

O se punavai lona lua o le malosi faaleagaga o le faletua lea o Elder Scott, o Jeanene. I le taimi a o tafafao faamasani i laua, sa amata ona la talatalanoa e uiga i le lumana. Sa folasia e Jeanene, o le sa ola ae i se aiga faafaifeatalai malosi, lona manao e faaipoipo i se faifeatalai ua maea le misiona, i le malumalu. Sa malosi le aafiaga o Elder Scott, o le sa lei mafau-fau tele muamua e alu e faamisiona. "Sa ou alu i le fale, ma sa le mafai ona ou mafau-fau i se isi mea. Sa ou ala i le po atoa. . . . Ina ua mavae le tele o tatalo, sa ou faia le faaiuga e vaai lo'u epikopo ma



amata la'u talosaga e avea ma faifeautalai.”<sup>8</sup> E ui lava ina sa tuuina atu ia te ia e Jeanene le taiala ma le uunaiga sa ia manaomia, ae fai mai Elder Scott, “E lei fesili mai lava Jeanene ia te au e fai se misiona *ona o ia*. Sa lava lona alofa ia te au e faasoa mai ai lona talitonuga maumaututu ma tuuina mai ia te au le avanoa e filifili ai le itu e agai ai lo'u lava olaga. Sa ma tau fai auauna atu uma i ni misiona ma mulimuli ane ai faamauina i le malumalu. O le lototele o Jeanene ma le tuuto i lona faatuatua na faia uma ai se eseesege i o maua olaga faatasi. Ou te mautinoa semanu ma te lē maua lava le fiafia lea ua ma olioli ai nei pe ana le seanoa ma lona faatuatua malosi i le matapu faavae o le auauna atu muamua i le Alii. O ia o se faataitaiga matagofie, ma le amiontonu!”<sup>9</sup>

O le faatosinaga faaleagaga a nei tamaitai agelu i lona olaga sa fesoasoani ai i se alii talavou e toatasī—Elder Scott—e faia nisi

*O loo ta'ua i se viiga lauiloa, “O le galu-ega a agelu lava; Ua tuuina mai ia i tatou nei.” E tele nua mea tatou te ofoina atu ia i latou tatou te alolofa i ai.*

o faaiuga aupito taua i lona soifua: ia papatiso, ia faamisiona, ma ia faaipoipo i le malumalu.

E mafai ona tatou fesoasoani i isi ia mananao e faia ni filifliga lelei e ala i a tatou faataitaiga, taga e fai, upu, ma le amiontonu faaletagata lava ia. Na saunoa Sister Carole M. Stephens, fesoasoani muamua i le au peresitene aoao o le Aualofa, “O i tatou o ni afafine o le feagaiga i le malo o le Alii, ma ua tatou maua le avanoa e avea ai ma ni meafaigaluega i Ona aao. . . . Tatou auai i le galuega o le faaolataga i aso taitasi i auala itiiti ma faigofie—featausiai, faamalolosia, ma aoao e le tasi le isi.”<sup>10</sup> A tatou faalagolago i le Agaga ma fetuleni atu i luma ma taumafaiga faamaoni mai le loto ma le agamaualalo e fesoasoani ai ia i latou o loo siomia i tatou, ina ia latalata atili ia Keriso, o le a taialaina i tatou i mea e mafai ona tatou faia ma tuuina mai le malosi e faia ai, ma o le a tatou lagonaina le olioli i le aumaia o fanau a le Alii ia te Ia.

## Avea ai o se Faatosinaga Faaleagaga

O le iloa ai o lo tatou tiutetauave, tatou te ono fesili ai e faapei o soo anamua, "O le a se mea tatou te fai" (Galuega 2:37) ia avea ai o se faatosinaga faaleagaga? I se konafesi aoao talu ai nei, sa valaaulia ai e Sister Burton ia tamaitai e mafaufau "i nisi o faailoga faigofie faaleagaga o le 'manaomia le fesoasoani' e faatatau i le galuega o le faaolataga:

- Manaomia le fesoasoani: mo matua ia tausia ae a latou fanau i le malamalamā ma le upumoni
- Manaomia le fesoasoani: mo afafine . . . , tamaitai . . . , uso o tina, tuafafine o tama . . . , tausoga, tina ma tama matutua, ma uo moni e galulue o ni faufautua ma ofo atu lima fesoasoani i luga o le ala o feagaiga
- Manaomia le fesoasoani: mo i latou o e faalogo i musumusuga a le Agaga Paia ma faatinoina uunaiga e maua
- Manaomia le fesoasoani: o i latou o e ola i le talalelei i aso taitasi i nai ala iti ma le faigofie
- Manaomia le fesoasoani: le au galulue i talafaasolopito o aiga ma le malumalu ina ia soofaatasai ai aiga e faavavau
- Manaomia le fesoasoani: mo faifeautalai ma tagata o le au paia e faasalalau atu le 'tala fiafia'—o le talalelei a Iesu Keriso
- Manaomia le fesoasoani: au laveai e sailia i latou ua leiloa lo latou ala
- Manaomia le fesoasoani: mo e tausi feagaiga ia tutu mausali mo le upumoni ma le mea sa'o
- Manaomia le fesoasoani: mo soo moni o le Alii o Iesu Keriso."<sup>11</sup>

E le o ni mea fou nei mea, ae a tatou sailia avanoa e auai ai i le faatinoga o le galuega o le faaolataga, o le a faaleleia o tatou tomai e fesoasoani ai ia i latou o siomiaina i tatou. Na saunoa Elder Ballard, "E leai se isi lava mea i le lalolagi e sili ona patino, sili ona faamalosiauina, pe sili ona suia ai olaga e pei o faatosinaga a se tamaitai amiontonu."<sup>12</sup> A tatou atinaeina lo tatou mana faaleagaga e ala i le tatalo a le tagata lava ia ma le suesue i tusitusiga paia, usitai ma le maua'i, ma tausia ma le faamaoni a tatou feagaiga, o le a avea i tatou ma lena faatosinaga.

## I Talaatu o Mea e Mafai ona Tatou Vaaia

Na saunoa Peresitene Polika Iaga (1801–1877), "Mata e mafai ona e iloa le aofai o mea lelei e gafataulimaina

e tina ma afafine o Isaraelu ona fai? Leai, e le mafai. Ma o mea lelei o le a latou faia o le a mulimuli atu ia i latou i le faavavau atoa."<sup>13</sup>

O faaiuga amiontonu a lo'u tinamatua ua aafia ai augatupulaga o ona aiga, ua silia ma le mea na mafai ona ia vaai i ai ao tamaitai talavou. Peitai, o le faatosinaga faaleagaga a tamaitai i lo'u aiga ua sili mamao atu i tua le mea ua oo i ai. Na maua e Cherie lona lava malosi faaleagaga mai le mataituina o le tina o le tinamatua o lona tina (o lo'u tinamatua lona tolu) o Elisapeta. O le faataitaiga a Elisapeta o le faatuatua ma le molimau na pasia augatupulaga e lua o le le toe toaaga mai, e fesoasoani ai i le tamateine a le tama a lana tama, o Cherie e suia se aga o aiga malepelepe ae toe foi mai i le Ekalesia.

A oo ina avea i tatou o se malosi faaleagaga ia i latou o loo siomia ai i tatou, o le a oo atu la tatou faatosinaga i talaatu o mea e mafai ona tatou vaaia. Na saunoa Peresitene Gordon B. Hinckley (1910–2008), "Matou te valaau atu i tamaitai o le Ekalesia ina ia tutu faatasi mo le amiontonu. E tatau ona latou amata i totonu o o latou lava aiga. E mafai ona latou aoaoina atu i totonu o a latou vasega. E mafai ona latou faaleoina atu i totonu o o latou nuu. . . .

"Ua ou vaaia lenei mea o se tasi o faamoemoe susulu i se lalolagi ua savavali atu i lona faafanoga."<sup>14</sup>

A tatou faataunuuina lenei poloaiga, o le a tele'a'i i luma le galuega a le Alii e le gata i le lalolagi o loo siomia ai i tatou, ae aupito sili ona taua, i o tatou aiga ma olaga o i latou tatou te alolofia i ai. ■

*E alaala le tusitala i Iuta, ISA.*

## FAAMATALAGA

1. *Aoaoga a Peresitene o le Ekalesia: Iosefa Samita* (2007), 482.
2. James E. Talmage, *Jesus the Christ*, lomiga lona 3 (1916), 475.
3. *O Afafine i Lo'u Malo: O Le Talafaasolopito ma le Galuega a le Aualofa* (2011), 4.
4. Linda K. Burton, "Manaomia: Lima ma Loto e Faanatinati le Galuega," *Liahona*, Me 2014, 122–123.
5. M. Russell Ballard, "O Tamaitai o le Amiontonu," *Liahona*, Tes. 2002, 39.
6. "Galulue E Pei o Ni Uso i Siona," *Viiga*, nu. 196.
7. Richard G. Scott, "Ua Ou Avatu le Faaaoao ia te Outou," *Liahona*, Me 2014, 32.
8. Richard G. Scott, "Ua Ou Avatu le Faaaoao ia te Outou," *Liahona*, Me 2014, 33.
9. Richard G. Scott, "Ua Ou Avatu le Faaaoao ia te Outou," *Liahona*, Me 2014, 33.
10. Carole M. Stephens, "E I Ai se Mafuaaga Sili mo i Tatou e Olioli Ai," *Liahona*, Nov. 2013, 117.
11. Linda K. Burton, "Manaomia: Lima ma Loto e Faanatinati le Galuega," 124.
12. M. Russell Ballard, "Tina ma Fanau Teine," *Liahona*, Me 2010, 18–21.
13. *Discourses of Brigham Young*, sel. John A. Widtsoe (1954), (1954), 216.
14. Gordon B. Hinckley, "Standing Strong and Immovable," Worldwide Leadership Training Meeting, Jan. 10, 2004, 20.

# E LEO SE AGASALA LE AGAVAI VAI

Saunia e Wendy Ulrich

**P**e ua ou agavaa moni ea e ulu atu i le maota o le Atua? E mafai faapefa pe afai ou te le atoatoa?"

"Mata e mafai moni e le Atua ona avea o'u vaivaiga ma se malosiaga? Sa ou anapogi ma tatalo mo le tele o aso ina ia aveese atu lenei faafitauli mai ia te au, ae foliga mai e leai lava se mea o suia."

"I le misiona, sa sili atu ona ou ola pea lava pea i le talalelei nai lo se isi lava taimi i lo'u olaga, ae e leai foi se taimi na sili ai ona ou iloa o'u vaivaiga. Aisea, ae o lea sa ou matuai lelei lava, na ou lagonaina ai i nisi taimi le faaletonu?"

A tatou mafaufau loloto i fesili faapea, e taua tele le malamalama e faapea, e ui o le *agasala* e taitaiese ai i tatou mai le Atua, ae o *vaivaiga*, i se isi itu e mafai ona taitai atu ai i tatou ia te Ia.

## Eseesega o le Agasala ma Vaivaiga

E masani ona tatou mafaufau i le agasala ma vaivaiga ua na o ni pisia eseese i o tatou agaga. Ae ua ta'u mai e tusitusiga paia e faapea o le agasala ma vaivaiga e afua eseese mai, e eseese vai-fofo e manaomia ai, ma e i ai le gafatia e gafoa mai ai taunuuga eseese.

O le toatele o i tatou ua masani tele i le agasala nai lo le tatou manatu e tau-tino, ae sei o tatou iloiloina: O le agasala o se filifiliga e le usitai i poloaiga a le Atua pe teena i le Malamalama o Keriso o i totonu ia i tatou. O le agasala o se

filifiliga e faatuatuaina ia Satani ae le o le Atua, ma avea ai i tatou ma fili i lo tatou Tama. E le pei o i tatou, o Iesu Keriso sa matuai leai se agasala ma sa mafai ona togiolaina mo a tatou agasala. A tatou salamo ma le faamaoni—e aofia ai le suia o o tatou mafaufau, loto, ma amioga; tuuina atu faatoesega talafeagai pe ta'uta'u

*O le le gafataulimaina ma ni  
le agatonu e le o ni agasala ma  
e le taofia ai i tatou mai  
le mama ma agavaa mo le  
mafutaga ma le Agaga.*





**E ui ina taitaiese mai mai le  
Atua e le agasala, o vaivaiga,  
i le isi itu e mafai ona taitai  
atu ai i tatou ia te la.**



atu foi; faaleleia mea e tatau ai; ma le toe faia  
ai lena agasala i le lumanai—e mafai ona tatou  
maua le Togiola a Iesu Keriso, ma faamagaloina  
e le Atua, ma toe mama.

O le mama e taua aua e leai se mea eleelea  
e mafai ona mau i le afioaga o le Atua. Ae afai  
na pau la tatou sini o le ta'umamaina e pei ona  
i ai i le taimi na tatou tuua ai le afioaga o le Atua,  
sa sili ai ona tatou faapupuu i o tatou moega  
pepe i o tatou olaga atoa. Ae, na tatou o mai i  
le lalolagi e aoao mai mea tatou te fai ia iloa ai  
le lelei mai le leaga, ma tuputupu ae i le poto  
ma tomai, ola i tulaga taua tatou te mananao  
ai, maua ai uiga faaleatua—alualu i luma lea  
e le mafai ona tatou maua mai le saogalemu  
o le moega pepe.

O vaivaiga o tagata e i ai le matafaioi taua  
i faamoemoega nei o le olaga. Ina ua popole  
Moronae faapea ai nei e avea ona vaivaiga e  
tusitusi ma mea e amuamu ai Nuuese i mea  
paia, sa faamautinoa e le Alii ia te ia i upu nei:



## O LE FOLA-FOLAGA O LE TOGIOLA

"O le toefuatai o se mea e le mafai ona e toefuataia, o le faamalolo o le manua e le mafai ona e faamaloloina, o le tuufatasia o se mea na e talepea ma ua le mafai ona fai, o le faamoe-moega tonu lava lena o le togiola a Keriso. . . .

"Ou te toe fai atu, vagana ai si vaega toaitiiti, ua i ai i seoli, e leai se mausa, leai se vaisu, leai se fouvale, leai se solitulafono, leai se liliuese, leai se tuuaiga e tuusaunoa mai le folafolaga o le faamagaloga atoatoa. O le folafolaga lena o le togiola a Keriso."

**Peresitene Boyd K. Packer, Peresitene o le Korama a Apostetolo e Toasefululua, "O Le Taeao Susulu Matagofie o le Faamagaloga," *Ensign*, Nov. 1995, 19–20.**

"Ma afai e o mai tagata ia te au o le a ou faaali atu ia te i latou o latou vaiavaiga. Ou te avatu i tagata ia vaivaiga ina ia faalotomaualalalo ai i latou; ma ua lava lou alofa tunoa mo tagata uma o e e latou te faalotomaualalaloina i latou lava i ou luma, ma faatuatua mai ia te au, ona ou faia lea o mea vaivai ia avea ma mea malolosi ia te i latou" (Eteru 12:27; tagai foi 1 Korinito 15:42–44; 2 Korinito 12:7–10; 2 Nifae 3:21; ma le Iakopo 4:7).

O faamatalaga a lenei mau masani e maoae ma ua valaaulia ai i tatou ia iloa le eseesege o le agasala (e uunaia e Satani) mai vaivaiga (o loo faamalamalama i i, o se tulaga na "tuuina mai" ia i tatou e le Atua).

E mafai ona tatou faauigaina vaiavaiga o se tapulaa o lo tatou poto, mana, ma le paia lea e o mai ma le tagata soifua. O le avea ai o ni tagata soifua, tatou te fananau mai ma le augavaivai ma le faalagolago i isi, faatasi ai ma ni faaletonu faaletino ma agamasani o le natura. E tausia i tatou ma siosiomia e isi tagata vaivai, ma o a latou aoaoga, faataitaiga, ma le faiga o i tatou e faaletonu ma o nisi foi taimi e faataumaoi. I o tatou tulaga vaivai i le olaga, tatou te mafatia ai i ma'i, fiaaai, ma le vaivai faaletino ma faalelagona. Tatou te oo i lagona faaletagata o le ita, faanoanoa, ma le fefe. E leai so tatou poto, tomai, onosai, ma le malosi. E tele foi tofotofoga tatou te feagai.

E ui ina sa leai sana agasala, ae sa aufaatasi atoatoa i tatou ma



## LE ESEESEGA O LE AGASALA MA VAIVAIGA

	Agasala	Vaivaiga
Faaugaga?	Le usitai ma le loto i le Atua	Tapulaa o le tagata soifua, vaivaiga
Punavai?	Uunaia e Satani	Vaega o lo tatou natura faaleolaga nei
Faataitaiga?	O le solia ma le iloa o poloaiga a le Atua, talitonu ia Satani nai lo le Atua	Gagaifo i faaosoosoga, lagona malolosi, vaivai, ma'i i le tino po o le mafaufau, valea, aga masani o le natura, faigata, oti
Pe na ia lesu?	Leai	loe
O la tatou tali e tatau ona?	Salamo	Lotomaualalo, faatuatua ia Keriso, ma taumafaiga e faatoilalo
Tali a le Atua i la tatou tali?	Faamagaloga	Alofatunoa—o se mana e mafai ai
Lea e tulai mai ai le?	O le faamamaina mai agasala	Mauaina o le paia, malosi

Iesu Keriso, i le tulaga o vaivaiga faaleolaga nei (tagai 2 Korinito 13:4). Na soifua mai o Ia o se tamameamea e le taualoa i se tino faitino ma sa tausia e ni matua e le atoatoa. Sa tatau ona ia aoao e savali, tautala, galue, ma fealofani ma isi. Sa fiaai ma le lava, sa ia maua lagona faaletagata, ma sa mafai foi ona ma'i, mafatia, lavatoto, ma maliu. Na "faaosoosoina o ia i mea uma e pei o i tatou, a ua leai sana agasala," ua tuuina o Ia lava i la le tino ina ia mafai ai ona "tiga alofa ma i tatou i o tatou vaivai" ma fesoasoani ia i o *tatou* mafatiaga po o vaivaiga (Eperu 4:15; tagai foi Alema 7:11–12).

E le mafai ona na ona tatou salamo ona o lo tatou vaivai—e le mafai foi e le vaivai lava ia ona fai ia tatou le mama ai. E le mafai ona tatou tuputupu ae faaleagaga vagana ai ua tatou *teena* le agasala, ae tatou te le tuputupu ae faaleagaga foi vagana ai ua tatou *talia* lo tatou tulaga o vaivaiga faaletagata soifua, tali atu i ai ma le lotomaualalo ma le faatuatua, ma aoao e ala i o tatou vaivaiga e faalagolago i le Atua. Ina o popole Moronae i le vaivai o lana tusitusi, sa le'i tauina atu e le Atua ia te ia e salamo. Ae, sa aoaoina o ia e le Atua ia lotomaualalo ma faatuatua ia Keriso. A tatou agamalu ma faatuatua, e ofoina mai e le Atua le alofatunoa—ae le o le faamagaloga—e avea ma vaifofo mo vaivaiga. O loo faamatala mai i le Lomifefilo i le Tusi Paia o le alofatunoa o se mana e mafai ai, mai le Atua ona faia mea e le mafai ona tatou faia e i tatou lava (tagai Lomifefilo i le Tusi Paia, "Alofatunoa")—o le vaifofo talafeagai faaleatua lea e mafai ai e Ia ona "avea mea vaivai ma mea malolosi."

### Faaaogaina o le Lotomaualalo ma le Faatuatua

Mai o tatou potomasani i le Ekalesia, sa aoaoina i tatou i elemene taua o le salamo, ae o le a tonu lava le ala tatou te atiae ai le lotomaualalo ma le faatuatua? Mafaufau i tulaga nei:

- **Mafaufau loloto ma tatalo.** Ona tatou te vaivai, atonu tatou te le iloaina pe o tatou feagai ma le *agasala* (e manaomia ai se suiga vave o le mafaufau, loto, ma le amio) po o *vaivaiga* (e manaomia ai se taumafaiga lotomaualalo, e lagolagoina, aoao, ma le faaleleia atili. O le ala tatou te vaai atu ai i nei mea e mafai ona faalagolago i lo tatou ola tuputupuae ma le tulaga faatagata matua. E ono i ai ni elemene o le agasala ma vaivaiga i se amioga e tasi. O le faapea o le agasala o se vaivaiga e tau atu ai i le faia o se 'alofaga nai lo le salamo. O le faapea o se vaivaiga o se agasala lea e mafai ona taunu u i le maasiasi, tuu'alia, faanoanoa, ma lafoai ai folafolaga a le Atua. O le mafaufau loloto ma tatalo e fesoasoani tatou te iloa ai nei eseesege.
- **Faamuamua.** Talu ai tatou te vaivai, e le mafai ona tatou faia suiga uma e manaomia i le taimi e tasi. A tatou taumafai e faatoilalo ma le lotomaualalo ma le faatuatua o tatou vaivaiga faaletagata soifua ia tofule taimi ma nai mea e fai, e mafai ona faifai malie ona faaititia le valea, faia ni mamanu lelei ma ni mausa, faateleina lo tatou ola maloloina faaletino ma faaleagaga ma tomai e onosaia ai, ma faamalolosia lo

tatou faatuatuaga i le Alii. E mafai ona fesoasoani le Atua ia tatou iloa po o fea e amata ai.

- **Fuafua.** Talu ai tatou te vaivai, o le a tele atu ai mea e manaomia ina ia malolosi atili ai nai lo le na o se nau-nau amiontonu, ma le tele o le amiopulea o le tagata lava ia. E manaomia foi ona tatou fuafua, aoao mai a tatou mea sese, atiae nisi faiga poto aoga, toe iloilo a tatou fuafuaga, ma toe taumafai. Tatou te manaomia le fesoasoani mai tusitusiga paia, o tusi talafeagai, ma isi tagata. Tatou amata i nai mea iti, fafia i le faaleleia, ma talia tulaga e ono lamatia (tusa lava pe tatou te lagona ai le faaletonu ma le vaivai). Tatou te manaomia le lagolagosua e fesoasoani tatou te faia ai filifiliga lelei tusa lava pe ua tatou le lavava pe faavaivai, ma ni fuafuaga e toe amatalia ai pe tatou se'e ese.
- **Faaaoga le onosai.** Talu ai tatou te vaivai, e ono umi se taimi o suiga. E le mafai ona na ona tatou lafoaia o tatou vaivaiga e pei ona tatou lafoai o le agasala. O soo lotomaualalo e naunau e faia mea e manaomia, latou te aoao e maua'i, taumafai pea, ma le aua lava nei fiu. E fesoasoani le lotomaualalo tatou te maua ai le onosai mo i tatou lava faapea ma isi o e vaivai foi. O le onosai o le faailoga lea o lo tatou faatuatua i le Alii, lotofaafetai mo Lona talitonuga mautu ia i tatou, ma faalagolago i Ana folafolaga.

E tusa lava pe tatou te salamo faamaoni i a tatou agasala, maua le faamagaloga, ma toe faamamaina, tatou te tumau i le vaivai. E mafai lava ona oo mai ma'i, lagona malolosi, vale, aga masani o le natura, vaivai, ma tofotofoga. *Ae o le le gafataulimaina ma ni le agatonu, e le o ni agasala ma e le taofia ai i tatou mai le mama ma le agavaa mo le mafutaga a le Agaga.*

### Vaivaiga i le Malosiaga

E ui ina naunau Satani e faaaoga o tatou vaivaiga e faatosina ai i tatou ia agasala, e mafai e le Atua ona faaaoga



**ESEESEGA O LE TAUSALAGA LELEI (FAANOANOA FAALEATUA)  
MA LE LOTOMAUALALO MAI LE FAAFOLIGA LE LELEI O LE MAAIASI**

Tausalaga Lelei— Faanoanoa Faaleatua ona o le Agasala	Faatuatua & Lotomaualalo— Agamalu faa-Keriso i Vaivaiga	Maasiasi Faataumaoi— Faafoliga Le Lelei
<p>Tatou te taumafai e:</p> <ul style="list-style-type: none"> <li>• la lagona le faanoanoa i le le tausia o a tatou feagaiga.</li> <li>• Salamo, suia o tatou mafaufau, loto, ma amio.</li> <li>• la fetala'i, tautau atu mea sese, toe faalelei.</li> <li>• Tuputupu ae ma aoao.</li> <li>• Vaai ifo ia i tatou lava o se gafoaga o mea lelei, ma le aoga.</li> <li>• Naunau e faaogatusa a tatou amioga ma o tatou foliga lelei.</li> <li>• Faatuatua atoatoa i le mana togiola o le Togiola a Keriso.</li> </ul>	<p>Tatou te taumafai e:</p> <ul style="list-style-type: none"> <li>• la maua le mautinoa toafimalie ma talia lelei, tusa lava pe i ai o tatou faaletonu.</li> <li>• Faaaoga tulaga lamatia e tuputupu ae ai ma saofaga.</li> <li>• Talia mea sa sese, naunau e tofaalelei.</li> <li>• Aoao mai mea sese ma toe taumafai.</li> <li>• Atiae se lagona agamalie ma fiafia i le olaga ma isi.</li> <li>• Vaai i o tatou vaivaiga e fesoasoani tatou te malamalama ai i isi.</li> <li>• la onosai i vaivaiga ma faaletonu o isi.</li> <li>• Faateleina le mautinoa o le alofa ma le fesoasoani a le Atua.</li> </ul>	<p>Tatou te taumafai e:</p> <ul style="list-style-type: none"> <li>• Lagona le le aoga, faasiasia.</li> <li>• Taumafai e nana o tatou vaivaiga mai isi.</li> <li>• Fefe nei folasia o tatou vaivaiga.</li> <li>• Tuuaia o isi i faafitauli.</li> <li>• Aloese mai le talia o tulaga lamatia, vaai atu i toilalo o se faamaasiasi.</li> <li>• Faatautava ma faatusatusa i tatou lava i isi.</li> <li>• Taupunipuni ma faaulumalo pe femoumouai.</li> <li>• Tumu i le faitio pe soona mateletele.</li> <li>• Muai faatumulua i o tatou toilalo ma mea tatou te faamuamua.</li> <li>• Matau i le teena ma le inosia e le Atua.</li> </ul>

vaivaiga faaletagata soifua e aoao ai, faamalosi ai, ma faamanuia ai i tatou. Peitai, e ese ai mai le mea tatou te ono faamoemoeina, e le “faia [pea lava] e le Atua mea vaivai e avea ma mea malolosi” mo i tatou e ala i le aveesea o o tatou vaivaiga. Ina o tatalo faafia atu le Apostolo o Paulo ia aveese e le Atua se “meatuitui mai le tino” sa faaaoga e Satani e faamafatia ai o ia, sa ta'u atu e le Atua ia Paulo, “Ua lava lo'u alofatunoa mo oe: aua o le vaivai e faaatoaina ai lo'u mana” (2 Korinito 12:7, 9).

E tele auala e faia ai e le Alii “mea vaivai e avea ma mea malolosi.” E ui ina mafai e Ia ona aveesea le vaivai e ala i se togaftiga maoae tatou te faamoemoe i ai, ae i la'u lava poto masani, e seasea lava. Mo se faataitaiga, ou te lei iloa se faamaoniga faapea na aveese e le Atua ia vaivaiga o Moronae i le tusitusi ina ua uma le fuaipu laulioa i le Eteru 12. E mafai foi e le Atua ona avea mea vaivai ma mea malolosi e ala i le fesoasoani ia tatou galulue mai o tatou vaivaiga, maua se lagona talafeagai o le malie po o se vaaiga i na mea, ma faaleleia atili ai i le gasologa o se taimi. E le gata i lea, o malosiaga ma vaivaiga e tele lava ina fesootai (e pei o le malosi o le faapalepale ma le vaivaiga o le faaulumaaa), ma e mafai ona tatou aoaoina le taua o

le malosiaga ma le lotoita, o le vaivaiga lea e o faatasi.

E i ai foi le isi auala e sili atu ona mamana e faia ai e le Atua mea vaivai ma mea malolosi mo i tatou. Na fetalai le Alii ia Moronae i le Eteru 12:37, “Ma ona ua e vaai i lou vaivai o le a faamalosia oe, e oo lava i le nofo i lalo i le nofoaga ua ou saunia i maota o lo'u Tamā.”

E le o ofoina atu e le Atua i i e suia le vaivaiga o Moronae, ae ia suia ia Moronae. O le faatoilaloina o le vaivaiga faaletagata soifua, e mafai e Moronae—ma i tatou—ona aoaoina le alofa mama, tigaalofa, agamalu, onosai, lototele, faapalepale, poto, gafatia e toetulai ai, lotofaamagalo, maua'i, lotofaafetai, fatufatua'i, ma le anoanoai o isi uigaattua e avea atili ai i tatou faapei o lo tatou Tama i le Lagi. O uiga auau mama tonu ia na tatou o mai i le lalolagi e faamaai, o uiga faa-Keriso ia e saunia ai i tatou mo le malo i luga.

E leai se isi mea e sili ona iloagofie ai le alofa, poto, ma le mana togiola o le Atua nai lo Lona tomai e liliu a tatou tauiviga ma vaivaiga faaletagata soifua i ni uiga taua faaleatua ma malosiaga e avea atili ai i tatou e pei o Ia. ■

*E alala le tusitala i Iuta, ISA.*





Saunia e Elder  
W. Christopher  
Waddell

O Le Fitugafulu

# Talitonuga Faalelotu MAMA

*O le auauna atu ma le le faatuaoia—faagalo ia i tatou lava,  
tali atu i manaoga o isi, ma le ofoina atu o o tatou ola e tautuaina  
ai i latou—o se uiga lava lea o soo o Iesu Keriso.*

**I**le Mataio matapu e 11 ua aoao mai ai ia i tatou e le Faaola se lesona taua e ala i Lona *lei* tali atu i se fesili na tuuina mai e soo a Ioane le Papatiso:

“Ua lagona e Ioane i le fale pui pui o galuega a Keriso, ona aauina mai ai lea e ia ni ona soo se toalua,

“Ua faapea mai ia te ia, O oe ea le maliu mai, pe matou te faatali i se tasi?

“Ona tali atu ai lea o Iesu, ua faapea atu ia te i laua, Ina o atu ia oulua, ma faailoa atu ia Ioane o mea ua oulua faalogo i ai, ma vaai i ai:

“Ua pupula tauaso ma ua savavali pipili, ua faamamaina lepela ma ua logo tutuli, ua faatutuina o e na oti ma ua folafolaina foi le tala lelei i e matitiva” (Mataio 11:2).

Nai lo le tuuina atu o se faamalamalamaga puupuu faaleaoaoga faavae e ta'u atu ai o Ia lava lea, “o ia le e tatau ona afio mai,” ae sa tali atu le Faaola e ala i mea sa Ia faia—Lana faataitaiga o le auauna atu.

I le konafesi aoao ia Aperila 2014, na faamanatu mai ai e Elder Richard G. Scott o le Korama a Apostolo e Toasefululua: “E sili atu lo tatou auauna atu i lo tatou Tama oi le Lagi e ala i faatosinaga amiontonu o isi ma auauna atu ia te i latou. O le faataitaiga aupito sili na soifua i le fogaelele o lo tatou Faaola, o Iesu Keriso”<sup>1</sup>

O le auauna atu ma le le faatuaoia—faagalo ia i tatou lava, tali atu i manaoga o isi, ma le ofoina atu o o tatou ola e tautuaina ai i latou—o se uiga lava lea o soo o Iesu Keriso. Pei ona sa aoao mai e le Tupu o Peniamina i le silia ma le 100 tausaga a o lei soifua mai le Faaola, “Pe a outou auauna atu i o outou uso-a-tagata, ua na o lo outou auauna atu lava lea i lo outou Atua” (Mosaea 2:17).

Ua faamanatu mai e Iakopo ia i tatou e faapea o se itu taua o le “talitonuga faalelotu mama” o loo maua lea i a tatou auaunaga i isi pe a tatou “tauasiasi atu i e matua oti ma fafine ua oti a latou tane i o latou tiga” (Iakopo 1:27). O le “talitonuga faalelotu mama” e sili atu i le na o se tautinoga o le talitonuga; o se faatinoga o le talitonuga.

## Alofa I E Tou Te Faimalaga

I le totonugalemu o Iulai 1984, i ni nai vaiaso talu ona ona ma faaipoipo ma lo'u toalua o Carol i le Malumalu o Los Angeles i Kaledonia, sa ma malaga i Iuta, e amata ai ona ou faigaluega ae faaauau le aoga a Carol i le kolisi. Na tofu i ma'ua ma le taavale. Sa ma utaina i taavale ia e lua a ma meatotino uma.

Pe a ma le afa o le ala i lo ma taunuuga, ae seu mai le taavale a Carol i autafa o la'u taavale ma amata ona

genogeno mai ia te au. O le taimi lea e lei i ai ni telefoni feaveai ma ni feau feaveai i telefoni ma ni Twitter. O le vaaia o ona foliga e ala atu i le faamalama o lana taavale, sa ou iloa ai e le o manuia lana faalogo. Sa fai mai e mafai lava ona ave lana taavale ae sa ou popole mo la'u manamea fou.

Ina ua ma latalata atu i le taulaga ititi o Beaver, Iuta, sa toe seu mai foi lana taavale, ma sa ou iloa ai ua manaomia ona taofi. Ua ma'i o ia ma ua le toe mafai ai ona faaauau. Sa tutumu a ma taavale e lua i lavalava ma meaalofa o le faaipoipoga, ae paga lea, e utiuti si a ma tupe. Sa le gafatia e le ma paketi se potu i se faletalimalo. Sa ou le mautonu po o le a le mea e fai.

E leai se tasi o i ma'ua ua oo i Beaver, ma e le o mautinoa lelei foi la'u mea lea e sue, ma sa ma feofeoai faataamilo mo ni nai minute seia oo ina ou vaaia se paka. Sa ma afe i le paka ma maua ai se laau paolo, lea sa ou fofola ai se palanikete e taoto ai Carol.

I nai minute mulimuli ane, sa afe mai se isi taavale ma paka ai i autafa o a ma taavale e lua. Sa oso mai i fafo se tamaitai, pe tusa o le matua o o ma tina, ma fesili pe i ai se mea o faaletonu ma pe mafai ona ia fesoasoani mai. Fai mai o ia, sa ia matauina i ma'ua a o sau lana taavale ma sa ia lagona ai e tatau ona tu. Ina ua ma faamatala atu i ai le tulaga ua ma i ai, sa vave ona ia valaaulia i maua e mulimuli atu ia te ia i lona fale, lea e mafai ai ona ma malolo i le umi ma te manaomia.

E lei pine ae o ma malolo i se moega matagofie i se potumoe i le potu i lalo o lona fale. Ina ua ma mapu, sa fai mai lenei tuafafine lelei, e i ai ana feau e alu e fai ma o le a tuu na o i maua mo ni nai itula. Sa ia fai mai, afai ma te fiaaai, e pule lava i maua i soo se mea e mafai ona ma maua i lona umukuka, ma afai ma te o a o lei foi mai, faamolemole ia tapuni le faitotoa i luma.

Ina ua lava le moe lea sa ma matua manaomia, sa lagona le malosi e Carol ma sa faaauau le ma malaga e aunoa ma se mafaufau i le umukuka. Na ma tuua, a o lei toe foi mai le tamaitai. O se maasiasi, ma te lei tusia le tuatusi ma ma te lei faafetai lelei atu i lo ma'ua Samaria agalelei, o le sa tu mai i le ala ma tatala mai lona fale i ni tagataese sa manaomia le fesoasoani.

A ou toe tomanatu i lenei aafiaga, na ou man tua upu a Peresitene Thomas S. Monson, o loo au maia ai le faataitaiga o le poloaiga a le Faaola i soo se tagata: e "o ma faia foi faapea" (tagai Luka 10:37) "E le mafai ona tatou alolofa moni i le Atua pe afai tatou te

le alolofa i a i latou o tatou faimalaga i le malaga fai o lenei olaga."<sup>2</sup>

Pe o fea lava tatou te fetaiai ai ma "uso faimalaga"—i luga o le ala po o o tatou aiga, po o malae taalo po o a tatou aoga, i falefaigaluega po o le lotu—a tatou sailia, vaaia, ma galulue, o le a avea atili i tatou e faapei o le Faaola, faamanuiaina ma auauna atu i le gasologa o le ala.

### Saili

Na aoao mai Elder Neal A. Maxwell (1926–2004) o le Korama a Aposetolo e Toasefululu:

"E le pei o le Faaola pele, e le mafai lava ona tatou togolaina agasala a tagata! E le gata i lea, tatou te le mafai lava ona onosaia ma'i, o mafatiaga ma faanoanoaga uma o le olaga nei (tagai Alema 7:11–12).

"Peitai, i si a tatou fua itiiti, pei lava ona sa valaaulia ai e Iesu, e mafai lava ona tatou taumafai e avea 'e pei lava o [Ia]' (3 Nifae 27:27)."<sup>3</sup>

A tatou saili ia avea e faapei o Ia, ma se manaoga faamaoni e faamanui "i latou o tatou faimalaga", o le a tatou maua avanoa e faagalo ai i tatou lava ae siitia isi. O nei avanoa atonu e tele ina le faigofie, o le tofotofoina o lo tatou manao moni ia avea atili faapei o le Matai, o Lana auaunaga aupito silisili o auaunaga uma, Lana Togiola e le iu, sa lei faigofie. "E ui i lea, ia i ai i le Tama le viiga, ma sa Ou inu ma fauma ai au tapenapenaga mo le fanauga a tagata" (MF&F 19:19).

O le sailia ma le faamaoni ia avea atili e faapei o le Faaola, o le a mafai ai e i tatou ona iloa mea e le o mafai ona tatou vaaia. Sa lava le soifua ai o lo ma Samaria agalelei i le Agaga, e tali atu ai i se uunaiga ma sau ai i se tagataese na manaomia le fesoasoani.

### Vaai

Ina ia vaai i ni mata faaleagaga o le vaai lea i mea e pei ona i ai moni, ma iloa manaoga atonu tatou te lei iloaina. I le faataoto i mamoe ma oti, e leai se tasi o i latou na "faamanuiaina" pe "faamalaiaina" na iloaina le Faaola ia i latou o e na fiaaai, fiafeinu, le lavalava, pe i le falepuipui. Sa latou tali atu i lo latou taui e ala i le fesili, "O anafea na matou iloa ai oe?" Tagai i le Mataio 25:34–44.

E na o i latou o e sa vaai i mata faaleagaga, na iloaina manaoga, na galulue ma faamanuiaina ai i latou sa mafatia. Sa iloa e lo ma Samaria agalelei le manaoga, a o ia vaai i ona mata faaleagaga.

## Galue

E mafai ona tatou vaai i manaoga i o tatou siosiomaga, ae manatu e le gafatia ona tali atu i ai, ma faapea e le talafeauga mea tatou te ofoina atu. A o tatou saili ina ia avea e faapei o Ia, ma a o tatou vaaia manaoga i e tatou te faimalaga e ala i mata faaleagaga, e tatau ona tatou faatuatua e mafai e le Alii ona galue e ala ia i tatou, ona tatau lea ona tatou galulue.

Ina ua ulufale atu i le malumalu Peteru ma Ioane, sa latou fetaiai ma se tagata “pipili talu ona fanau mai” sa faatoga atu ia i la’ua mo se meaalofa (tagai Galuega 3:1–3). O le tali atu a Peteru o se faataitaiga lea ma se valaaulia mo i tatou taitoatasai:

“E leai sa’u ario po o sa’u auro; a o le mea ua ia te au, ou te avatu lea ia te oe, O le suafa o Iesu Keriso o le Nasareta, ina tu ai ia i luga, ina savali.

“Ua tago atu foi o ia i lona lima taumatau, ua faatu ia te ia i luga” (Galuega 3:6–7).

E mafai ona tatou galulue e ala i le tuuina atu o o tatou taimi ma taleni, se upu alofa, po o se galuega faatino. A o tatou saili ma vaaia, o le a o tatou i ai i ni avanoa ma tulaga e mafai ai ona tatou galulue ma faamanuia. Sa galue lo ma Samaria agalelei. Sa ia aveina i ma’ua i lona fale ma tuuina mai mo i ma’ua ana mea sa i ai. O le mea moni sa ia fai mai, “O le mea ua ia te au ou te avatu ai ia te oe.” O le mea tonu lava lea na ma manaomia.

Na aoao mai e Peresitene Monson nei lava mataupu faavae:

“O i tatou taitoatasai, i le faigamalaga i le olaga nei, o le a malaga i lana lava Ala i Ieriko. Mata o le a sou aafiaga? Ae o le a sa’u? Pe o le a ou le iloaina ea o ia, o le ua pau atu i lima o faomea ma manaomia la’u fesoasoani? Ae a oe?

“Mata o le a ou vaai atu i le ua manua ma faalogo atu i lana faatoga, ae ou faatafa ma ui atu i le isi itu? Ae a oe?

“Pe o le a ou vaai atu, faalogoina, tu, ma fesoasoani? Ae a oe?

“Ua tuuina mai e Iesu la tatou anavatau, ’Alu, ma faia foi faapea.’ A tatou usitai i lena tautinoga, o iina e tatala mai ai i la tatou vaaiga o le faavavau, se mata’iga o le olioli e seasea faaluaina ma e le maausia.”<sup>4</sup>

A o tatou avea atili e faapei o le Faaola e ala i le sailia, vaaia, ma galulue, o le a oo ina tatou iloa le moni o upu a le Tupu o Peniamina: “Pe a outou auauna atu i o outou uso-a-tagata, ua nao lo outou auauna atu lava lea i lo outou Atua” (Mosaea 2:17). ■

## FAAMATALAGA

1. Richard G. Scott, “Ua Ou Avatu le Faaoao ia te Outou,” *Liahona*, Me 2014, 35.

2. Thomas S. Monson, “Alofa—o le Ute o le Talalelei,” *Liahona*, Me 2014, 91.

3. Neal A. Maxwell, “Apply the Atoning Blood of Christ,” *Ensign*, Nov. 1997, 22.

4. Thomas S. Monson, “O Lou Ala i Ieriko,” *Liahona*, Sete. 1977, 2.

SAILI FAAMAONI

VAAI I MATA FAALEAGAGA

GALUE MA FAAMANUIA



합소서

eed That Every Hour

신소프션  
우주슬라

없기되소



# “Ua Naunau Ia Te Oe”

*Ina ua ma le iloa nisi mea e aoao atu,  
sa fautuaina e la'u soa ma te usuina le viiga lea.*

Saunia e Jonathan H. Westover

**I** se tasi Aso Sa i se aoauli lagilelei i la'u misiona i Balsan, Korea sa ma faatofa atu ma la'u soa i tagata o le au paia ina ua tuua le lotu, ma o le a ma o e talai, ae faailoa mai e le taitai misiona a le uarota ia i maua se alii talavou e 12 tausaga, o Kong Sung-Gyun. Sa lotu i lena aso ma sa manao e aoao atili i le talalelei.

Io e sa ma fiafia i le aoaoina o ia, ae sa ou popole i le aoaoina o se tagata laitiiti tele. Sa tonu ia i ma'ua e faamau-tino ua maua mai le faatagaga a ona matua, o lea na ou telefoni ai i le fale o Kong Sung-Gyun ma talanoa puupuu ai ma lona tina, o Pak Mi-Jung. Sa ou ofo ina ua fai mai o ia ua fiafia i le fia sau o lana tama i le lotu, ma o le a fiafia mate o atu e aoao o ia.

## Tagata Sailiili e Lei Fuafuaina

O le afiafi na sosoo ai, na ma taunu ai i le fale o le tamaitiiti, ua saunia e aoao. Sa ma tetei au sa manao foi Pak Mi-Jung ma te aoaoina lana tama teine, o Kong Su-Jin. Ma talu ai ona o i ma'ua o ni tagataese i lona fale, o lea sa manao ai Pak Mi-Jung e nofo ai i le taimi o lesona. Sa ma mananao e aoao po o le a lava le toatele e mananao e faalogoologo.

Ina ua uma ona tali sa latou faaafe, sa matou nonofo loa i lalo ma amata ona talatalanoa. Nai lo le manao ma

te amata loa lava i le lesona, sa manao Pak Mi-Jung ia iloa atili i ma'ua ma faamatala mai foi e uiga i tulaga o lo latou aiga. Sa ia faamatala mai o latou mafatiaga ma faigata sa latou feagai talu ai, e aofia ai le tauiviga lata mai a lana tama tama ma le kanesa. Na manuia ona togafitiga i le leisa, ma o le taimi nei ua faiifo le kanesa, ae na lapataia i latou e fomai e toe ono sasao mai i se taimi. O se popolega tele lea i le aiga. O se aiga limavaivai, ma e matuai galue malosi lava le tama ia tau lava ina i ai se mea e nonofo ai ma meaai i luga o le laulau.

Sa faateia a'u ma faanoanoa ona o mafatiaga o o latou olaga. Sa lei faigofie le olaga mo i latou, peitai sa matua ilo-agofie le vavalalata o le aiga nai lo se isi aiga ua ou feiloi i ai i Korea, lea e tele mea ua ta'u mai ai i tagata e mapoaina e pei o Korea. Sa ma tuua lo latou fale i lena afiafi ua tele lo ma iloa i lenei aiga faapitoa, ma ua maua le avanoa e faasoa atu ai ia i latou savali o le talalelei.

Sa ma toe foi ma la'u soa e toe aoao i lena vaiaso, ma o taimi taitasi ma te lagonaina ai lava le mafanafana lava lea e tasi ma le agalelei sa ma maua i le ma asiasiga muamua. Ina ua oo i le autu o le papatisoga, sa taufai naunau tamaiti e auai i le Ekalesia. Peitai, e lei maua e le tina lea sagisagi fiafia. E ui ina sa tosina o ia i a ma'ua aoaoga ma sa ia faamoemoe foi e moni, ae na te lei

lagonaina e mafai ona ia tausia ia ituiga o tautinoga e manaomia pe a auai i le Eklesia. Na te lei lagonaina foi ua talafeagai mo ia ona papatiso e aunoa ma lona toalua, lea ma te lei feiloi lava i ai. E ui o lea, sa naunau o ia matou te feiloi ma sa manao foi e auai faatasi ma lana fanau i le lotu.

Ina ua lata i le faaiuga o le vaiaso lona lua, a o faaauau pea ona ma aoao atu i lona fale, sa matou feiloi ma lona toalua, o Kong Kuk-Won—o se alii lotomaualalo, faaaloalo, ma le agalelei. Sa ia mafuta mai ma i matou i nai lesona ma sa talitonu o ia i mea uma sa ma aoaoina, e aofia ai aoaoga faavae ia e tele ina le talitonu ai isi tagata e pei o le sefuluai ma le Upu o le Poto. E ui i le tulaga e toetoe ina utiuti mea tautupe, ae sa amata ona totogi a latou sefuluai. Na pau le toatuga o le tama, o le tatau lea ona faigaluega i Aso Sa. Sa faigaluega o ia i le Malaevaalele Faavaomalo o Seoul i Aso Sa uma, o lea sa le mafai ai ona o i le lotu ma lona aiga. E ui i ona taimi faigaluega, ae sa fuafua lava o ia ma lona toalua e auai i papatisoga o o la'ua fanau i le Aso Sa na sosoo ai.

Ina ua maea papatisoga o tamaiti, sa faaauau pea ona matou feiloi soo i le fale o le aiga. Sa fai a matou aafifi faaleaiga, faasoa tutsusiga paia ma aafiaga faagaeetia, ma faafeiloi atu i la'ua i tagata o le uarota. Peitai, e ui i aafiaga faifai pea o le talalelei, sa lei taitai ona latalata ina papatiso ina ia matua.

O le taimi lea ua siitia ai la'ua soa, ma o la'ua soa fou e faatoa sau mai le nofoaga e aoao ai faifeautalai. Sa tumu o ia i le faatuatua, malosi, ma le naunautai, ma sa matuai faigata ia te au ona maua o ia. Ina ua mavae nai taimi na matou feiloi ai ma Kong Kuk-Won ma Pak Mi-Jung, sa fai mai la'ua soa pe na matou anapogi ma la'ua soa muamua ma i la'ua. Ma te lei faia. O le mea moni, e lei oo mai lava ia te au lea manatu. O lea na matou talanoa ai ma le aiga ma fautuaina se anapogi. Sa faateia au ona sa anapopogi lava latou, mo le ma'i o la'ua tama ma mo se suiga o taimi faigaluega



*Sa malosi le Agaga i le potu ina ua maea le fuaiupu mulimuli. Sa tilotilo sa'o mai Pak Mi-Jung ia te au ma fai mai, "Ua ou manao ou te papatiso."*

ina ia mafai ai e Kong Kuk-Won ona alu i le lotu. Ina uma ona matou anapogi ma la'ua soa ma i la'ua, sa talia a matou tatalo ma sa suia taimi faigaluega o Kong Kuk-Won. Ae na faauliulito lava Pak Mi-Jung e uiga i le papatisoina.

### O Se Manatu Musuia

Ona i ai lea o se isi manatu manaia o la'ua soa. Sa ia tago i lana tusipese ma talosagaina pe mafai ona matou pepese faatasi. E ui ina sa matou pepese faatasi i nisi taimi, ae ou te lei vaaia lava Pak Mi-Jung o pese, ma sa na ona ou manatu ai lava e le iloa e ia pese, pe le o lagolelei foi

## E FAAMAFANA E VIIGA LE LOTO FAANOANOA

“O nisi o lauga aupito sili e tuuina mai i le lagii na o viiga. E uunaia i tatou e viiga ia tatou salamo ma faia galuega lelei, atiina ae le molimau ma le faatuatua, faamafanafana i e vaivai, faamafanafana i e faanoanoa, ma uunaia i tatou e tumau seia oo i le iuga.”

*“Tuleiga Tomua a le Au Peresitene Sili,” Viiga, ix.*

ona e fou le musika ia te ia. Sa fesili la’u soa ia te ia pe i ai se viiga e fiafia i ai, ma sa ou ofo, auia sa taumole o ia ma tali mai, talu ona teineitiiti, o lana pese lava e fiafia i ai o le “Ua Naunau ia Te Oe” (*Viiga*, nu. 57). Sa matou amata i le usuina i vaega e fa, lea sa usu le tama, sa oloto le tina, faasala la’u soa, ae ou malu.

Sa malosi le Agaga i le potu. Ina ua matou usuina le fuaiupu lona tolu, sa lofutuina o ia, ma sa galoma ifo lona leo a o matou faaauau pea:

*Ua naunau ia te Oe  
Ifiafia po o tiga.  
Ina afio mai,  
Nei iu faamoemoe.  
Ua naunau ia te oe;  
Itaimi uma lava!  
Faamanuia au;  
Ua ou sau ia oe!*

Ina ua mae’ a le lona fa ma le fuaiupu mulimuli, sa tagi masusu o ia. A o taumafai lona toalua e faana o ia, sa iu ina mafai ona na. Sa tilotilo sa’o mai o ia ia te au ma fai mai, “Ua ou manao ou te papatiso.”

O le sauniga o le papatisoga o Kong Kuk-Won ma Pak Mi-Jung i le afiafi o lena Aso Sa, o se tasi o sauniga aupito faaleagaga o la’u misiona. Sa auai le la fanau i le polokalama, ma sa toatele le au paia na auai e faaalia ai la latou lagolago mo le aiga aupito fou ua liliu mai i le latou uarota. Sa ma usuina ma la’u soa se musika faapitoa: “Ua Naunau Ia te Oe.”

Sa iu ina maea la’u misiona ma ou toe foi i le aiga. Ina ua mavae se tausaga se tasi i

le kolisi, sa ou toe foi i Korea mo la’u polokalama faataitai i le taumafanafana, ma o fiafia o vaiaso taitasi ou te alu ai e asiiasi i le toatele o uo faapitoa ma aiga sa ou feiloi i ai i la’u misiona. Ina ua mavae ni nai vaiaso, sa ou agai atu i Balsan ma feiloi ai ma lenei aiga faapitoa. Ina ua ou taunu atu i lo latou pale, sa ou matauina se tasi ua misi—o lo latou atalii. Na ta’u mai e Pak Mi-Jung ia te au a o maligi ona loimata: na toe foi mai le kanesa o la la’ua tama, ma i le 14 o ona tausaga, na toilalo ai i lana tauiviga.

A o ou taumafai e faailoa atu la’u faamaisega ma taulima le tiga sa ou lagonaina, sa faamautinoa mai e Kong Kuk-Kon o le a lelei mea uma. Sa latou fiafia i le talalelei, auai ma le faamaoni i le lotu, ma taulai atu i le aso atonu o le a faamauina faatasi ai lo latou aiga mo le faavavau i le Malumalu i Seoul Korea. E ui i le lototiga, sa iloa e le aiga o le a latou toe vaai ia Kong Sung-Gyun ma latou toe mafuta ai. Na ta’u mai foi e Pak Mi-Jung o lo latou usuusuina o viiga i aso taitasi, sa fesoasoani ai ia te ia e maua le malosi e taulima ai ma maua le filemu e aumaia e le Agaga.

Ina ua ou tuua lo latou pale i lena afiafi, sa ou toe manatunatu i upu o le viiga e fiafia i ai Pak Mi-Jung. Ou te faafetai ina ua faamanuiaina e le Tama Faalelagi le aiga i le filemu ina ua maliu Kong Sung-Gyun, ma e sili ona ou faafetai ona o le matafaioi a le Agaga i le liua o Pak Mi-Jung, lea ua agavaa ai le aiga mo faamanuiaga e faavavau o le malumalu. ■

*E alala le tusitala i Iuta, ISA.*



Saunia e Peresitene  
Boyd K. Packer

Peresitene o le  
Korama a Aposetolo  
e Toasefululua

# O Le Taulaga Le Faatuaaoia ma le Paia a le Faaola


*E i ai pea lava pea le Alii iina.  
Na mafatia o Ia ma sa totogi ai le  
tau pe afai e te naunau e talia o  
Ia e avea ma ou Togiola.*

**U**a tatou ola uma i se faaleagaga nono. Po o le a lava, e faaopoopo pea lava pea le aitalafu. Afai e uma ona e totogia a'o e agai pea i luma, o le a itiiti lava se mea e te popole i ai. E le pine ae e aoao e pulea ma iloa ai o loo i ai se aso o le faamasinoga o i luma. Aoao e totogi uma lau aitalafu faaleagaga i taimi malolo masani nai lo le tuufau ia faaopoopo pea le tului.

Talu ai o loo tofotofoina oe, o lea ua faamoemoe ai o le a e faia ni nai mea sese. Ou te manatu na e faia mea i lou olaga ua e faanoanoa ai, o mea e le mafai ona e faatoese ai, pe faasa'o; o le mea



lea, e te tauaveina ai se avega mamafa. Ua oo nei i le taimi e faaaoga ai le upu *tausalaina*, lea e mafai ona pisia ai e pei o se vaitusi toto'o ma e le faigoifie ona aveese. O se lagona e aiga ma le tausalaina o le le fiafia, faanoanoa ona o faaminiaga ma avanoa ua le maua. Afai o loo e tauivi ma le tausalaina, e leai se eseesega o oe ma tagata o le Tusi a Mamona lea na saunoa ai le perofeta, "Ona o lo latou amionetonu sa amata ona faaititia le ekalesia; ma ua amata ona latou le talitonu i le agaga o valoaga ma le agaga o faaaliga; ma ua sisila totoa mai faafeagai ma o latou mata faamasinoga a le Atua." (Helamana 4:23).



E tele ina tatou taumafai e foia faafitauli o le tausalaina e ala i le ta'u atu i le isi ma le fai ifo ia i tatou lava e le afaina. Ae, i le taele o o tatou loto, tatou te le talitonu i ai. Tatou te le talitonu foi ia i tatou lava pe a tatou ta'ua. Ua sili atu lo tatou iloa. E le afaina!

E aoao mai pea lava pea e perofeta le salamo. Fai mai Alema, "Faauta, e afio mai o ia e togiola i latou o e e papatiso i le salamo, e ala i le faatuatua i lona suafa" (Alema 9:27).

Sa ta'u atu ma le faamaoni e Alema i lona atalii faalogogata e faapea, "O lenei, e le mafai ona oo mai le salamo i tagata vagana ua i ai se faasalaga, o lea ua faavavau foi e pei ona tatau ai i le ola o le agaga, ua faapipii e faafeagai ma le fuafuaga o le fiafia." (Alema 42:16).

E lua lava faamoemoega faavae o le olaga nei. Muamua o le mauaina lea o se tino lea e mafai ai, pe afai o le a faamamaina i tatou, ma faaeaina ma ola ai e faavavau. Lona lua o faamoemoega ia tofotofoina. Pe a tofotofoina e mautinoa lava o le a i ai mea sese tatou te fai. Ae afai foi tatou te faia, e mafai ona tatou aoao ai mai a tatou mea sese. "Pe afai tatou te faapea, Tatou te lei agasala, ua tatou fai ai o ia ma pepelo, e le o i totonu ia te i tatou lana afioga" (1 Ioane 1:10).

Atonu, e te lagonaina i lou mafaufau ma lou tino ma ua oia pe mamafa ia te oe se aitalafu faaleagaga ua "leva ona tatau ona foia." A oo ina e iloaina le mea moni e uiga ia te oe lava, i taimi e te manatunatu loloto ai (lea e toatele i tatou e taumafai e aloese ai), pe o i ai ni mea e lei foia o loo faalavelave ia te oe? Pe o i ai se mea i lou lotofuatiaifo? Pe o e tausalaina pea i se mea, itiiti pe tele?

E tele taimi matou te mauaina ai ni tusi mai ia i latou na faia ni mea sese matuia ma ua mamafatu. Latou te augani mai: "Mata e mafai ona faamagaloina au? Pe mafai ea ona suia au?" O le tali o le ioe!

Na aoao mai Paulo, "Ua le maua outou e se tofotofoga e ese i lo tagata: a ua faamaoni le Atua, o le Na te le tuuina atu outou i le tofotofoga e sili i se mea ua outou lavatia, ae saunia foi faatasi ma le tofotofoga se mea e sao ai, ina ia outou lava oono" (1 Korinito 10:13).

Ua aoaoina i tatou e le talalelei e mafai ona maua le mapusaga mai mafatiaga ma tausalaga e ala i le salamo. Vagana ai sina vaega toaititi-se vaega toaititi lava—ua filifili e mulimuli i le tiapolo ina ua uma ona latou iloa le atoaga, e leai se amio masani, leai se vaisu, leai se fouvale, leai se solitulafono, leai se mea faatiga itiiti pe tele e tuusaunoa mai le folafolaga o le faamagaloga atoatoa. Po o le a lava le mea sa tupu i lou olaga, ua uma ona saunia e le Alii se ala mo oe e te toe foi mai ai, pe afai e te gauai atu i uunaiga a le Agaga Paia.

O nisi ua faatumulia i se uunaiga malosi, o se tofotofoga e sau faafia i le mafaufau, atonu o se amio masani, ona sosoo ai lea ma se vaisu. Tatou gaga ifo i nisi o solitulafono ma agasala ma se fetuunaiga faapea tatou te le tausalaina ai aua o le ala lava lea na tatou fananau mai ai. E oo ina tatou utia, ona oo mai ai lea o le tiga ma mafatiaga lea e na o le Faaola e mafai ona faamaloloina. Ua ia te oe le mana e taofi ai ma ina ia togiolaina.

### **Ua Osofaia e Satani le Aiga**

Sa ta'u mai e Peresitene Marion G. Romney (1897–1988) i se tasi taimi e

faapea, "Aua nei tau ina ta'u atu ia i latou ina ia malamalama ai, ta'u atu ia i latou ina ia latou le malamalama sese ai."

Fai mai Nifae: "Aua e fiafia lo'u agaga i le manino; ona o le ala lenei ua galue ai le Alii le Atua i totonu o le fanauga a tagata. Aua e tuuina mai e le Alii le malamalama ina ia malamalama ai" (2 Nifae 31:3).

O le mea lea, faalogo lelei! O le a ou talanoa manino atu e pei ona valaauna ai ma e tusa ai ma le matafaioi e fai ai.

Ua outou iloa e i ai se fili. Ua auiliili mai i tusitusiga paia o ia i faaupuga nei: "le gata tuai lava lena, o le o le tiapolo lea, . . . o le tama o pepelo uma" (2 Nifae 2:18). Sa tulieseia o ia i le amataga (tagai MF&F 29:36-38) ma sa le maua ai sona tino faitino. Ua tauto nei o ia e faaovelave i "le ata sili o le fiafia" (Alema 42:8) ma avea ai o se fili i e amiontonu uma. Ua taulai atu ana osofaiga i le aiga.

Ua outou ola i se taimi ua lilofia ai le lalolagi i le mala o ponokalafi. E faigata ona solaese mai ai. Ua taulai atu ponokalafi i le vaega lena o lou natura lea e te maua ai le mana e foafao ai le ola.

O le nopia'i ai i ponokalafi e tau atu i fagata, tatala faaipoipoga, faama'i, ma le anoanoai o faafatiatamai. E leai sona vaega e mama. O le aoina mai, matamata ai, pe feaveai foi i soo se ituaiga, e tutusa lava ma lou tauaveina o se gata uogo i lau ato faafafa. E te oo atu ai i le tulaga e tusa o se u faaleagaga a le gata ma lana tuioti. E mafai e se tasi ona malamalama gofie, i le lalolagi ua i ai nei, e toetoe lava ina e oo atu i ai ma se lotomama, faiatai i ai, pe matamata ai foi, e aunoa ma le iloa o ona taunuuga mataga. Afai o le tulaga lena ua e i ai, ou te lapataia oe ia tuu loa. Tuu nei loa lava!

Ua aoao mai le Tusi a Mamona o tagata



*E na o le Toatasi  
lava i le talatusia  
uma o talafaaso-  
lopito o le tagata,  
e matuai aunoa  
ma se agasala,  
e agavaa e tali  
atu mo agasala  
ma solitulafono a  
tagata ola uma.*

uma "ua lava le aoaoina o tagata ua latou iloa ai le lelei mai le leaga" (2 Nifae 2:5). E aofia ai ma oe. Ua e iloa le mea sao ma le mea sese. Ia e matuai faaeteete ia aua nei e kolosia lena laina.

E ui lava o le tele o mea sese e mafai ona tautau atu na o oe i le Alii, ae e i ai nisi solitulafono e manaomia ai isi mea e sili atu ina ia maua ai le faamagaloga. Afai e matuia tele au mea sese, ia vaai lou epikopo. Afai e le matuia, o le ta'uta'u atu masani, filemu ma faaletagata lava ia, ua lava lea. Ae ia manatua, e ono le oo mai i le taimi e tasi lena taeao o le faamagaloga. Afai e te tautevateva i le taimi muamua, aua e te fiu. O le faatoilaloina o le loto faavaivai, o se vaega o le suega. Aua le fiu. Pei ona sa ou fautua atu muamua, a uma loa ona ta'uta'u atu ma lafoai au agasala, aua nei e toe tepea i tua.

### **Na Puapuagatia le Faaola Mo a Tatou Agasala**

E i ai pea lava pea le Alii iina. Na mafatia o Ia ma totogi ai le tau pe afai e te naunau ia talia o Ia e avea ma ou Togiola.

I le avea ai ma tagata soifua, atonu e le mafai, ma e moni lava e le mafai, ona tatou malamalama atoatoa, pe na *faapefea* ona faataunu e le Faaola Lana taulaga togiola. Ae mo le taimi nei e le taua tele le *pefaapefea* e pei o le *aisea* o Lona mafatiaga. Aisea na Ia faia ai mo oe, mo au, mo tagata ola uma? Sa ia faia ona o le alofa i le Atua le Tama ma tagata uma. "E le sili lava le alofa o se tasi i lenei alofa, ia tuuina atu e se tasi lona ola e sui ai ana ue" (Ioane 15:13).

I Ketesemane, na tuua ai e Keriso Ana Aposetolo ia tatalo. Po o le a lava le mea na tupu iina, e lava lo tatou malosi e iloa ai! Ae

ua tatou iloa lava ua uma ona Ia faia le Togiola. Sa naunau o Ia Na te tauaveina i Ona lava luga ia mea sese, ma agasala, ma tausalaga, o masalosaloga ma atuatu-valega a le lalolagi uma. Na mafatia o Ia mo i tatou ina ia tatou le mafatia. E toatele tagata sa mafatia i puapuaga ma ua oti i se oti e matautia le tiga. Ae o Ona mafatiaga e sili mamao atu i lo latou uma.

I lo'u matua ua i ai, ua ou iloa le mea e igoa o le tiga faaletino, ma e le malie! E leai se tasi e tuua lenei olaga e aunoa ma le iloaina o se mea pe tasi pe lua e uiga i mafatiaga. Ae o le puapuaga patino e le mafai ona ou onosaia, o lo'u iloa ai lea ua mafua ia te au ona mafatia se isi. O iina ua ou pueina ai se ataata o mafatiaga o le Faaola na oo i ai i le Faatoaga o Ketesemane.

Na ese lava Ona mafatiaga mai isi mafatiaga uma na muamua pe talu mai foi ona Ia tauaveina i Ona lava luga o faasalaga uma ua tuuina i le tagata. Manatu i lena mea! E leai sana aitalafu e totogi. E leai sana mea sese na fai. Peitai, o le tauaoaiga uma o le tausalaga, o le faanoanoa ma le faavauvau, o tiga ma le faamaasia, o mafatiaga uma faalemafaufau, lagona, ma faaletino i le tagata—Na Ia oo i nei mea uma. E na o le Toatasila lava i le talatusia uma o talafaa-solopito o le tagata, e matuai aunoa ma se agasala, e agavaa e tali atu mo agasala ma solitulafono a tagata ola uma, ma onosaia le tiga e o faatasi ai mo le totogiina.

Na Ia ofoina atu Lona soifua ma fetalai, "O A'u lea ua tauaveina i o'u luga o agasala a le lalolagi" (Mosaea 26:23). Na faasatau-roina o Ia; Na maliu o Ia. Sa le mafai ona latou aveeseina Lona soifua mai ia te Ia. Na finagalo malie lava o Ia e maliu.

### E Mafai Ona Maua Le Faamagaloga Atoatoa

Afai na e tautevateva pe na e se i se taimi, afai ua e lagona ua faatagataotauaina oe e le fili, e mafai ona e agai i luma ma le faatuatua aua nei e toe fealualua'i solo i le lalolagi. O loo i ai i latou ua saunia e toe taialaina oe i le filemu ma le saogalemu. O le alofa tunoa o le Atua, e pei ona folafolaina mai i tusitusiga paia, e oo mai "pe a uma mea uma e mafai ona tatou faia" (2 Nifae 25:23). O le mafaia o lenei mea, ia te au, o le upu moni e sili ona aoga le iloaina.

Ou te folafola atu e mafai ona oo mai le taeao pupula o le faamagaloga. Ona toe oo mai ai lea "o le filemu mai le Atua, o loo silisili lava i mea uma e manatu i ai" (Filipi 4:7) i lou olaga, o se mea e pei o se la oso, ma oe ma Ia "e le toe manatua a [outou] agasala" (Ieremia 31:34). O le a faapefea ona e iloa? O le a e iloa lava! (Tagai Mosaea 4:1–3.)

O le mea lea ua ou sau e aoao atu ia te outou o loo faaletonu. O le ulufale mai o Ia e foia le faafitauli e le mafai ona e foia, ae e tatau ona e totogia le tau. E le maua e aunoa ma lou faia o le mea lena. O Ia o se pule agalelei i le itu lea, sa Ia totogia le tau e tatau ai, peitai e finagalo o Ia ina ia e faia mea e tatau ona e faia, tusa lava pe tiga.

Ou te alofa i le Alii, ma ou te alofa i le Tama na auina mai o Ia. O a tatou avega o le le fiafia, agasala, ma le tausalaina e mafai ona faataatia i Ona luma, ma i Ana tuutuuga agalelei, e mafai ona makaina mea taitasi i lau aitalafu ua "totogi atoa."

"O loo o faapea mai Ieova, o mai ia, ina tatou filifili ia, e ui lava ina pei o ofu mumu a outou agasala, e sisina ia e pei o le kiona;

e ui lava ina mumu ia e pei o le ie ulaula, e avea e pei o fulufulu mamoe” O lona uiga, fai mai Isaia, “afai tou te gauai ma outou faalogo” (Isaia 1:18–19).

### O Mai ia te la

O le mau “aoao le poto i lou taulealea; ioe, aoao i lou talavou e tausi i poloaiga a le Atua” (Alema 37:35) o se valaaulia faatasi ma le folafolaga o le filemu ma le puipuiga mai le fili. “Aua nei inoino se tasi i lou taulealea; a ia fai oe ma faaaoao i e ua faatuatua, i le upu, ma le amio, ma le alofa, ma le loto, ma le faatuatua ma le le gaoia. (1 Timoteo 4:12).

Aua nei e mafaufau faapea o le a sologa lelei mea uma i lou olaga. E oo lava foi ia i latou o loo ola e pei ona tatau ai, o nisi taimi o le a matua faafeagai lava. Faafeiloai luitau taitasi o le olaga ma le faamoemoe ma le mautinoa, ona e maua lea o le filemu ma le faatuatua e tausia ai oe i le taimi nei ma le lumanaia.

Mo i latou e lei maua lava faamanuiaga uma ua outou manatu tou te mananao ai, ou te talitonu ma le atoatoa, e leai se aafiaga po o se avanoa e tatau ai mo le togiola ma le faaolataga, o le a le maua e outou na o loo ola faamaoni. Ia tumau le agavaa; ia tumu i le faamoemoe, ma ia lototatalo. E i ai lava le ala e foia ai. O le a taialaina oe e le meaalofa o le Agaga Paia ma faatonutonu au taga.

Afai o oe o se tasi o i latou o loo tauivi ma le tausalaga, le fiafia, po o le faaatu ona o mea sese sa e faia, pe ona o faamanuiaga e lei oo mai lava, faitau ia aoaoga faamautinoa o loo maua i le viiga “O Mai ia Iesu”:

*O mai ia Iesu, e mafatia,  
I agasala, ma puapuaga.  
Na te avea outou i le lagi  
E faatuatua e mapu ai.*



*O mai ia Iesu; Ua alofa,  
Ma lavea'i outou ua se.  
E taitai e lona alofa  
Outou mai le pogisa.*

*O mai ia Iesu; Efaafogofa  
Ia outou olega uma.  
Epuipui mai o le au agelu  
Ia te outou mai luga?*<sup>1</sup>

O a'u, faatasi ai ma o'u Uso a Apostolo, o se molimau faapitoa a le Alii o Iesu Keriso. O lena molimau e faamautu i taimi taitasi ou te lagonaina ai i lo'u lava loto, po o isi foi le aafiaga faamama o Lana taulaga paia. O la'u molimau, faatasi ai ma o'u Uso, e moni. Ua tatou iloa le Alii. E le o se tagata ese o ia i Ana perofeta, tagatavaai, ma talifaaaliga.

*O a tatou avega  
o le le fiafia, aga-  
sala, ma le tau-  
salaina e mafai  
ona faataatia i  
Ona luma, ma  
i Ana tuutuuga  
agalelei, e mafai  
ona makaina  
mea taitasi i  
lau aitalafu ua  
“totogi atoa.”*

Ou te malamalama tou te le atoatoa, ae o loo outou savavali i luga o le ala. Ia maua le lototole. Ia iloa, soo se tagata lava e i ai se tino, ua i ai le mana e faatoilalo ai le e leai se tino.<sup>2</sup> Ua le maua e Satani se tino; o lea soo se taimi lava e te fetaiai ai ma faaosoosoga, ia iloa e te malosi atu i na faaosoosoga uma pe afai e te faaaogaina le faitalia na tuuina atu ia Atamu ma Eva i le faatoaga ma tuufasolo mai ai i lenei lava tupulaga.

Afai tou te sagisagi atu ma le faamoemoe ma le naunautai e faia mea ua finagalo le Alii tou te faia—e na o le pau lava na o mea o loo faamoemoe mai i ai. ■

*Mai se saunoaga i le faigalotu, “O Upumoni e Sili Ona Taua le Iloaina,” a le Iunivesite o Polika Iaga i le aso 6 Nov., 2011. Mo le tusiga atoa i le gagana Peretania, asiasi i le speeches.byu.edu.*

### FAAMATALAGA

1. “O Mai ia Iesu,” Viiga, nu. 65.
2. Tagai Aoaoga a Peresitene o le Ekalesia: Iosefa Samita (2007), 480.

## USU LE VIIGA E SILI ONA E FIAFIA I AI

**F**aatoa uma ona ou fanau i le ma tama teine, o Repeka. Sa matua luluti o'u tiga, ma sa ou le lava.

Ina ua tuuina mai Repeka i o'u lima, sa ou maua se lagona lofituina ua tatau ona ou usuina le viiga e sili ona ou fiafia i ai, O le Atua Lo'u Tama" (*Viiga*, nu. 184). O la'u uluai tali o le, "E leai, ua ou matua le lava. O le a ou usuina ia te ia i se taimi mulimuli ane." Ae na toe oo mai lava le manatu. O lea, e ui lava ina ou vaivai, ae sa amata ona ou usuina le fuaiupu muamua. Sa usu mai ai foi ma lo'u toalua ma lo'u tina.

Ina ua uma le pese, sa ou faalogoina se lagona faapitoa i totonu o le potu. E oo lava i le fomai, lea na oo lava i le taimi lea o la e tu i lona tulaga faapolofesa ma faaeteete, sa tafe ifo loimata i ona alafau. Sa ia faafetai mai ia i matou i le usuina o se pese mata-gofie. Fai mai a ia, mai tausaga uma

na ia faafanauina ai pepe, na te lei maua lava se lagona e faapei ona ia maua i lena taimi.

Sa ou tomanatu i lena aafiaga ma mafaufau ai pe ou te alu e sue se lipine o le viiga e ave ma ia. Ae paga lea, sa ou pisi i mea o le olaga ma galo ai.

Ona oo mai ai lea o le aso ou te toe alu ai e siaki a'u. Ina ua savali mai i totonu le fomai, sa susulu ona foliga, ma sa ia opoina atu. Fai mai o ia, sa le mafai ona aveese lena pese mai lona mafaufau ma sa ia taumafai foi e sue le pese i le Initoneti ina ia mafai ai ona ia usuina i lona aiga. O ii na faamanatu mai ai e le Agaga Paia sa tatau lava ona ou sau ma aumai se kopi o le pese mo ia. Sa ou folafola atu ia te ia o le a ou toe foi mai ma le musika a o lei atoa se vайaso.

O le po lena sa ou tatalo ai mo se fesoasoani ia ou

iloa ai le fatuga o le pese e sili mo ia. O le aoauli na sosoo ai, sa ou okaina ai se CD o loo i ai le pese. Ina ua taunu mai i le meli i nai aso mulimuli ane, sa ou le manofo i le fia tuuina atu ia te ia.

Sa matuai fiafia o ia ina ua maua ma sa faafetai mai mo le meaalofa. Sa ia fai mai na te le o mautinoa pe aisea, ae e taua tele ia te ia ona faasoa lenei pese ma lona aiga. A o ma talatalanoa pea, sa ou faamatala atu ia te ia lo'u fiafia i le pese faapea foi la'u molimau i upumoni o loo aoao mai ai.


A o alu la'u taavale i le fale i lena aso, sa ou lagonaina le alofa o lo tatou Tama Faalelagi mo se tasi o Ona afafine—o la'u fomai. Na te silafia ma alofa ia te ia, ma e finagalo o la ia malamalamama, e mafai foi e ia ona toe foi atu e toe mau faatasi ma Ia. ■

Angela Olsen Center, Ohio, ISA

|na ua uma le  
matou pese, o  
le fomai, lea na  
oo lava i le taimi  
lea o la e tu i lona  
tulaga faapolofesa  
ma e faaeteete  
foi, sa tafe ifo loi-  
mata i ona alafau.



**A**isea e le vaavaia ai "pea" e le Tama Faalelagi i tatou ma lapata'ia?



## O LANA FOLAFOLAGA O LE MAUA PEA LAVA PEA

**A**ou saofai i le sauniga faamana-tuga ma mafaufau i le tatalo o le areto, sa saga oo mai pea lava pea ia upu i lo'u mafaufau: "ina ia latou maua pea lona Agaga e faatasi ma i latou" (Moronae 4:3; MF&F 20:77).

"Pea," o loo fai mai ai—ae le na o ni taimi faapitoa. Aisea la, i nai masina na muamua atu, sa le musuia ai a'u ma lo'u toalua pe faapefea ona pui-puia le ma atalii e 11 tausaga le matua na maliu i se faalavelave tautaavale? Aisea e le puipuia ai "pea" e le Tama Faalelagi i tatou ma lapata'ia?

Sa aoaoina au i le Peraimeri ma sa ou talitonu o le a puipuia i tatou e le Agaga Paia. Na te faaaogaina le leo lemu, filemu e puipuia ai, taiala, ma lapataia i tatou i faigata. Sa i ai lava le mafaufau lea ia te au talu ona maliu Ben. Ua ou matua misia lava o ia, ma sa tagitu'i lo'u loto mo se malamalama ma le filemu.

O fea sa i ai la'u leo o le lapataiga? O fea sa i ai le Agaga Paia? Sa ou

manatu o la sa ma faia le mea sili ina ia amiontonu. Sa totogi a ma sefuluai, auai i sauniga, ma galulue i soo se mea lava e poloaiina ai. Sa mamao i ma'u mai le atoatoa, ae sa fai a matou afiafi faaleaiga ma suesue i tusitusiga paia. Sa ma taumafai.

Tusa o le taimi lea sa ou nofo ai i le vasega a le Aualofa a o faamatala e le faiaoga se tala i se tasi o ona aiga. A o tu i se moli o le auala, sa maua e lea tagata o lona aiga se uunaiga ma'oti, e tu ai pea i le mea la e i ai pe a sau le moli lanumeamata. Sa ia usitai i le uunaiga, ma na toeoe o le taimi lava lea na alamu ane ai se lolole i le alakolosi, a o momu le moli mumu. Pe ana ia le faalogo ma usita'ia le leo, semanu e mafatia o ia ma lana fanau pe oo ai lava ina maliliu.

Sa matuai taia a'u i le tala, ae a o ou nofo i lo'u nofoa ma loimata ma sauni-uni ou te tu i luga e alu ese mai le potu, sa liloia au i se mafanafana tele.

Sa ou lagona le filemu e moni lava sa i ai le Agaga Paia ia te au. O le tulaga na ou i ai, sa lei i ai o Ia o se leo o le lapataiga, ae o se faamafanafana.

Mai lava i le taimi o le mea na tupu ia Ben, sa ou lagonaina le malosiaga i luga atu o lo'u lava malosi, ma sa faamafanafanaina au i le alofa o lo'u Tama Faalelagi. E i ai taimi e le lava ai lo'u malamalama pe aisea e tutupu ai nisi o mea, ae ou te lei fesiliglia lava Lona alofa.

Ou te faatuatua e malamalama le Atua i mea uma ma o le a le tuulafoia lava i tatou. E tele matafaioi a le Agaga Paia i o tatou olaga. E mafai ona Ia puipuia i tatou, ae Na te taialaina foi i tatou, faamafanafana i tatou, aoao i tatou, ma aumaia le malamalama ma isi faamanuiaga.

Sa ou aoaoina e tausia lava e le Tama Faalelagi Ana folafolaga. Na i ai "pea" lava o Ia ma au. ■

Robyn Casper, Iuta, ISA



## SA MUSUMUSU MAI LE AGAGA IA TE AU

**E** sole! Foi mai!" sa valaau mai ai se leo faanatinati.

Sa ou faliu ma iloa atu ai ni tamaiti se toalua pe lima ma le fitu tausaga le matutua i se pakaga o taavale o se faleoloa, ma loimata o tafe ifo i o la'ua alafau. Sa foliga popole le faatauoloa a o ia tauvalaau atu ia i la'ua.

A o ou faliu atu i la'u taavale, sa musumusu mai le Agaga, "E mafai ona e fesoasoani i i." Sa lemu le musumusu ae e matua manino lava ma sa lei pine ae ou tamoe atu i le pakaga i tamaiti.

Sa ou maua atu le alii matua o tu i autafa o se veni lanuenaena. Sa ou faalatalata atu ma tootuli ifo i ona autafa.

"Talofa. O lou igoa o Christina.

O a mai oe?"

Ina ua ou fai atu na upu, na tagi atili ai o ia ma ufiufi ona mata i ona lima. Na oo mai le faatauoloa ma le isi tamaiti.

"Ou te manatu e na o le faa-Falani la te iloa," o le tala lea a le faatauoloa. "Na matou mauaina o taufetuli i le faleoloa, ua se."

Sa ou toe faailoa atu a'u i tamaiti i le faa-Falani. O le faa-Falani o la'u gagana lea, ae ua leva ona ou le toe tautala ai talu ona ave a'u e se aiga e faa-Palagi a o ou laitiiti. O le mea masani lava, e le lelei la'u faa-Falani. Ae ui o lea, o le taimi lena sa mafai lava ona manino la'u tautala. Sa manino upu i lo'u mafaufau ma lo'u leo a o ou faamafanafanaina tamaiti.

A o masusu, sa faamatala faatope-tope mai e le alii matua sa le mafai e i la'u ma lona uso ona maua o la matua i totonu o le faleoloa ma o lea sa taufetuli ai i fafo e sue ai. A o ou faalogologo, sa amata ona vavala mai ia te au le maofa ona e le gata ina sa ou talanoa atu i ai i le faa-Falani ae sa ou malamalamama lelei foi ma faamafanafanaina ni tamaiti fefefe se toalua.

"Ua la leiloa o la matua ma o lea sa mananao ai e faatalitali mo i la'u ia le latou taavale," sa ou faamatala atu ai i le faatauoloa. Sa ta'u mai e le alii laitiiti ia igoa o o la matua, lea na ou tuuina i le faatauoloa ina ia mafai ai

Sa ou matauina ni tamaiti se toalua pe tusa o le lima ma le fitu tausaga le matutua o taufetuli mai le pakaga o taavale o le faleoloa ma loimata o tafe ifo i o la'ua alafau.

ona ia faasalalaunuia i la latou masini tauvalaau. I ni nai minute mulimuli ane, sa vaaia e le tamaiti i lona tama o sau i fafo o le faleoloa ma sa ia tamoe e faafetaiai.

A o ou mulimuli atu i le tamaiti i lona tama, sa ou iloaina ua ou le mafai e oo lava i se faatofa i le faa-Falani. Sa le manuia a'u taumafaiga e toe fai atu se isi tala i tamaiti e malamalamama ai, ma ua leai lava se isi mea ua na o ni nai upu iti. Sa iu ina ou toe nanu, ma fai atu i le tamaiti, "Tofa. Manaia ua ta feiloi."

Ina ua ou tuua ia tamaiti i o la matua, sa tumu lo'u loto i le faafetai. Sa galue le Tama Faalelagi e ala mai ia te au, e faamafanafanaina Ana fanau iti e toalua. Sa ou maua le lotomaualalo ona sa mafai e le Alii ona faalautele o'u tomai faatauvaa e faataunuu ai Ona faamoemoega. Sa ou faafetai i le molimauina o mea e mafai ona tutupu pe a tatou ofoina atu i tatou lava ia te Ia pe a valaau i ai, e oo lava i le lotolotoi o tulaga e ono le oo i ai. ■  
Christina Albrecht Earhart, Uosigitone, ISA

# UA TATAU ONA TATOU O NEI I LE MALUMALU!

I se tasi Aso Sa i le taeao, sa faasilasila mai ai i le uarota se uso faatoa papatiso. O lona igoa o Lydia. Sa vave ona avatu o matou loto ia te ia.

E matua atu Lydia ma tauaso ona o le tele o tausaga sa tauivi ai ma le ma'i suka. Sa vave ona ia masani i tagata o le uarota e ala i o latou leo ma a latou la'a. Na te ta'u maia o matou igoa ma faatalofa mai, ma sa matou le talaina faapea e tauaso.

Ina ua mavae le tausaga sa faatalitali ai, sa feiloai Lydia ma le epikopo ma le peresitene o le siteki mo lana pepa faataga o le malumalu. I le Aualofa i se tasi Aso Sa, sa ia tosoina atu ai au i ona tafatafa ma fai mai, "Na fai mai le peresitene o le siteki ua tatau ona ou alu i le malumalu i se taimi vave e mafai ai. E mafai ona e aveina a'u?"

O le vaiasco muamua o Tesema—o taimi pisi mo i matou uma. Sa ou taumafai e fai ia 'alofaga masani, "E le mafai ona tatou faatali seja aulia Ianuari?"

"Na fai mai le peresitene o le siteki ua tatau ona ou alu i le malumalu i se taimi vave e mafai ai," o le tala lea a Lydia. "E mafai ona e aveina a'u?"

"E leai, ua tatau ona tatou o nei!"

E i ai se vaega o tamaitai o le uarota e o i le malumalu i masina uma, o lea sa ou talosagaina ai i latou e malaga faatasi ma Lydia. Sa matuai pisi foi i latou. Peitai, sa toe fai mai Lydia a o maligi ona loimata, na fai atu le peresitene o le siteki ia te ia e alu i se taimi vave e mafai ai.

O lea na matou malilie uma ai e faia le malaga e 150-maila (241 km) i le vaiasco e sosoo ai i le malaga, sa faatumulia le taavale i talatalanoaga ma faauooga a ni tamaitai se toavalu. Sa matuai fiafia Lydia i lona aafiaga i le malumalu ma le faamanuiaga o le mauaina o ona faaeega paia.

O le vaiasco muamua o Ianuari, sa matua tuga le tulaga na i ai Lydia, ma

sa taofia o ia i le falemai mo se vaa-vaaiiga o faalavelave faafusei. O le vaiaso na sosoo ai, na maliu ai o ia. Ae na malaga Lydia ma faamanuiaga e faavavau na ia mauaina i le malumalu i ni nai vaiaso na muamua.

Mulimuli ane, sa ou faamatalaina le tala i le peresitene o le siteki e uiga i le matou malaga, ma sa ou ta'u atu ia te ia lo'u fiafia tele i lona mauaina o le uunaiga e ta'u atu ia Lydia ua tatau ona alu loa lava i le malumalu.

"E le o le uiga moni o la'u tala ia alu nei loa lava," o lana tali lea. "Ou te fai lava i tagata e faatoa umia pepa faataga ia vave ona o i le malumalu. O le Agaga na talanoa ia Lydia, ae le o a'u!"

Ua aoaoina i tatou uma e Lydia ina ia faalogo i le Agaga ma galue ai loa lava. Ou te faafetai mo lana faama-

natu ina ia faalogo i le leo filemu, itiiti. ■

Mary Holmes Ewen,  
Kalefonia, ISA





Saunia e Elder  
Anthony D. Perkins  
O Le Fitugafulu

# AGAI I LUMA FILE Faatuatua

Ua ola nei le autalavou matutua i le mea ua ta'ua "o le Vaitausaga o Faaiuga." O loo e faia le tele o filifiliga aupito taua o lou olaga, e pei o le "alu i le malumalu, faia o se misiona, o le a'otauina, filifilia o se galuega, ma le filifilia o se soa ma faamauina mo le olaga nei ma le faava-vau atoa i le malumalu sa."<sup>1</sup>

Ou tautala faapitoa atu ia i latou o loo tauivi ma se tasi pe sili atu foi o nei faaiuga taua—o nisi atonu ua gase mai le fefefe i le faia o faaiuga sese po o le manaomia foi o le faamalosiauga ina ia tumau mautinoia i se faaiuga sa faia muamua.

E mafai e lesona e fa o faaiuga musuia na faia e Nifae ona faaitiitia lou fefe ae faateleina lou talitonuga mautinoia e agai i luma, pe a faaaoga.

## 1. Usiusitai i Poloaiga.

O le fuaiupu mulimuli o le talafaamaumau paia a Nifae o loo aotele

mai ai lona soifua: "Aua ua faapea ona poloaiina ai o au e le Alii, ma e ao ina ou usiusitai" (2 Nifae 33:15).

O le faatuatua ma le alofa o Nifae i le Faaola ua faaalia i lona usiusitai i poloaiga a le Atua. Sa tatalo o Ia (tagai 1 Nifae 2:16). Sa ia faitau i tusitusiga paia (tagai 1 Nifae 22:1). Sa ia sailia ma mulimuli i le taitaiga mai se perofeta soifua (tagai 1 Nifae 16:23–24). O lena usiusitai na mafai ai e le Agaga Paia ona mafuta ma le mamana ma Nifae i lona olaga atoa, ma gauai atu ai i faaaliga patino faifai pea.

E tatau foi ia te outou ona tumau latalata i le Alii e ala i le tausia o poloaiga a le Atua. Ou te molimau atu o le usiusitai faifai pea i nai mea iti, e pei o le faitau o tusitusiga paia, tatalo i aso taitasi, auai i sauniga Lotu, gauai atu i fautuaga a perofeta soifua, ma le auauna atu i isi, tou te agavaa ai mo le Agaga—ma faaaliga e aumai ai.

**E mafai e lesona  
e fa o faaiuga  
musuia na faia e  
Nifae ona faaitiitia  
lou fefe ae faa-  
teleina lou tal-  
tonuga mautinoia  
e agai i luma.**

O le atoatoa e le o se mea e muai manaomia mo faaaliga patino i le tagata lava ia. O le mea e muai manaomia o le salamo i aso taitasi (tagai Roma 3:23). Afaia e faamaoni ma atoatoa lelei lou salamo (tagai MF&F 58:42–43), o le a aumaia e le mana



*Na faaalia le faa-tuatua ma le alofa o Nifae i le Faaola i lona usiusitai i poloaiga a le Atua.*

## INA IA FAAITIITIA LE FEFE AE FAATELEINA LE MAUTINOA

1. Usiusitai i poloaiga.
2. Agai i luma i le faatuatua
3. Ola ai i le taimi nei.
4. Nono mai i le malosiaga o isi.

faamama o le Togiola le Agaga e taiala ai oe i faaiuga tuga o le olaga.

### 2. Agai i Luma i le Faatuatua

Manatu faapea o oe o Nifae. Ua fai atu lou tama ia te oe, ua poloaiina e le Alii lou aiga e tuua a outou oa ae o i le vao. Mata e te le fia iloa e uiga i la outou malaga ma lo outou taunuuga?

Ou te manatu semanu e matuai fiafia Nifae pe a na faaalia manino atu e le Alii lona lumanai. Peitai e le o le auala lea na galue ai le Atua ia Nifae, ma e le o le ala foi lea o le a galue ai o Ia ma oe.

A o malaga le aiga o Nifae i le vao, sa na o ia na oo mai i ai faatonuga "mai lea taimi i lea taimi" (1 Nifae 16:29; 18:1). O le vaai atu i lana fai-gamalaga i le olaga ma le mautinoa muamua i le amataga, semanu na te le maua ai le faatuatua maua'i ma aafia na maua ai le faatuatua lea na fesoasoani e avea atili ai o ia o se tagata e pei o Keriso.

Afai o e faatalitali i le Atua e faaali atu po o le a le matata faa-akatemia e te tulimatai, po o ai e te faaipoipo i ai, po o le a le galuega e talia, po o fea e te nofo ai, pe a'oga mo se faailoga maualuga atu, ma pe fia se lua fanau,

atonu o le a le mafai lava ona e laa ese mai lou pa'usisi. Ou te molimau atu e oo mai faaaliga patino na 'o lea taimi i lea taimi."

E finagalo lo tatou Tama Faalelagi ia tatou tuputupu ae, ma e aofia ai le atiinaeina o lo tatou tomai e iloilo mea moni, faia fetuunaiga, ma faia faaiuga. Ae o loo Ia valaaulaina foi i tatou e avatu a tatou faaiuga ia te Ia i le tatalo (tagai MF&F 9:7–9). Na aoao mai e Elder Richard G. Scott o le Korama a Aposetolo e Toasefululua e faapea (e oo mai tali ia tatou tatalo "i se tasi o ala e tolu."<sup>2</sup>

### Faamautinoaga Mautu

"Muamua," na saunoa Elder Scott, "e mafai ona e lagonaina le filemu, mafanafana, ma le mautinoa lea e faamautu mai ai e sa'o lau faaiuga."<sup>3</sup> Na ma iloa ma lo'u toalua o, Christy, lena faamautinoaga mo faiuga taua e aafia ai le olaga atoa—e mafai ona ala mai i tusitusiga paia, ae masani lava pe a uma se tapuaiga i le malumalu.

Mo se faataitaiga, ina ua mavae ona manatunatu loloto ma tatalo, sa tonu ia i ma'ua e tuua lo ma fale fou sa moemiti i ai i Texas, ae talia se galuega fou, ae matou o ma le ma fanau laiti e toaono i Beijing, Saina. Ae sa matua ma manaomia lava se faamautuuga faaleagaga mo lenei suiga taua. Na oo mai se faamautinoaga paia ia i maua—i totonu o le malumalu—a o ma faitauina nei upu i le Mataupu Faavae ma Feagaiga: "O lo'u loto lenei e tatau ona e . . . aua le tele ni aso e te nofo ai i le nofoaga lenei; . . . aua le mafau-fau i au meatotino. Alu i lauelele i sasa'e" (MF&F 66:5–7).





**Semanu ai se fiafia o Nifae pe ana faaalia manino e le Atua i ai lona lumanai. Ae e le o le ala lea sa galue ai le Atua ia Nifae, ma e le o le ala foi lea o le a la galue ai ma oe.**

O le siufofoga o Iesu Keriso i tutsiga paia, e o mai faatasi ma lagona mamana mai le Agaga Paia, na faamautu mai ai e le Agaga Paia, e sa'o le ma tonu e o i Saina.

#### **Lagona Lemautonu**

O le ala lona lua e tali mai ai e le Tama Faalelagi ia tatalo e ala mai lea i se "lagona lemautonu, faaluafesasi o le mafaufau, e ta'u mai ai e sese lau filifiliga."<sup>4</sup>

Ina ua maea mai la'u misiona mai Taiuani, sa ou mafaufau o tulafono faavaomalo o se filifiliga lelei lea mo se galuega. A o ma mafaufau ma Christy i lena lumanai, sa ma malamalama toe lima tausaga taugata o le a'oga o i luma.

Sa matuai pau le tamaoaiga i le I.S. ma sa ututi a ma tupe, o lea sa ma manatu ai o le auai atu i le Ea Fosi a le ROTC o se filifiliga poto lea e totogi ai la'u aoga. Ae ina ua ou sue i le suega

ma faatumu pepa, ma te lei maua se mafanafana i le faia o se tautinoga. E leai se manatu faaluafesasi po o se lagona pogisa na oo mai—na o le leai lava o se toofilemu.

O lena faaiuga tele le talafeauga tautupe sa musuia, i se isi itu, aua semanu e avea au o se loia leaga!

#### **Faatuatuaga Paia**

E tali mai le Atua i se ala lona tolu: e leai se tali "Afai e te ola agavaa ma o loo ogatusa lau filifiliga ma aoaoga a le Faaola ma e manaomia ona e gaoioi," na saunoa mai Elder Scott, "ia faia loa ma le faatuatuaina."<sup>5</sup>

O le taumafaiga a Nifae ia maua mai papatiso o loo faapupula mai ai le ala e ao ai ona tatou faaauau ma le faatuatuaga paia. Na ia tusia:

"Ma sa taitai a'u e le Agaga, ona sa ou lē mua'i iloa muamua mea e tatau ona ou faia.

"E ui i lea sa ou alu atu" (1 Nifae 4:6–7).

O le a oo mai taimi o au faaiuga fai, lea e le mafai ai ona e toe faatuutuu ma ua tatau ona faatino. Ua ou aoaoina e pei ona sa aoao mai Elder Dallin H. Oaks o le Korama a Aposestolo e Toasefululua, "o le a tatou mauaina uunaiga a le Agaga pe a tatou faia mea uma tatou te mafaia, pe a tatou galulue i fafo i le la nai lo le nofonofo i le paolo ma tatalo mo se taitaiga po o le a le laasaga muamua e fai."<sup>6</sup>

E faapei o Nifae, o le a faamautu mai e le Agaga pe lapatai mai foi louala e te filifilia i le taimi e tatau ai.

### **3. Ola ai i le Taimi Nei**

O le tautinoga a Nifae i le malaga i le nuu folafolaina na matua ese-e lava mai ona uso o Lamana ma Lemuelu. Sa la filifili e o, ae sa lei aveesea lava o la'ua loto mai Ierusalem. Sa toe fau e Nifae lana aufana na gau e tulimanu ai mo meaai ma saili uamea e fau ai se vaa, ae foliga o la sa malolo lelei ona uso i le faleie.

E toatele ni Lamana ma ni Lemuelu i le lalolagi i le taimi nei. Ae o loo manaomia e le Alii ni alii ma ni tamaitai e matuai tautino atu e pei o Nifae. O le a e iloa le alualu tele i luma i le olaga pe a e tautino atu atoa i au faaiuga, ma taumafai e faalautele ou tulaga o i ai, ma pe a o e fuafua mo le lumanai.


Na faatino e Nifae le fautuaga poto a Peresitene Thomas S. Monson: "O le faasolo o mafaufauga i aso ua tuanai ma le momoo mo le lumanai, e ono maua ai se nofogofie, ae o le a

le suitulaga ai le ola ai i le taimi nei. O le aso lenei o lo tatou avanoa, ma e tatau ona tatou pue maia.”<sup>7</sup>

#### 4. Nono mai le Malosi o Isi

Tusa lava pe ua maea ona sailia le Agaga, agai i luma i la tatou faaiuga, ma ua matua tautino atu lava i ai, e ono tulai mai pea lava le masalosalo ma afua ai ona tatou fesiligia la tatou faaiuga. O ia tulaga e mafai ai e se tagata faatuatuaina o le aiga po o se uo ona maua mai ai se fautuaga ma se malosiaga e tumau ai i le ala. Ou te manatu i le gasologa o le malaga, na avea ai le toalua o Nifae ma ana taula faatuatuaina.

***E mafai e se tagata faatuatuaina o le aiga po o se uo ona aumaia se fautuaga ma se malosiaga e tumau ai i le ala.***



Na oo mai ia te au se lagona talisapaia mo le toalua o Nifae ina ua ou asiisi atu i le Falemataaga o Talafaasolopito o le Eklesia. Sa ou maofa i se atavali iina o Nifae o loo saisai i le pou o le vaa, ua matua susu pala i le afa matautia.<sup>8</sup>

Sa i autafa o Nifae lona toalua ma se tasi o lana fanau. Sa aafia foi o ia i le afa lava lea e tasi ma luitau e pei o Nifae, ae sa le talia e ona mata ma sa opogi mai ona tauau i ona lima. O le taimi lea na ou iloa ai, ua matua faamanuiaina lava au i le i ai o se toalua lotonuu e tuuina mai le malosiaga i taimi o o'u tofotofoga. Ou te faamoe-moe o faapena foi ona avea au ma malosiaga ia te ia.

Uso e, o le tausisia ma faalautele o le malosiaga tou te atiinae (po o le a atiinae) o se faifeatalai po o isi auau-naga amiontonu, o lau aseta aupito sili lena i le avea ai o se tane ma se tama manaomia. Tuafafine, o le nofouta

faaleagaga, faatuatua, ma le lototele e mulimuli ia Iesu Keriso, o nisi ia o outou uiga auaumama silisili o se ava ma se tina.

Ou te valaaulia oe ia avea ma ituaiga tagata e mafai e lou toalua o i ai nei po o le lumanai, ona nono mai ai mo fautuaga poto ma le malosiaga. O se tane amiomama ma se tamaitai agavaa, e faamauina mo le olaga nei ma le faavavau atoa i le malumalu, e mafai ona faia mea faigata o se paaga tutusa.

Ou te folafola atu afai tou te faaaogaina lesona na aoao mai ia Nifae ma perofeta o onaponei, e uiga i le faia o faaiuga, o le a taitaiina outou i faaaliga patino mai “lea taimi i lea taimi.” A o e agaigai atu i luma i le faiga o au faaiuga, ia e faia e pei ona faia e Nifae, ia faatuatua e fai atu:

“Sa taitai a’u e le Agaga, ona sa ou lē muā’i iloa muamua mea e tatau ona ou faia.

“E ui o lea sa ou alu” (1 Nifae 4:6–7). ■

*Mai se saunoaga i le faigalotu “E ui o Lea Na Ou Alu Lava,” i le Iunivesite a Polika Iaga i le aso 4 Feb., 2014. Mo le saunoaga atoa i le gagana Peretania, asiisi i le speeches.byu.edu.*

#### FAAMATALAGA

1. Robert D. Hales, “Mo Le Au Perisitua Arona: Sauniuni mo le Vaitau o Faaiuga,” *Liahona*, Me 2007, 48.
2. Richard G. Scott, “Faaaogaina o le Meaalofa Faalelagi o le Tatalo,” *Liahona*, Me 2007, 10; faamamafaina i le vaega autu.
3. Richard G. Scott, “Faaaogaina o le Meaalofa Faalelagi o le Tatalo,” 10.
4. Richard G. Scott, “Faaaogaina o le Meaalofa Faalelagi o le Tatalo,” 10.
5. Richard G. Scott, “Faaaogaina o le Meaalofa Faalelagi o le Tatalo,” 10.
6. Dallin H. Oaks, “I Lona Lava Taimi ma i Lana Lava Ala,” *Liahona*, Aok. 2013, 26.
7. Thomas S. Monson, “Sailiga o le Oa,” *Liahona*, Me 2003, 20.
8. Tagai Fesoasoani, by K. Sean Sullivan, in “The Book of Mormon: A Worldwide View,” *Liahona*, Dec. 2000, 37.

# SAILI O IA

“Se a le mea tou te saili ai le ua soifua i e ua otí?

“E le o iinei o ia, a ua tu.”

(Luka 24:5-6.)



# ONA O IOSEFA

Aoao auala e ono e eseese ai lou soifua (pe mafai foi)  
ona o le Perofeta o Iosefa Samita.

**Saunia e Ted Barnes**

Matagaluega a le Au Perisitua

**N**a maliu Iosefa Samita i le 170 tausaga talu ai. Na o le 38 tausaga na soifua ai, ma sa faaalu le tele o ona taimi i nofoaga e matuai le iloa lava, atonu e te le mauaina vagana o ni faafanua ua matuai auiliili. Atonu e tele mea sa ia faia i lona soifua ua outou iloa. Ae pe ua e mafaufau ea pe faapeflea ona aafia ai lou lava olaga? E ui ina tele naua na auala ua le mafaitaulia, ae e mafai ona e amata i ala nei e ono:


Ona o Iosefa Samita:


## 1. Ua e malamalama ai pe o ai moni lava le Atua ma lesu Keriso.

Tusa lava foi pe ana leai Iosefa Samita, e te talitonu lava i le Atua le Tama ma Iesu Keriso. E mafai ona e maua molimau a le Tusi Paia. Ae mafaufau i le loloto ma le 'oa o lou malamalama ona o le mea sa toefuatai mai e Iosefa Samita—o molimau maua'i, mautu a le Tusi a Mamona, Mataupu Faavae ma Feagaiga, ma le Penina Tautele. Mo se faataitaiga, ua e iloa se mea e le o iloa e le toatele o le lalolagi: na afio atu le Faaola toetu i Amerika—faamaonia, i Ana upu, o Ia e le na o “le Atua o Isaraelu, [ae] o le Atua foi o le lalolagi uma” (3 Nifae 11:14).

Mafaufau i le faamalosia o lau molimau i le Tama Faalelagi ma Iesu Keriso, i le molimau mamana a perofeta pei o Nifae, Alema, ma Moronae—ae le ta'ua ai Iosefa Samita lava ia, o le na tautino mai: “O loo soifua o Ia! Aua na ma vaai ia te ia, i le itu taumatau o le Atua” (MF&F 76:22–23). I se vaitau ua luitauina ai le faatuatua i le Atua ma Iesu Keriso ma tele ina lafoai, se faamanuiaga ina a tele o le i ai lea o se malamalama faaopoopo!

  
**LESONA I ASOSA**  
O Le Autu o le Masina Lenei;  
O Le Liliuese ma le  
Toefuataiga





## 2. Ua e iloa o oe o se atalii/afafine o le Atua—e faapena foi tagata uma.

Atonu o le upumoni aupito taua na toefuatai e Iosefa Samita o le meamoni lea e uiga i lo tatou sootaga ma le Atua.<sup>1</sup> O Ia moni lava o lo tatou Tama. Pe ua e tu ma mafaufau i mea ua tafe mai lena mea moni? Ua suia ai lau vaaia ia te oe lava: tusa lava po o a mafaufauga o le lalolagi ia te oe, ua e iloa o oe o se atalii/afafine faapelepele o le Atua, ua i ai i totonus ia te oe Ona uiga auauamama. Ua suia ai le ala e te vaai atu ai i isi: ma faafuasei ai tagata uma—*tagata uma*—o lou uso po o lou tuafafine. Ua suia ai le ala e te vaai ai i le olaga lava ia: o ona olioliga uma ma tofotofoga o se vaega o le fuafuaga a le Tama Faalelagi e fesoasoani ai ia te oe ia avea e faapei o Ia. E le se mea leaga foi lou pese ai i le Peraimeri!<sup>2</sup>



## 3. E mafai ona faavavau lou aiga.

Aisea ua soona toatele ai tagata e faaluafesasi i le taua o le faaipoipoga ma le aiga? Atonu ona latou te le iloaina le aoaoga faavae, na toefuatai e ala mai ia Iosefa Samita, o le faaipoipoga ma le aiga ua faauuina e le Atua ma e tatau ona faavavau (tagai MF&F 49:15; 132:7). E le na o ni agamasani na faatuina e le tagata ua le toe faaaogaina—o ni vaega ia o le faatulagaga e faavavau o le lagi. Ma faafetai i ki o le perisitua ma sauniga o le malumalua ia na toefuatai mai ia Iosefa Samita, ua mafai ai ona amata lou aiga e faavavau iinei i le lalolagi.



## 4. Ua mafai ona e maua le perisitua ma ona faamanuiaga.

Ona ua toefuatai mai e le Atua le perisitua e ala mai ia Iosefa Samita, ua mafai ai ona e papatiso, ma maua le meaalofa o le Agaga Paia. Ua mafai ona e sailia faamanuiaga faaleperisitua o le faamalologa, faamafanafanaga, ma le taitaiga. Ua mafai ona e osia feagaiga paia e fusia ai oe i le Atua. Ma ua mafai ona faafou au feagaiga i vaiaso taitasi pe a e ai ma inu i le faamanatuga. E ala mai i sauniga o le perisitua, e ulufale atu ai le mana o le Atua i lou olaga (tagai MF&F 84:20–21). E leai se mea o nei mea e mafai e aunoa ma le galuega na faataunuina e Iosefa Samita.



# 5.

Ua saoloto oe  
mai vaisu o mea  
faataumaoi.

Pe e mafai foi pe a e usitai i le faaliga na maua e Iosefa Samita i le 1833—a o lei taitai ona faamaonia i suesuega o le tapaa e afua ai le kanesa o le mama, ma o meainu malolosi e soota'i ma faamai o le atepili. A ua i ai se perofeta ua faaalia mai le poto o le Atua, aisea e te faatali ai i le poto o le lalolagi e iloa ai? Ua faaalia i le Upu o le Poto e popole le Atua e le gata i o tatou agaga ae faapea foi o tatou tino (tagai MF&F 89). O le mea moni, e ui ina faaalia i faaliga ia Iosefa Samita o le i ai o se tino faitino tatou te faapei—e le itiiti ane—o lo tatou Tama i le Lagi, o le e i ai foi se tino o aano ma ivi (tagai MF&F 130:22).

# 6.

E mafai ona e iloa le  
moni mo oe lava, e ala  
i le Agaga Paia.

Ina ua savali atu le alii talavou o Iosefa i le Vao Paia i le 1820, o le manatu taatele o le tele o lotu ua le toe i ai ni mea e igoa o faaliga. O le Uluai Faaaliga Vaaia a Iosefa na faamaonia ai le sese. O loo tatala le lagi—ma e le mo na o perofeta. Soo se tasi e i ai se fesili, e mafai ona


## AUAI I LE TALANOAGA

### O MEA E MAFAUFAU LOLOTO I AI MO LE ASO SA

- E mafai faapefea ona ou faamalosia la'u molimau i le Perofeta o Iosefa Samita?
- E sili atu faapefea ona ou faaalia le lotofaafetai mo le perofeta soifua e ala i a'u upu ma taga e fai?

### O MEA E TE ONO FAIA

- I le lotu, faatasi ai ma lou aiga ma uo, po o ala o faasalalauga, faasoa le ala ua faatosinaina ai e le Perofeta o Iosefa Samita lou olaga.
- Pei lava o le mea na faia e Iosefa Samita, fai au fesili i le Tama Faalelagi. Faaavanoa se taimi e tootuli ai i le tatalo ma ole atu ia te la mo se taitaiga. A uma, faatalitali ma faalogologo mo manatu ma lagona. la tusia ou manatu i lau api o talaaga.
- Faitau le lauga “Iosefa Samita” a Elder Neil L. Andersen o le Korama a Aposetolo e Toasefululua mai le konafesi aoao ia Oketopa 2014. Fai se fuafuaga e faaaoga manatu e lua o loo ia tuuina mai, e fausia ai ma faasoa lau molimau e uiga ia Iosefa Samita.



maua se tali e ala i le saili ma le lotomualalo, ma le maelega i le tatalo (tagai MF&F 42:61; 88:63). Mo se faataitaiga, e mafai ona e iloaina mo oe lava o Iosefa Samita o le perofeta a le Atua, i le ala lava e tasi lea na iloa ai e Iosefa: e ala i le ole atu i le Atua lava ia.

O le lisi lea ua na o se amataga. O le a se mea o le a e faaopoopo i ai? Ua faapefea ona ese lou olaga ona o Iosefa Samita? ■

### FAAMATALAGA

1. Tagai i le *Aoaoga a Peresitene o le Ekalesia: Iosefa Samita* (2007), 37–44.
2. Tagai i le “O Au O Se Atalii o le Atua,” *Viiga*, nu. 184.

# “E sili atu ona taua ia i tatou le perofeta soifua nai lo le perofeta ua maliu. . . .

“E lei faatonuina Noa i faaaliga a le Atua na oo mai ia Atamu. . . .

Sa manaomia e Noa se faaaliga e patino ia te ia lava. O le mea lea, o le perofeta aupito taua e oo mai i le taimi nei ia te oe ma au o ia lea o loo soifua mai i o tatou aso ma le augatupulaga, o le o loo faaalia mai i ai e le Alii Lona finagalo mo i tatou. O le mea lea, o le mea aupito sili ona taua e mafai ona tatou faitau i ai, o soo se upu lava lea a le perofeta o loo i ai i totonu o Mekasini a le Ekalesia i masina taitasi. O faatonuga mo i tatou e uiga i mea e tatau ona tatou faia i lea ono masina ma lea ono masina, . . . o loo lomia i le mekasini o le [Liahona]. . . .”

“la faaeteete ia i latou o e faatuina mai perofeta maliliu e faasaga tau mai ai i perofeta soifua, **aua e sili lava i taimi uma perofeta soifua.”■**

*Mai ia Peresitene Ezra Taft Benson (1899–1994),  
“Fourteen Fundamentals in Following the Prophet”  
(Brigham Young University devotional, Feb. 26, 1980),  
2, speeches.byu.edu.*



## Faasoa Mai Ni Ou Manatu

O le a le uiga ia te oe o le lagolagoina o perofeta soifua? Faasoa atu ou manatu i ou aiga ma ue po o luga foi o ala o faasalalauga faaagafesootai.



# OLE FAATAITAIGA ALE FAAOLA *Usiusitai*<sup>OLE</sup>

O Lana faataitaiga ua seti ai le mamanu  
mo i tatou uma e mulimuli ai.


---

“**M**ai lesona uma ua tatou aoaoina mai le soifuaga o le Faaola, e leai se lesona ua sili ona manino ma mamana nai lo le lesona o le usiusitai,” na aoao mai ai Elder

Robert D. Hales o le Korama a Aposetolo e Toasefululua i le konafesi aoao ia Aperila 2014. O le faataitaiga a le Faaola ua aoao mai ai i tatou e le gata i le pe *aisea* e taua ai le usiusitai i le Tama Faalelagi ae faapea foi le pe mafai *faapefea* ona tatou usiusitai. A o e iloiloina faataitaiga nei mai Lana galuega, mafaufau pe mafai faapefea ona e faatulagaina se ala mo oe e te mulimuli ai i lou olaga.

“**O U TE LE  
SAILIA LO’U  
LAVA LOTO, AE  
OLE  
FINAGALO  
OLE TAMA  
OLE NA  
AUINA MAI AU.”**

(Ioane 5:30; tagai foi  
Ioane 6:38; 8:28-29; 14:31)



AUTALAVOU

## O LE A SE MEA E MAFAI ONA E FAIA?

Na saunoa Elder Hales, "Na aoao i tatou e lesu ina ia usiusitai i se gagana faatauvaa lea e faigofie ona malamalama i ai: "Afai tou te alofa mai ia te au, ia outou tausi mai i au poloaiga" [Ioane 14:15], ma le 'Sau, ma mulimuli mai ia te au' [Luka 18:22]."

**O le a se mea e te faia nei ina ia atili ai ona e usiusitai?**



2



3



**1.** E ui ina sa leai se agasala a lesu, ae sa gauai atu o la ina ia papatisoina "ia faataunuu ai le amiotonu uma" (Mataio 3:13-17; tagai foi 2 Nifae 31:4-7; Ioane 3:5).

**2.** Ina ua 12 ona tausaga, ina ua maua atu e losefa ma Maria ia lesu o aoao atu i totonusi o le malumalu, sa la "gauai atu ia te i la'ua," ma sa toe foi atu ma le usiusitai i le fale faatasi ma i la'ua (tagai Luka 2:42-51).

**3.** E ui ina sa ole atu o la pe mafai ona aveese le ipu mai ia te la, ae sa gauai atu o la i puapuaga i le Faatoaga o Ketesemane (tagai Mataio 26:36-44; Luka 22:39-54).

**4.** Sa la tausia le Sapani ma sa auai atu i sauniga i le sunako (tagai Luke 4:16-44).


**5.** Sa gauai atu lesu ina ia faamasinoina e tagata ina ia faataunuu ai le galuega ma le mamalu o le Tama (tagai Isaia 53:7; Mataio 26:53; Mose 1:39).

**6.** Sa la faamaedaina Lana galuega i le faatagaina o tagata amioleaga e faasatauro o la (tagai Mataio 27:35; Ioane 10:17-18; Kalatia 1:3-5).

### ONA SA USIUSITAI LO TATOU FAAOLA

"Ona sa usiusitai lo tatou Faaola, na la togolaina ai a tatou agasala, ua mafai ai ona tatou toetutu ma saunia le ala mo i tatou e toe foi atu ai i lo tatou Tama Faalelagi, o le na silafia o le a tatou faia ni mea sese a o tatou aoao e usiusitai i le olaga faaletino. A tatou usiusitai, ua tatou talia Lana taulaga, aua [tatou] te talitonu e ala i le Togiola a lesu Keriso, e mafai ai ona faaolaina tagata uma, e ala i le usiusitai i tulafono, sauniga, ma poloaiga ua tuuina mai i le talalelei."

Elder Robert D. Hales o le Korama a Aposetoilo e Toasefululu, "Afai Tou Te Alofa Mai ia te Au, la Outou Tausi Mai i Au Poloaiga," Liahona, Me 2014, 35.





1



6



7



4

“I LE MISIONA  
ATOA A [KERISO],  
'NA IA  
**MAFATIA I  
FAAOSOOSOGA**  
AE SA LE I GAUAI  
ATU LAVA  
**[IA I LATOU]**”

[MF&F 20:22.]

—Elder Robert D. Hales



8



9



5

**7.** Sa usiusitai pea lava i Lona Tama, o lea sa afio atu ai lesu i le lalolagi o agaga ma faatulaga ai le galuega faafafeautalai iina (tagai 1 Peteru3:18-20; 4:6).

**8.** Na faaosoooina lesu e Satani, peitai e lei gauai atu i ai o la (tagai Mataio 4:1-11; MF&F 20:22).

**9.** Na faaaauau pea ona la faia le finagalo o Lona Tama ma faatonutonu le Ekalesia (tagai Iosefa Samita—Talafaasolopito 1:16-17; MF&F 19:2, 24).

# O LA TATOU AVANOA



## AU TINEIMU MA LE OFUTAU O LE ATUA

**O**se aso toofilemu i la'u galuega o se tineimu galuefua, o lea sa tonu ai ia te au e fai tau le Tusi a Mamona. Ina ua vaai mai se tasi ma te faigaluega o o'u fai tau, sa fesili mai o ia pe ou te iloa pe faapefea ona faamaulu le ofutau a le Atua i aso nei. A o ma talanoa, sa ee mai le sailini. Sa sasao se afi i se faleoloa lata ane.

Sa vave ona faamaulu o ma ofu tineimu ma o sa'o loa i ai. Sa sasao tele le momu, ma ina ua matou latalata atu i le faleoloa, sa i ai se mea na pa i le mea na ma i ai. Sa lilofia i matou i le sasao o le afi. Na ma fememea'i ma la'u soa faigaluega mo ni nai sekone, ona o le mea na pa. Ae faafetai mo masini ma lavalava na puipuia ai i ma'ua, ma sa leai ni o ma manua.

Ina ua ma toe foi i le ofisa ina ua uma ona tape le mu, sa ou fesili i la'u soa faigaluega pe na ia manatua lana fesili e uiga i le ofutau o le Atua. Fai mai i, ma sa ou faamatala atu i ai o le ofutau o le Atua e pei lava o meafaigaluega mo le puipuiga i le tineia o mu. E tatau ona tatou ofuina pea lava ina ia mafai ai ona tatou tatalia osofaiga malolosi a le fili. Afai tatou te tausi poloaiga, o le a faamanuiaina i tatou i le mana puipui o le ofutau a le Atua, ma o le a taialaina i tatou e le Agaga Paia. ■

Fernando de la Rosa Marrón, Mekisiko



## O LE MAU E SILI ONA OU FIAFIA I AI

**1 Samuelu 16:7.** "AUA E LE VAAI IEOVA PEI O LE VAAI O TAGATA; AUA E VAAI TAGATA I LE TINO, A E VAAI IEOVA I LE LOTO."

Ae ou te lei auai i le Eklesia, sa ou vaai ia te au lava ia o se tagata faatauvaa e i ai foi ni tomai faatauvaa. Sa ou manatu e leai se mea taaa o ia te au e ofoina atu. Sa ou fefe e faailoa atu i tagata lo'u tagata ona o lo'u fefe i teena ma ou tiga ai. Sa ou mafaufau faapea e malolosi uma lava tagata o siomia ai au, e popoto atu ma e sili atu i lo au.

Ae na suia nei manatu uma ina ua avea au o se tasi o Le Eklesia a lesu Keriso o le Au Paia o Aso e Gata Ai. Sa ou aoaoina faapea o i tatou uma lava o ni fanau a le Atua ma ua ia i tatou uiga auaumama paia. Ua ou malamalama nei e leai se tauvaga pe o ai e poto, mauoa, pe aulelei foi. I le silafaga a le Alii, e tutusa uma lava i tatou, ma o la o le e faamasinoina—e le faalagolago i o tatou uiga faaletino ae o lo tatou usiusitai ma le naunau e mulimuli i le ala na la faatuina. ■

**Joan Azucena, Filipaina**

## E TE FAIGALUEGA I LE ASO SA?

Ina ua 15 o'u tausaga, sa ou maua se molimau malosi i le talalelei a Iesu Keriso ma sa ou matua fiafia e auai i le Eklesia. O le taimi lea, sa ou faigaluega ai e tausi lo'u aiga. Peitai, e lei leva talu ona ou papatiso, ae ou le toe faigaluega.

Sa tatau ona sue sa'u galuega fou aua sa faalagolago lo'u aiga ia te au, ae o galuega uma lava sa ou talosagaina, e manaomia ai lo'u faigaluega i Aso Sa. E tele galuega sa ou le taliaina ona sa ou iloa e manaomia lo'u alu i le lotu i Aso Sa (tagai MF&F 59:9–10).

Ina ua maea masina e lua o la'u sailiga, e lei maua lava se galuega. O lo'u tina e le o se tagata o le Eklesia, ma e ui sa talitonu o ia i le Atua, ae sa matua ita lava i lo'u le taliaina o le mau galuega.

I se tasi po sa ia tilotilo mai ai ia te au a o maligi ona loimata ma fesili mai, "Aisea ua tuu ai e le Atua ia tupu lenei mea ia i tatou ae o loo e matuai faamaoni e faia le mea sa'o?"

Sa ou tali atu, "Tina ou te le iloa pe aisea ua tupu ai lenei mea ia i tatou, ae ou te iloa o loo ou faia le mea sa'o, ma ou

te iloa foi o le a faamanuiaina i tatou e le Atua ona o lena mea."

I le taeao na sosoo ai, sa ofoina mai ai e se tagata ia te au se tupe tele e la'u ai se uta o mea mamafa mai se tasi fale i le isi mo aso e lua. Sa mamafa le galuega, ae ina ua ou mauaina le tupe, sa ou alu sa'o loa i le fale ma ofoina atu se tatalo o le lotofaafetai. E lei pine ae maua la'u galuega lea sa mafai ona ou malolo i Aso Sa, ma talu mai lena taimi e lei toe misi ona ou faigaluega.

Ua ou fiafia ona sa ou filifili e tausi ia paia le aso Sapati. E tele luitau o le olaga, ae ou te iloa afai tatou te tau-mafai ia malolosi tusa lava po o a na luitau, o le a faamanuiaina i tatou e le Alii. ■

Sahil Sharma, Initia





Saunia e Elder  
Neil L. Andersen

O Le Korama a Apostolo  
e Toasefululua

## AUALA E POTO AI

le galulolo o faamatalaga ua tatou maua i nei ona po, ua tatou matuai moomia ai lava le poto—poto e **faavasega ai ma iloatino** pe faapefea ona faaaoga mea ua tatou aoaoina.

Tatou manatua:

1. E tatau lava ona tatou sailia le poto.
2. E anoanoai vaega o le poto ma e oo mai i tulaga ma lanu eseese.
3. O le vave maua o le poto e au-maia ai faamanuiaga maoae.
4. O le poto i se tasi mataupu atonu e le mafai ona faaaoga i se isi mataupu.
5. O le poto o le lalolagi, e ui i le tele o tulaga e taua tele, ae e sili ona taua pe a faagauai atu ma le lotomualalo i le poto o le Atua.

O loo faamatala mai i tusitusiga paia ituaiga e lua o le poto: o le poto o le lalolagi ma le poto o le Atua. O le poto o le lalolagi e i ai vaega e le lelei ma vaega e lelei. I se faamatalaga aupito le lelei o le poto o le lalolagi, e mafai ona faamatalaina o se mea moni, faaafaafa, e lualuaga i le atamai ma faiga ia ausia ai

faamoemoega manatu faapito ma faatiapolo.

E i ai se isi ituaiga o le poto o le lalolagi e le leaga tele ona faamoe-moega. O le mea moni e lelei tele. O le poto lea e maua pea lava pea e ala i le **suesue, manatunatuga, mataituuga, ma le galue malosi**. E taua tele ma e fesoasoani i mea tatou te fai. I tagata mafaufau, e oo mai a o tatou maua le poto masani o le olaga nei.

O le mea e sili atu ona taua, o le poto e aumaia ai le manua i le lalolagi, e tatau ona naunau e la'a i tua o le poto o le Atua ma aua nei mafaufau e mafai ona suia ai le [poto o le Atua].

E lei foafoaina tutusa le poto uma. E ao ina tatou iloa a oo ina i ai se feteenaiga i le va o le poto o le lalolagi ma le poto o le Atua, e tatau ona tatou **gauai atu o tatou loto i le poto o le Atua**.

Ou te fautua atu e te mafaufau i ni luitau o oulu feagai. Tusi se laina agai i lalo i le ogatotonu o se laupepa. Lisi le poto o le lalolagi i le itu tauagavale ma le poto o le Atua i le itu taumatau. Tusi ia faafitauli e feteenai.

### O a filifiliga o e faia?

I le vaega e 45 o le Mataupu Faavae ma Feagaiga, lea o loo talanoa i mea e tutupu e tau atu i le Afio Mai Faalua o le Faaola, o loo toe faamatala mai ai foi e le Alii le tala i taupou e toase-fulu ona ia tuu mai ai lea o upu nei ia i tatou: "Aua o i latou o e e popoto ma ua latou talia le upumoni, ma ua latou ave le Agaga Paia mo o latou taiala, ma sa lei faaseseina—e moni Ou te fai atu ia te outou, o le a le tatuuina i latou i lalo ma lafo i le afi,

ae o le a latou gafatia le aso" (tagai MF&F 45:57).

Tatou **saili i le poto o le Atua**. E tele nua mea e mafai ona tatou aoaoina nei e uiga i le poto. Ou te folafola atu ia te oe o le a e maua faamanuiaga a le Alii pe a e sailia le poto, le poto o le Atua. Ua matuai naunau lava o Ia e tuuina mai Lona poto ia te i tatou. Ma afai tatou te usiusitai ma lototatalo ma sailia, o le a maua. ■

*Mai se saunoaga i le faigalotu a le Iunivesite o Polika Iaga-Idaho na tuuina atu i le aso 10 Aperila, 2009.*

## O FAAPEFEA ONA E FAAAOGAINA LENEI MEA?

"E lua lava ala e mafai ona filifili ai. E mafai ona e filifilia le mea e te manao ai. Ae e tatau lava ona e filifili ma le poto. E mafai ona ou fai atu o le filifilia o le Alii e mafai ona fesoasoani ai ia te oe i aso taitasi ma o le i ai o le Agaga Paia i ou autafa, e mafai ai ona fesoasoani ia te oe i tulaga taitasi. O le filifilia o le itu sese e mafai ona oo atu ai i se lagona le fiafia, o se lagona e foliga mai o le fiafia mo sina taimi puupuu ae mulimuli ane, o le a e vaai ai i taunuuga ma o le a e matuai faanoanoa ai lava ona o le faiuga sa e faia. la i ai i le itu a le Alii! E le faigo-fie i taimi uma, ae e taua le faia!"

Samuel J., Austria



## O le a le tele o faatosinaga a Satani i o'u mafaufauga?

**U**a faamautinoa e le Tama Faalelagi ua i ai lo tatou faitalia, o le gafatia e filifili ai le lelei po o le leaga. Na te le faamalosia i tatou e faia mea lelei, e le mafai foi e le tiapolo ona faamalosia i tatou e faia mea leaga (tagai *O Aoaoga*

*a Peresitene o le Ekalesia: Iosefa Samita* [2007], 227).

O le mea lea, a oo i ou mafaufauga, e tusa le faatosinaga a le tiapolo ma le mea ua e ioe e tuuina atu ia te ia. Na saunoa le Perofeta o Iosefa Samita, “E le mafai e Satani ona maileia i tatou

i ana faatosinaga sei vagana ua tatou ioe i o tatou lava loto ma gauai atu i ai” (*O Aoaoga: Iosefa Samita*, 227). Na ia saunoa foi, “O le tiapolo e leai sona mana ia i tatou sei vagana ua tatou faatagaina ai o ia” (227).

E le gata i lea, ua ta'u mai i tusitusiga paia e faapea “e leai lava se tasi ae ua nao le Atua ua ia silafia ou mafaufauga ma faamoemoega o lou loto”

Mata e lelei le o i **siva** po  
◦ **pati** ou te iloa e i ai  
**mea leaga** e fai ai, ina ia  
avea o se **faataitaiga lelei?**

**F**esili ifo ia te oe lava: “O le a le ituaiga o faataitaiga ou te manatu moni lava o le a ou faia i lena tulaga?” Afai e te fuafua e alu i se nofoaga e ono i ai ni fualau faasaina po o ni meainu malolosi, lavalava le talafeagai, musika e faaosofia ai lagona malolosi, po o siva faatosina, e faapefea ona e faaalia i tagata le manaia tele mo i latou e aunoa ma na mea? Mata o a mafaufauga o tagata o loo siomia ai oe—“Pe le o se faataitaiga tele lena o le faatuatua ma tulaga faatonuina?” po o le “Aisea lava na sau ai lena tagata?” O le tele lava o tulaga, o le a avea oe ma faataitaiga sili atu e ala i lou le alu, aua o le a e le tuuina oe lava ma le iloa lelei i faaoosoosoga. ■

(MF&F 6:16), o le mea lea, e le iloa tonu e Satani mea na e te mafaufau i ai. Na ona ia mafai ona ofoina mai o faaoosoosoga ma faatosinaga. Ae afai e te filifili e mulimuli ai, ona ia maua lea o le malosi e sili atu nai lo oe ma atili ai ona malolosi faaoosoosoga. E faapena foi, afai e te teena le leaga ae filifili le lelei, o le a faamalosia oe ma faamanuiaina. ■

# Tasi le Lafu ma le LEOLEO MAMOE E TOATASI

O se faaopoopoga mo se lafu o mamoe ua aoao ai i tatou e uiga i le tausiga a le Faaola i Lona nuu.



## Pamamoe Anamua


**O le a:** O se vaega itiiti, o se puipuiga faaopoopo.

**Faamoemoega:** Ia puipui ai se lafu o mamoe mai tulimanu ma faomea, aemaise i le po.

**Mea fau pa ma le fousaga:** O maa, e masani ai, ma laau talatala e masani ona tuu i le pito i luga o puipui. O pupuvao talatala sa masani ona faaaoga e fai ai se papuipui mo le pamamoe mo se taimi le tumau e fesuiai ai. O nisi taimi sa faaaoga ai ana e fai ma pamamoe, ma sina papamaa laitiiti pe tuu ai foi ni pupuni vaotalatala i luma.

## MEA MONI MAI LE TUSI PAIA

- Sa taua tele le aano o le mamoe, o le suasusu, ga'o, fulufulu, pa'u, ma seu ma sa avea ma uluai manu e osi ai taulaga.
- I Israuelu, o luko, haiena, nameri, ma maile aivao o nisi ia o le au faataumaoi e tulimataia mamoe. I aso anamua, sa maua liona, ma urosa i lea itu (tagai 1 Samuelu 17:33-37).
- Sa faaaoga e leoleo mamoe se tootoo e taitai ai mamoe ma se uamea ma se maata e puipuia ai.
- E taitai e se leoleo mamoe ana mamoe i le mea e aai ai ma le vai i le ao (tagai Salomo 23:1-2) ma toe faafou i le lafu i le po. E faitau e le leoleo mamoe ia mamoe pe a toe foi, ma saili i mamoe pe afai e misi. Ona taoto ai lea o ia i le faitotoa o le lafu e puipui i latou.
- Na ta'ua e lesu Keriso la lava o le Leoleo Mamoe Lelei (tagai loane 10:11-15) ua na la tuuina mai Lona soifua mo i tatou. Na la faatusa la lava i le faitotoa o le pamamoe (tagai loane 10:1-9) ua o la ua tatou maua ai le faafalelega faaleagaga, malologa, filemu, ma le faaeaga.
- Na faatusa e le Apostolo o Paulo le Ekalesia i se lafu o mamoe (tagai Galuega 20:28).



### ISI MAMOE

Na ta'ua e le Faaola "isi mamoe ... e le o iinei" (Ioane 10:16), o lona uiga o Sa Nifae ma Sa Lamana, o e na taitaiese mai le aiga o Israuelu (tagai 3 Nifae 15:14-24). Sa la ta'ua foi le asiasi atu i ituiga ua leiloloa o Israuelu (tagai 3 Nifae 15:20; 16:1-3).

## O Le Mea e Mafai ona Tatou Aoaoina

O pamamoe o:

**O le mea e faapotopoto i ai le lafu.** O le avea ai ma tagata o le Ekalesia, tatou te taufai faasoa i se sootaga o le lotogatasi e ala i lo tatou faatuatua ma a tatou feagaiga, faapea foi i le faapotopoto faatasi. Na aoao mai Peresitene Henry B. Eyring, Fesoasoani Muamua i le Au Peresitene: "O le olioli o le lotogatasi ua matuai finagalo [le Tama Faalelagi] e tuuina mai ia i tatou, e le 'au toatasi. E ao ina tatou sailia ma agavaa i ai faatasi ma isi. E le o se tulaga la e faateia ai, le uunaia o i tatou e le Atua e faapotopoto ina ia Ona faamanuiaina i tatou. Ua Ia finagalo ia tatou faapotopoto i aiga. Ua Ia faatuina vasega, uarota, ma paranesi ma poloaiina i tatou ia faapotopoto faatasi e le aunoa. O na potopotoga, . . . e mafai ona tatou tatalo ma galulue mo le lotogatasi o le a faapea ona aumaia ia i tatou le olioili ma faateleinai ai lo tatou mana e auauna atu" ("E Fusia o Tatou Loto ia Tasi," *Liahona*, Nov. 2008, 68, 69).

**O se nofoaga o le saogalemu ma le mapusaga.** Ia Iesu Keriso tatou te "maua [ai] . . . le malologa mo [o tatou] agaga" (Mataio 11:29). O Lana Ekalesia o "se puipuiga, ma . . . se sulufaiga" (MF&F 115:6). Ma pei ona aoao mai Peresitene Boyd K. Packer, o le Korama a Aposetolo e Toasefululua, "Tatou te maua le saogalemu ma le puipuiga mo i tatou lava . . . i le faamamaluina o feagaiga ua uma ona tatou faia ma ola e tusa ai ma faatinoga masani o le usiusitai lea e manao-mia mai i soo o Keriso" ("O Nei Mea Ua Ou Iloa," *Liahona*, Me 2013, 7).

**Puipuia e le leoleo mamoe.** O Iesu Keriso o le Leoleo Mamoe Lelei ua faasaoina i tatou. Sa mafatia o Ia ma maliu ina ia mafai ai ona tatou faatoilaloina le agasala ma le otu ma toe foi atu ai i lo tatou Tama Faalelagi. A tatou o mai ia Keriso ma usiusitai i Ana poloaiga, Na te faamanuia, taiala, ma puipuia i tatou taitoatasi ma faapea foi Lona nuu o le feagaiga. ■

# “E mafai faapefea ona ou lagona le mafanafana e talanoa atu ai i lo’u epikopo e uiga i faafitauli po o ni atugaluga?”

**A**tonu e te lagona le fefe e talanoa i lou epikopo e uiga i mea o loo e tauivi ai, ma o se mea lava e masani ai. E tele ina tatou fefefe a o lei oo mai ni aafiaga fou pe ao lei talanoa foi ma se tagata matua.

Ae o lou epikopo na tofia e le Atua. Na tofia o ia aua o ia o se soo ua tuuto atu ia Iesu Keriso. O le a ia faia le mea sili ina ia agalelei ma malamalama. O lana sini o le fesoasoani lea ia te oe e te sau i le Faaola ina ia e maua le filemu. Muamua, atonu e te lagona le maasiasi e talanoa atu ia te ia e uiga i au fesili po o agasala, ae peitai o le a le manatu faatauvaa lava o ia ia te oe. O le mea moni, o le a fiafia o ia ua i ai sou naunauga e faaleleia. Ma o le a ia le faalauaitaleina a lua talanoaga.

E te le tau tauaveina na o oe au avega. E mafai ona fesoasoani lou epikopo e tali au fesili pe a manaomia, fesoasoani ia e salamo ma lafoai, e ala i le Togiola a Keriso, ia lagona o le tausalaina, faavauvau, po o le le agavaa.

A o e talanoa atu i lou epikopo, o le a e lagonaina lona alofa ia te oe. E ui ina nafa o ia ma le uarota atoa po o le paranesi, ae o lana taulaiga autu lava o alii talavou ma tamaitai talavou. E te le o faalavelave ia te ia i lou talosagaina o se fesoasoani.

E mafai ona e tatalo i le Tama Faalelagi mo le malosiaga ma le lototeli e talanoa ai i lou epikopo. Ua Ia faatagaina lou epikopo e fesoasoani ia te oe ma ua naunau foi lou epikopo e faia. Afai e te alu ma lou loto matale ma se naunauga ia faaleleia atili, o le a e iloaina e te tuua lona ofisa ma se lagona sili atu nai lo le taimi muamua.

## O Le A Le Manatu Faatauvaa o la ia te Oe

Ua tuuina i le epikopo o lau uarota le pule e taiala ai oe i laasaga o le salamo. O nisi taimi o le liliu atu i lou epikopo e na o le pau lea o se ala mo oe e te salamo atoa ai e ala i le Faaola. Ina ua manaomia ou te talanoa i lo’u epikopo, sa fesoasoani mai o ia ia te au ia ou maua le Faaola ma foia lo’u manu'a loloto sa i ai. E manao lou epikopo e fesoasoani ia te oe. O lona valaauga o le vaiaia o oe, ma o le a le manatu faatauvaa lava o ia ia te oe, ona o loo i ai se mea e te vaai ai ia te ia.

*Madison D., 18 tausaga, Iuta, ISA*

## O Loo Naunau Lou Epikopo e Fesoasoani ia te Oe

E masani ona ou le maua se lagona toafimalie i faatalanoaga, ae sa iu ina ou iloaina sa naunau lava lo’u epikopo e fesoasoani e foia a'u faafitauli. Ia faatuatua lou epikopo: o ia o se leoleo mamoe ma o le uarota o lana lafu.

*Jaime R., 19 tausaga, Cochabamba, Polivia*



## O Le a Na Le Faalataina Lava Lou Faatuatuauga

Ua oo ina ou iloa o se epikopo atonu o le tagata matua aupito faatuatua lou lea e mafai e se talavou ona sailia mo se fesoasoani. O le a na ia le faalataina lava lou faatuatuauga—o mea uma lava e faasoa atu ia te ia, e gata ai lava i lona ofisa. O nisi taimi e faigata tele ona faasoa au faafitauli, peitai o le talanoa fesagai ma se tasi e alofa ma manatu popole ma manao i le mea sili mo oe, e atili ai ona faigofie.

*Nicole S., 18 tausaga, Idaho, ISA*





**E Mafai Ona E Faalagolago ia te la**  
O lou epikopo po o le peresitene o le paranesi o se auauna moni lava a le Alii. E mafai ona e faalagolago ia te ia mo se taitaiga a o e sailia musumusuga mai le Agaga Paia ma tusitusiga paia. E tatau ona e malamalama ua i ai iina le epikopo e fesoasoani ma e taitaiina o ia e le Atua.

Stanislav R., 19 tausaga, Donetsk, Iukureini



**Manatua e Alofa o la ia te Oe**  
Afaí e i ai se mea e te manao lava e talanoaina ma le epikopo, atonu e sili atu ona fai-

gofie ona talatalanoa muamua ma ia e uiga i le a'oga ma isi mea masani. Afaí e te fefe, e manaomia ona e talanoa ia te ia e uiga i mataupu o le salamo, ae ia manatua e alofa o ia ia te oe. E le tatau ona e fefe i ona manatu e uiga ia te oe, aua o le a le mea o le a manatu faatauvaa ai ia te oe ona o lou manao e faalatalata atili ia Keriso?

Ashley D., 17 tausaga, Arisona, ISA



**Tatalo ia iloa**  
Fesili ifo ia te oe lava pe aisea e te lagona ai le le toofilemu e talanoa i le epikopo. Pe e te manatu o le a le mafai ona ia foia au faafitauli? Tatalo ia e iloa e alofa le epikopo ia te oe ma ua tofia e fesoasoani ia te oe.

Adam H., 13 tausaga, Kaledonia, ISA.

### Tusa Lava Pe E Te Faia se Mea Sese

E ono faigata ma maasiasi le ta'uta'u atu o mea i lou epikopo, ae a e savali ese atu mai lena ofisa, o le a e mapu, ma o le a e iloaina e alofa le Tama Faalelagi ia te oe. E finagalo o Ia ia e fiafia, tusa lava pe e te faia se mea sese.

Amanda W., 16 tausaga, Iuta, ISA

### Ua I Ai o la linei e Fesoasoani

O le epikopo o le leoleo mamoe o lau uarota. Manatua o le a ia faia le mea sili e fesoasoani ai ia te oe ma ua ia te ia le mana o le Atua i lana itu. Afai e te lagona le fefe, e mafai ona e tatalo mo le malosi ia mafai ai ona e talanoa ma lou epikopo. A uma, o le a e fiafia na e alu ia te ia—ma o le a aoga.

Samuelu H. 14 tausaga, Idaho, ISA

*Mo nisi faamatalaga i le autu lea, tagai i le C. Scott Givens, "Aisea ae O A Foi Mea e Tatau ona Ta'uta'u Atu i Lo'u Epikopo?" Liahona, Oke. 2013, 59.*



### TA'UTA'U ATU IA TE IA

"Saili i fautuaga mai o outou taitai perisitua, aemaise o lou epikopo.

Na te iloa ou tulaga faatonuina, ma na te iloa foi mea e aoao atu ia te oe. Saili ni avanoa e mafuta ai ma ia. E mafai ona e faamoemoe o le a ia fai atu ni fesili tuusao, e vailili ai. Faalagolago ia te ia. Ta'uta'u Atu ia te la. Fesili atu ia te ia e fesoasoani ia e malamalama i le mea o faamoemoeina e le Alii mai ia te oe. Ia faia se tautinoga e te ola e tusa ai ma tulaga faatonuina a le Ekalesia o le ola mama. E taua se fegale-galeaiga anoa ma se taitai matua e fesoasoani ai ia te oe e tausia le ola mama ma le agavaa."

Elder M. Russell Ballard o le Korama a Apostolo e Toasefululu, "E Muamua le Mama i le Mana," Liahona, Nov. 1990, 37.

## FESILI O LE A SOSOO MAI

**"E ulagia au i le a'oga ona o se AAG. Ou te iloa e tatau ona ou tu atu mo le mea ua ou talitonu ai, ae e ese le faigata! E faapefea ona lava lo'u lototele e fai atu ai i na tagata soia?"**

Auina mai lau tali ma se atapue sili ona manino, pe a e manao i ai, a o lei oo i le aso 15 o Mati, 2015, i le liahona.lds.org, po o le imeli i le liahona@ldschurch.org, pe lafo mai i le meli (tagai i le tuatusi i le itulau e 3).

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le imeli) e lolomiina ai lau tali ma lou ata.

E ono faapupuuina tali mo le uumi po o le manino.

*Sa iloa e Eli lana toa,  
ae sa fefe o ia e ta'u.*

# O Ai



**Saunia e Charlotte Mae Sheppard**

E faavae i se tala moni

*"Tumau i lou talitonuga, ia pei se toa ma faamalosi"*  
(Tusipese a Tamaiti, 80).

**S**a 'ati ma le gatete e Eli ona atigilima.  
Sa savali atu Misi Fiti i vailaina o kesi  
ma tuu atu se fesili i tamaiti taitoatasii.

"O ai lau toa?" Sa fesili Misi Fiti  
ia Ierema.

Sa vave ona tali atu Ierema.  
"O lo'u tama!" na ia fai atu ai  
ma le mitamita.

Sa soisoi Misi Fiti. "Ae a  
oe, Sara?"

# Lau Toa?

Sa faapena foi ona vave lana tali mai. "O Aperaamo Linikone."

Sa tatavale le fatu o Eli a o faaaauau atu pea Misi Eli i vailaina o tamaiti o le vasega. Ua alu le aso o talanoa e uiga i tagata totoa, ae o lea ua tatau ona ta'u mai e le tagata lava ia lana toa—i luma o le vasega atoa!

Sa fai mai Ame ma Iusitina o a la'ua toa o o la tina. Fai mai Uota o lana toa o lona tamamatua. O nisi tamaiti sa fai mai o se tupu po o se peresitene.

Ua toe nei o ni nai tamaiti a o lei oo mai Misi Fiti ia Eli. Ua tatau ona mafaufau i lana toa—ma ia vave.

Sa autilo ifo Eli i lalo i ona seevae, ma le maasiasi. O le mafaufau i se toa e le o se faafitauli moni lea. Ua uma ona ia iloaina lana toa. O Iesu Keriso. Sa Ia faamalolo i e mamai, faatulai e ua maliliu, ma sa Ia totogia le tau mo agasala a tagata uma. O Ia o le toa aupito silisili na soifua ai! Ae sa na o lona fefe tele e ta'u atu.

Sa toe atiati e Eli ona atigilima a o mafaufau i le ta'uina atu i le vasega atoa o Iesu Keriso o lana toa lea. Ae faapefea pe a ata Ierema ia te ia? Ae faapefea pe a femusua'i Sara ma Ame e uiga ia te ia i le malologa?

O le mea moni sa ia iloa o Iesu Keriso o lana toa lea. Ae e le faapea ua tatau ai ona iloa foi e tagata uma.

Sa tu tonu lava Misi Fiti i luma o le kesi a Eli ma ataata. "A o ai lau toa, Eli?"

Sa autilo a'e Eli mai le laina o tamaiti i ona autafa ma agai atu ia Misi Fiti. "Aperaamo Linikone," sa ia musu-musu atu ai.

Sa ataata Misi Fiti. "Lelei!" o lana tala lea a o savali agai atu i le isi tamaitiiti o le laina lea.

Ina ua te'a ese atu, sa solovi ifo i lalo tauau o Eli ua mapu. Faafetai ua uma. O le mea mulimuli o loo ia manaomia, o le iloa lea e tagata uma o le vasega o lana toa o—

"Iesu Keriso," sa fai mai ai se leo.

Sa puputele mata o Eli a o autilo atu. Lale—i si tulimanu itiiti i le pito o le laina—sa nofo mai ai se tamaitiiti e ve'uve'ua le ulu e paee ma matamuli, ma e nofo lava o ia i tua o le potuaoga i taimi uma. E le iloa foi e Eli lona igoa. Na te le manatuaina se taimi na gagana mai ai o ia i se upu se tasi—vagana ai le taimi lenei.

Sa taufai faliu atu ni nai tamaiti i le tamaitiiti, ae e lei ano o ia i ai. Sa na ona tepa a'e ia Misi Fiti ma toe fai atu. "O la'u toa o Iesu Keriso."

Sa ata fiafia Misi Fiti ma faaaauau atu i le vailaina. Ae sa tilotilo atu Eli i le tamaitiiti ma le ofotele. Sa fefe o ia e ta'u atu i tagata uma lana toa, ae e lei fefe lea tamaitiiti. E lei alu lava foi i lana lotu! A sa ia iloaina le taua tele o le tu atu o se faataitaiga ia Iesu Keriso, e oo lava i taimi faigata.

Sa ataata atu Eli i le tamaitiiti. O le a le toe fefe o ia e ta'u atu lana toa. O lea ua toalua nei i la'ua. ■

*E alala le tusitala i Kalefonia, ISA.*



# O Tatalo ma Falelotu

Saunia e McKelle George

E faavae i se tala moni



*“O o’u soo outou, pe afai ua outou fealofani” (Ioane 13:35).*  
Sa ea a’e i luga Dani ae sa le mafai lava ona ia iloa atu le tumutumu o le falelotu matagofie. E o mai iinei tagata e ese se lotu e auai. Sa lei malamalamā Dani pe aisea sa asiasi mai ai lona aiga i le falesa lea i se Aso Faraile, sa fai mai lona tama e o i se mea e ta’u o le Tapuaigaafiafi.

“O le a lena mea?” Sa fesili ai Dani. O se mafutaga e vivii ai tagata, faitau tusitusiga paia, ma tatalo faatasi,” o le tala lea a Tama. “Pei o se aiga tele i le faaiuga o le aso.”

Sa fiafia Dani i lea faaupuga. Sa asiasi o ia ma lona aiga i Egelani. O le Aso Sa ua te’ā na latou o ai i se uarota i se aai e ta’u o Ioka. I le Peraimeri, sa iloa e tamaiti uma mau ma pese na iloa e Dani. Sa ia iloaina o le uarota sa asiasi i ai, o se vaega o le Ekalesia moni a Iesu, pei foi o lana uarota masani.

Ae sa matua ese lava lea falelotu mai ia ua masani ai. Sa ia matauina se tamai laulau e tumu i moligao. Sa matau e Dani se tamaitiiti sa tutuina se moligao.

“Aisea ua e tutuina ai moligao?” Na fesili atu ai Dani ia te ia.

Sa ataata le tamaitiiti. “Ou te tutuina se moligao pe a ou tatalo atu mo ni mea faapitoa. A mumu, ou te faamoemoe o le a oo atu ina faafogaina e le Atua le tatalo.”





"E tatau ona tatou alolofa i tagata uma, avea ma tagata e faalogo lelei, ma faaalia le popole mo o latou talitonuga faamaoni."

Elder Dallin H Oaks o le Korama a Apostolo e Toasefululu, "Ola Faatasi ma Alolofa atu i Isi e Eseese o Tatou Talitonuga," *Liahona*, Nov. 2014, 27.

Sa foliga mai ia Dani o ni moligao lava e masani ai. Sa fai si ona faaletonu, ae sa manao o ia e faaaloalo. Sa ataata atu o ia i le tamaitiiti.


Sa nonofo i lalo Dani ma lona aiga, ma e lei pine ae amata le Tapuaiga-afiafi. Sa ia iloa atu le tamaitiiti lava lea i nai laina e lei mamao ese. Ona ia iloa ai lea na te le iloaina se pese ia sa pepese ai tagata uma. Ina ua latou tatalo, sa latou faitauina mai se tamaitusi. Sa foliga e ese mea uma mai mea ua masani ai o ia.

Ae sa matua matagofie musika, tusa lava pe lei masani ai. Ona tu lea i luga o se tamaloa e faitau tusitusiga paia. Sa fai sona ofutalaloa, nai lo le suti ma se fusiu pei o le epikopo a Dani. Ae ina ua amata ona ia faitau, sa matauina e Dani na te iloa le tala! Sa ia faitauina le tala ia Iesu i le faamalologa o lepela e toa 10.

"Tama," sa musumusu atu ai Dani, "Ou te fiafia lava i le tala lea."

Sa ataata lona Tama. "Ma au foi."

Ona fai lea e le tamaloa ma lona ofutalaloa le tatalo. Sa ole atu o ia i le Atua e faamanuia i latou o e mamai ma manaomia le fesoasoani. Pei lava ona sa faia e Dani! Sa ole atu foi o ia mo se faamanniaga faapitoa mo taitai o lana lotu. Sa manatua e Dani le talosagaina pea e lona aiga le Tama Faalelagi e faamanuia Peresitene



Thomas S. Monson ma ona fesoasoani.

Sa oo mai se lagona mafanafana i le loto o Dani. Sa iloa e ia na ta'u atu e le Tama Faalelagi ia te ia e alofa o Ia i Ana fanau *uma* ma faafogaina a latou tatalo *uma*, tusa lava pe na latou o i se isi lotu e ese ai, ma e le o i ai le atoaga o le talalelei.

Ina ua tutu i luga o le a o, sa siaki e Tama lana telefoni. Sa faanoanoa o ia ina ua faitau i feau o i ai. "Ua maliu Sister Monson," o lana tala lea.

"Auoi leai!" Sa vave ona tatalo Dani i lona loto ina ia le afaina Peresitene Monson.


"O lelei mea uma?" na fesili ane ai se tasi. O le tamaitiiti lea na vaai i ai muamua. Sa ia faalogo atu ia Dani, ma sa foliga mai ua popole ai o ia.

"Ua maliu Sister Monson," le tala a Dani. "O ia o le faletua o lo matou perofeta, o Peresitene Monson."

"Talofa e," o lana tala ma le agaalofa. "O le a ou tutuina se moligao mo ia."

Sa ataata atu Dani ma faafetai atu ia te ia. Sa manatu o ia e ese le lelei o si tamaitiiti ma lona faia o se tatalo faapitoa mo Peresitene Monson. Sa ia iloa o le a faafogoga le Tama Faalelagi i le tatalo na ia faia i lona loto ma le tatalo foi a si tamaitiiti. ■

*E alala le tusitala i Iuta, ISA.*






Saunia e Elder  
Russell M. Nelson

O Le Korama  
a Apostolo e  
Toasefululua

*O sui o le Korama a  
Apostolo e Toasefu-  
lulua o ni molimau  
faapitoa a Jesu Keriso.*

# Aisea e taua tele ai le **USIUSITAI?**



“O le aso lenei  
na faia e Ieova;  
tatou te olioli  
ma fiafia ai.”

—Salamo 118:24



# Ua Faamalolo e Iesu se Lepela



## MANATU MO TALANOAGA FAALEAIGA

E mafai ona e faaaogaina ata o tusitusiga paia o i le itulau e 74 e faamatala ai le tala mai le Mareko 1:40–42. Ona mafai lea ona e faitauina le luta 1:22 ma fuafua pe faapefea ona faia faatasi e le aiga se mea e faia ai se eseesege i le olaga o se tagata. Atonu e mafai ona e faia se auaunaga faalilolilo mo se tasi.

**Pese:** "Tau Mai Tala ia lesu" (*Tusipese a Tamaiti*, 36)

**Mau:** Mareko 1:40–42

**Vitio:** Alu i le [Biblevideos.org](https://www.biblevideos.org) e matamata le "Ua Faamalolo e lesu se Tagata Pipili i le Sapati" ma le "Ua Faamalolo e lesu se Tagata na Fanau Mai o Tauaso."

Saunia e Erin Sanderson

**M**afaufau i se taimi na e ma'i ai. Pe na Mfaia e se tasi se mea agalelei e fesoasoani ai ina ia e manuia?

I le Feagaiga Fou ua tatou faitau ai i le ala na faaaliai ai e Iesu le agalelei i tagata sa mamai. I se tasi aso, sa alu atu ai ia Iesu se tagata sa maua i se ma'i tiga o le pa'u e ta'ua o le lepela. Sa ia iloa o loo i ai ia Iesu le mana e faamalolo ai tagata uma sa mamai. Sa talitonu o ia e mafai e Iesu ona faamalolo o ia. Sa pa'i atu Iesu i le lepela ma faapea atu, "Ina mama ia oe" (Mareko 1:41). O le taimi lava na fetalai ai Iesu, na malolo ai le tagata,

E mafai ona tatou mulimuli i tulagaaao o Iesu e ala i le agalelei atu ma alolofa i isi o e mamai pe faanoanoa. ■

*E alaala le tusitala i Iuta, ISA.*

## MULIMULI I TULAGAAAO O IESU

Faatino e lou aiga pe mafai  
faapefea ona outou faaalia le alofa  
mo isi i tulaga nei. Fatufatu ni  
au lava tulaga!



Ua sii atu i le tou pitonuu se aiga fou.

O nisi tamaiti e agaleaga ia i se isi tamaitiiti i le aoga.

Ua asiisi mai i le Peraimeri se tasi e le masani i se isi i le lotu.

E leai se tasi e taaalo ma lou uso po o lou tuafafine laitiiti.

O loo tagi le pepe ae o loo taumafai lou tina e fai le kuka.

O loo i ai se tasi o lau uarota po o le paranesi o loo ma'i ma e le mafai ona tuua le fale.

## AOAO ATILI: O TALALELEI


O le Feagaiga Fou e fa ona tusi faapitoa ua ta'uua O Talalelei, ia na tusia e nisi o soo o lesu. O loo faamatala mai i Talalelei le taimi na soifua ai lesu Keriso i le fogaelele. O le tala e uiga i le faamalologa o le lepela, o loo maua i Talalelei e tolu. O loo maua i le Mareko 1:40–42 faapea foi i le Mataio 8:2–4 ma le Luka 5:12–14.

## MOTUGAAFA O MAU: SAILIGA O UPU

I le Mareko 1:41 o le upu *mutimutivale* o loo faaaoga. O nisi taimi e i ai upu tetele i le Tusi Paia atonu e te le malamalama ai. A e maua se upu e te le iloa, e mafai ona e faaaogaina le Taiala i Tositusiga Paia e fesoasoani ai ia te oe! Mo se faataitaiga, e mafai ona e sueina le "Mutimutivale" e sue ai le uiga ma sue ai isi mau o loo faaaogaina. O a isi upu e mafai ona e suea i le tala e uiga ia lesu o loo faamaloloina le tagata ua i ai le lepela?

# Ua Faamalolo e Iesu e Mamai


Mareko 1:40–42; Luka 4:38–40



Motu o Tagata



Iesu Keriso



Lepela




Tina o le Toalua o Peteru

ATA NA TUSIA E BETH M. WHITTAKER



Saunia e Elder  
Claudio D. Zivic  
O Le Fitugafulu

# O Le ALA Sa'o



*“Faalogo i upu a lena Atua o le na faia oe”*

(MF&F 43:23).

**E**tele tausaga talu ai na matou asiiasi ai ma lo'u aiga i le Paka Faaofuofu o le Atunu i Iuta, ISA. O se tasi o faaofuofu aupito sili ona matagofie ma lauiloa i le paka o le Faaofuofu Anagata, ma sa tonu ia i matou e feaei i le mauga e tau i ai.

Sa matou amata ma le naunautai, ae e lei umi ae mananao isi e malolo. Sa ou manao ia vave ona ou taunu, o lea na ou alu ai na o au. E aunoa ma le mataituna o le ala sa tatau ona ou ui ai, sa amata ona ou mulimuli i se tamaloa sa foliga mai na te iloa le mea e agai i ai.

Sa oo ina faigata tele atu ona aea le ala. Sa ou talitonu e le mafai ona oo i ai lo'u aiga. Sa faafuasei ona ou vaaia

le Faaofuofu Anagata, ae na ou ofo, aua sa le mafai ona ou au i ai. O le ala lea na ou ui ai, e le tau i le faaofuofu.

Sa ou le fiafia ma toe foi. Sa ou faatalitali ma le onosai seja matou toe feiloi ma le matou vaega. Sa latou faamatala mai na latou mulimuli i faailo igoa na faasinoina le auala, ma na faatasi ai ma le faaeteete ma taumafaiga, na latou oo ai i le Faaofuofu Anagata. Ae paga lea, sa sese le auala na ou ui ai. Oka se lesona sa ou aoaoina!

Aua nei aveesea lau vaaiga mai lou ala i le ola e faavavau ma lou Tama Faalelagi. Mulimuli i mataupu faavae o le talalelei ma poloaiga ua e iloaina, ona e i ai lea i le ala sa'o e ola faatasi ai ma Ia e faavavau. ■

*Mai “Aua Nei o Tatou U i le Auala Sese,” Liahona, Me 2014, 39–41.*

# Ou Te Iloa E Alofa Iesu Ia Te A'u

Saunia e Jane McBride Choate






E faavae i se tala moni

Sa taumafai malosi Laney  
ia migao i le lotu. Ae  
sa le lava o ia, ma  
ua manao lava e  
faaloloa ona vae.



Ina ua uma le faamanatuga, sa susue  
e Laney lana tusi e uiga ia Iesu. Sa ia  
maua le ata o Iesu faatasi ma tamaiti  
laiti. Sa ia lagona ai le toofilemu ma  
le fiafia i le loto.

*O loo faaaauau le tala i le itulau e 79.*



O Lau Tusi e uiga ia  
**ESU**

*Ou Te Iloa E Alofa Lo'u Faaola Ia Te A'u  
Saunia e Tami Jeppson Creamer ma Derena Bell*

Ou te lei pa'i atu ia te la pe nofo foi i Ona  
tulivave, ae, o lesu e moni lava ia ia te au.

(8)

(5)

4.Oti

*O le alofa sa la lagonaiana mo Ana fanau iti,  
ou te iloa na la lagonaiana mo au.*



2-Gagau


3-Gagau



②

*I aso lava la ua leva i se nofoaga matagofie,  
sa faapotopoto ane ai tamaiti ia lesu.*

Gagau



⑦

*Ou te avatu lo'u loto ia te la. Ou te iloa  
e alofa lo'u Faaola ia te au.*



③

*Sa la famanuia ma aoao atu, ma sa latou lagonaina Lona  
alofa. Sa tou'i vaalea e i latou ia loiimata i Oua fofoaga.*



⑥

*O le a ou mulimuli ma le famaoni.  
Ou te iloa o loo sofia o la!*

Gagau



Ina ua uma le lotu faamanatuga, sa fesili Laney i lona Tina, "Aisea e faigofie atu ai ona migao ina ua ou tilotilo i la'u tusi ia Iesu?"

"Masalo ona ua faamanatu atu ai ia te oe le tele o le alofa o Iesu ia te oe," o le tala lea a Tina.



Sa luelue atu le ulu o Laney.  
"Mata e iloa e Iesu ou te alofa foi ia te Ia?" o lana fesili lea.

Sa opo mai e Tina ia Laney. "Ioe, ou te iloa Na te iloa." ■

*E alaala le tusitala i Colorado, ISA.*

O le masina lenei ua atoa i ai le 100 tausaga talu ona faamalosiauina e le Au Peresitene Sili ia tagata o le au paia ina ia faia afiafi faaleaiga. O le vaega o loo mulimuli mai e aumai i le tusi a le Au Peresitene Sili na folasia mai ai afiafi faaleaiga. Na faalauiloa mai ia Aperila 1915 ma sa lolomina i le Improvement Era ia Iuni 1915 (itulau 733–34). Ua faaaoga mataitusi tetele ma faailoga faaonaponei.

**U**so e ma Tuafafine Pele:  
Matou te fautuaina le Au Paia o Aso e Gata Ai ina ia saga silasila totoa i le poloaiga a le Alii na tuuina mai i le vaega e 68 o le Mataupu Faavae ma Feagaiga:

*“O lenei foi, o le tulaga e oo i ai le i ai o matua e fai fanau i Siona, po o i soo se tasi o ona siteki ua faatulagaina, ae latou te lē aoaoina i latou ia malamalama i le mataupu faavae o le salamo, faatuatua ia Keriso le Alo o le Atua sofua, ma e uiga i le papatisoga ma le meaalofa o le Agaga Paia e ala i le faaee o lima, pe a valu tausaga le matutua, ia i ai le agasala i luga o ulu o matua; . . .”*

*“O le a latou aoaoina foi a latou fanau e tatalo, ma savavali tonu i luma o le Alii” [tagai MF&F 68:25–28].*

E ao foi i fanau a Siona ona saga mataituna le poloaiga a le Alii na tuuina atu ia Israelu anamua ma ua toe faamautu mai i le Au Paia o Aso e Gata Ai:

*“Ia e ava i lou tamā ma lou tinā, ina ia faalevalevaina ou aso i luga o le laueelele ua foaiina mai e le Alii lou Atua ia Tē Oe” [Esoto 20:12].*

Ua faatatau ma le malosi tele nei faaaliga i le Au Paia o Aso e Gata Ai, ma e manaomia ai tama ma tina o lenei Ekalesia, ina ia aoaoina nei

poloaiga ma faaaoga i totonu o o latou aiga.

O le mea lea ua matou fautuaina ai ma uunaia le faatinoga o “afiafi faaleaiga” i le Ekalesia atoa, ma o le taimi lea e mafai ai e tama ma tina ona faapotopoto tama ma teine i le fale ma aoao atu i latou i le afioga a le Alii. Ona mafai ai lea ona latou silafia uma ia manaoga ma mea o

## OLE 100 TAUSAGA O Aafiafi Faaleaiga



loo moomia i o latou auaiga, ma o le taimi foi lea e faamasani lelei ai i latou lava ma a latou fanau i mataupu faavae o le talalelei a Iesu Keriso. O lea afiafi faaleaiga e ao ona tuuto atu i le tatalo, usuina o viiga, pese, mea faimusika, faitauga tusitusiga paia, autu faaleaiga, ma faatonuga patino e uiga i mataupu faavae o le talalelei ma faafitauli masani o le olaga, faapea i tiute ma matafaioi a le fanau i matua,

le aiga, le Ekalesia, nuu, ma le atunu. Mo fanau iti, e mafai ona amatalia ai tauloto, pese, tala, ma taalogia. E mafai ona faia ni nai meaai mama ia e tele lava ina gaosia i le fale.

“E tatau ona matua aloese mai le tamau ai lava i le faasologa e tasi ma faatulagaga, ma e tatau ona auai tagata uma o le aiga i gaoioiga.

O nei mafutaga o le a maua ai avanoa mo le talitonuga maua’i i le va o matua ma le fanau, i le va o tuagane ma tuafafine, e maua ai foi le avanoa mo upu lapata’i, fautuaga, ma apoapoiga a matua i tama ma teine. O le a maua ai le avanoa mo tama ma teine e faamamalu ai le tama ma le tina ma faaalia ai lo latou talisapaia o faamanuiaga o le aiga, ina ia faataunuuina moni ai le folafolaga a le Alii ia i latou, ma faaumiumi ai lo latou ola ma maua ai le fiafia. . . .

Matou te uunaia le autalavou ina ia nonofo i le fale i lena afiafi ma faaaoga lo latou malosi e faia ai ina ia tumu i aoaoga, manuia, ma manaia.

Afai e usitaia e le Au Paia lenei fautuaga, matou te folafola atu o le a tulai mai ai ni faamanuiaga sili. O le a faateleina le alofa ma le usiusitai i le aiga. O le a atiina ae le faatuatua i loto o le autalavou o Israelu, ma o le a latou maua le mana e tau ai ma aafiaga leaga ma faaososoga latou te fetaia’i.

O ooutou uso,  
IOSEFA F. SAMITA  
ANTHON H. LUND  
CHARLES W. PENROSE  
Au Peresitene Sili ■

# MALAMALAMAAGA



## E mafai faapefea ona ou avea afiafi faaleaiga ma mea e faamuamua?

"A o e galue ai e faamalosia lou aiga ma atiae le filemu, ia manatua . . . afiafi faaleaiga i vaiaso uma. la faaeteete e aua nei faia a outou afiafi faaleaiga o se mea e faatoa fai pe a le pisi le aso. Fuafua lelei o le po o le Aso Gafua o le a i ai faatasi lou aiga i le fale mo le afiafi. Aua nei faatagaina manaoga o galuega, taalogaga, gaoioiga faaopoopo, meaa'oga, po o se isi lava mea ia sili atu le taua nai lo le taimi e te faaaluina e faatasi ai i le fale ma lou aiga. O le faatulagaga o lou afiafi e le taua tele e pei o le taimi e faaaluina ai. E tatau ona aoao atu le talalelei i le tulaga aloaia ma le faasamasamanoa. Fai ia avea o se aafiaga anoa mo tagata taitasi o le aiga."

---


Elder Richard G. Scott o le Korama a Apostolo e Toasefululu, "Ia Avea le Faaaogaina o le Faatuatua ma Mea E te Faamuamuaina," *Liahona*, Nov. 2014, 94.

# E I Ai Foi i le Lomiga Lenei

## MO TALAVOU MATUTUA

### AGAI I LUMA I LE **Faaatuatua**

O nei malamalamaaga e fa mai le soifuaga  
o Nifae e mafai ona e maua ai le talitonuga  
maua'i i au lava faaiuga fai.



i.44

## MO LE AUTALAVOU



i.50

### ONA O **IOSEFA**

Ua faapefea ona ese lou olaga ona o le Perofeta  
o Iosefa Samita? Mafaufau i auala nei e ono.

## MO TAMAITI

### OU TE ILOA E ALOFA IESU IA TE A'U

Fai sau lava tamaitusi e fesoasoani ai  
ia te oe ia e migao i le taimi o le lotu.



i.76